

# दूसर इतिहास

## सुलैमान बुद्धि क याचना करत ह

1 सुलैमान एक बहोत सक्तीसाली राजा बन गवा काहेकि यहोवा ओकरे परमेस्सर, ओकर संग रहा। यहोवा सुलैमान क बहोत जियादा महान बनाएस।

2सुलैमान इस्त्राएल क सबहि लोगन स बातन किहस। उ सेना क सेनापतियन, सहस्रपतियन, निआवअधीसन, इस्त्राएल क सबहि नेता लोगन अउर परिवारन क प्रमुखन स बातन किहस। 3तब सुलैमान अउर सबहि लोग ओकरे संग बटुरेन अउ उ ऊँच जगह क गएन जउन गिबोन नगर मँ रहा। परमेस्सर क मिलाप क तम्बू हुवाँ रहा। यहोवा क सेवक मूसा ओका तब बनाए रहा जब उ अउर इस्त्राएल क लोग रेगिस्ताने मँ रहेन। 4दाऊद परमेस्सर क करार क सन्दूख क किर्यत्यारीम स यरूसलेम तलक लिआवा रहा। दाऊद यरूसलेम मँ एका रखइ बरे एक ठु जगह बनाए रहा। दाऊद यरूसलेम मँ करार क सन्दूख बरे एक तम्बू लगाइ दिहे रहा। 5हूर क पूत ऊरी अउर ऊरी क पूत बसलेल एक काँसे क वेदी बनाए रहा। उ काँसे क वेदी गिबोन मँ पवितर तम्बू क समन्वा रही। एह बरे सुलैमान अउर उ सबइ लोग यहोवा स राय लेइ गिबोन गएन। 6मिलाप क तम्बू मँ यहोवा क समन्वा काँसे क वेदी तलक सुलैमान गवा। सुलैमान एक हजार होमबलि वेदी पइ चढ़ाएस।

7उ राति परमेस्सर सुलैमान क लगे आवा। परमेस्सर कहेस, “सुलैमान, मोहसे तू उ माँगा जउन कछू तू चाहत अहा कि मई तोहका देउँ।”

8सुलैमान परमेस्सर स कहेस, “तू मोरे दाऊद क बरे बहोत कृपालु अहा। तू मोका, मोरे बाप क जगह पइ नवा राजा होइ बरे चुन्या ह। 9यहोवा परमेस्सर, अब, तू जउन बाचन मोरे पिता दाऊद क दिहा ह ओका बना रहइ द्या। तू मोका अइसी प्रजा क राजा बनाया, जउन पृथ्वी क रेत कणन क नाई अनगिनत अहई। 10तू मोका बुद्धि अउ गियान द्या। ताकि मई एन लोगन क सही रहा पइ लइ चल सकव। कउनो भी मनई तोहरी मदद क बिना तोहार एँन महान लोगन पइ हुकूमत नाहीं कइ सकत ह।”

11परमेस्सर सुलैमान स कहेस, “तोहार रूख बिल्कुल ठीक अहई। तू धन या सम्पति या सम्मान नाहीं माँगा ह। तू इ भी नाहीं माँगा ह कि तोहार दुस्मन मरि जाई। तू लम्बी उमिर भी नाहीं माँगा ह। किन्तु तू अपने बरे बुद्धि अउ गियान माँगा ह जेहसे तू मोर प्रजा क सम्बन्ध मँ बुद्धिमानी स निर्णय लइ सका, जेकर मई तोहका राजा बनाएँ ह। 12एह बरे मई तोहका बुद्धि अउ गियान देब। मई तोहका धन, बैभव अउर सम्मान भी देब। तोहरे पहिले होइवाले राजा लोगन क लगे एतना धन अउर सम्मान

कबहुँ नाहीं रहा अउर तोहरे पाछे होइवाले राजा लोगन क लगे भी एँतना धन अउर सम्मान नाहीं होइ।”

13तउ सुलैमान गिबोन क आराधना क जगह मँ गवा। जब सुलैमान उ मिलापवाले तम्बू क छोड़ेस अउ यरूसलेम लउट गवा अउ इस्त्राएल पइ राज करइ लाग।

## सुलैमान धन संग्रह अउर अपनी फउज खड़ी करत ह

14सुलैमान घोड़न अउ रथ अपनी फउज क बरे एकटठा करब सुरू किहस। सुलैमान क लगे एक हजार चार सौ रथ अउर बारह हजार घोड़सवार रहेन। सुलैमान ओनका रथ नगरन मँ रखेस। सुलैमान यरूसलेम मँ भी ओनमाँ स कछू क रखेस, अर्थात हुवाँ जहाँ राजा क निवास रहा। 15सुलैमान यरूसलेम मँ बहोत सी चाँदी अउ सोना एकटठा किहस। उ एँतना अधिक चाँदी अउ सोना एकटठा किहस कि उ चट्टानन स सामान्य होइ गवा। सुलैमान देवदारु क एँतना लकड़ी बटोरेस कि उ पच्छिमी पहाड़ प्रदेश क गूलर क बृच्छ क नाई सामान्य होइ गइ। 16सुलैमान, मिस्त्र अउर कुए स घोड़न मँगाएस। राजा क बइपारियन घोड़न कुए स बेसहेन। 17सुलैमान क बइपारियन मिस्त्र स एक रथ चाँदी क छः सौ सेकेल मँ अउर घोड़ा चाँदी क एक सौ पचास सेकेल मँ बेसहेन। तब बइपारियन घोड़न अउर रथन क हिली लोगन क राजा लोगन तथा अराम क राजा लोगन क हाथ बेच दिहस।

## सुलैमान मन्दिर बनावइ क योजना बनावत ह

2 सुलैमान यहोवा क नाउँ क प्रतिष्ठा क बरे एक मन्दिर अउर अपने बरे एक राजमहल बनावइ क निहचइ कहस। 2सुलैमान सत्तर हजार बोझ ढोवइया अउर पहाड़ी पहुँटा मँ पाथर खनइ बरे अस्सी हजार मनइयन क चुनेस अउर उ तीन हजार छः सौ मनई मजदूरन क निगरानी बरे चुनेस।

3तब सुलैमान हूराम क सँदेसा पठएस। हूराम सोर नगर क राजा रहा। सुलैमान सँदेसा दिहे रहा, “मोका वइसे ही मदद द्या जइसे तू मोरे बाप दाऊद क मदद दिहे रह्या। देवदार क बृच्छन स ओनका काठ पठए रह्या जेहसे उ पचे अपने रहइ क बरे महल बनाइ सके रहेन। 4मई एक ठु मन्दिर बनाउब अउर ओका यहोवा आपन परमेस्सर क नाउँ क सम्मान देइ बरे अर्पित करब। हम पचे यहोवा क समन्वा सुगन्धित धूप जराब। हम पचे हमेसा पवितर रोटी क बिसेस मेज पई भेंट करब। हम पचे हर भिसारे, हर सांझ, हर सबित क दिन मँ, हर नवा चन्द्र क दिन मँ अउर दूसर त्यौहार मँ जउन यहोवा हमार परमेस्सर हम पचन क मनावइ

बरे आदेस दिहे रहा, मैं होमबलि भेंट चढ़ाउब। इ ओकर नेम अहइ जेका इस्राएल क लोगन क सदा पालन करइ चाही।

5“जउन मन्दिर मई बनाउब उ महान होइ, काहेकि हमार परमेस्सर सबहिं देवतन स बड़ा अहइ। 6किन्तु कउनो भी मनई सही अर्थ मैं हमरे परमेस्सर बरे भवन नाहीं बनाइ सकत। सरग हौं, उच्चतम सरग भी परमेस्सर क अपने भीतर नाहीं रख सकत। मई सिरिफ एक जगह परमेस्सर क समन्वा सुगन्धि बारइ बरे बनाइ सकत हउँ।

7“अब, मोरे लगे सोना, चाँदी, काँसा अउर लोहा क काम करइ मैं एक ठु कुसल मनई क पठवा। उ मनई क एकर गियान होइचाही कि बैगनी, लाल अउ नीले ओढ़नन क उपयोग कइसे कीन्ह जात ह। उ मनई क हिआँ यहूदा अउ यरूसलेम मैं मोरे कुसल कारीगरन क संग नक्कासी करब होइ। मोर बाप दाऊद एन कुसल कारीगरन क चुने रहा। 8मोरे लगे लबानोन देस स देवदार, चीर अउ चन्दन अउर सनोवर क लकड़ियन भी पठएन। मई जानत हउँ कि तोहार सेवक लबानोन स बृच्छन क काटइ मैं अनुभवी अहई। मोर सेवक तोहरे सेवकन क मदद करिहीं। 9काहेकि मोका प्रचुर मात्रा मैं इमारती लकड़ी चाही। जउन मन्दिर मई बनावइ जात अहउँ उ बिसाल अउ अद्भुत होइ। 10मई एक लाख पचीस हजार बुसल गोहूँ अउर एक लाख पचीस हजार बुसल जौ, एक लाख पन्द्रह हजार गैलन दाखरस अउर एक लाख पन्द्रह हजार गैलन तेल तोहरे ओन सेवकन क बरे दिहेउँ ह जउन इमारती लकड़ी बरे बृच्छन क काटत हीं।”

11तब सोर क राजा हूराम सुलैमान क जवाब दिहस। उ सुलैमान क एक ठु पत्र पठएस। पत्र मैं इ कहा गवा रहा: “सुलैमान, यहोवा अपने लोगन स पिरेम करत ह। इहइ कारण अहइ कि उ तोहका ओनकर राजा चुनेस।” 12हूराम इ भी कहेस, “इस्राएल क यहोवा, परमेस्सर क बड़कई करा। उ धरती अउ अकास बनाएस। उ राजा दाऊद क बुद्धिमान पूत दिहस। सुलैमान, तोहका बुद्धि अउर समुझ दिहस ह। तू एक ठु मन्दिर यहोवा बरे बनावत अहा। तू अपने बरे भी एक राजमहल बनावत अहा। 13मई तोहरे लगे एक ठु कुसल कारीगर पठउब। ओका बिभिन्न प्रकार क बहोत सी कलन क जानकारी अहइ। ओकर नाउँ हूराम-अबी अहइ। 14ओकर महतारी दान क परिवार समूह क रही अउर ओकर बाप सोर नगर क रहा। हूराम-अबी सोना, चाँदी, काँसा, लोहा, पाथर अउ काठे क काम मैं कुसल अहइ। उ बैगनी, नीला, लाल ओढ़नन अउ कीमती मलमल ओढ़नन मैं कढ़ाई क काम मैं भी कुसल अहइ। उ हर कउनो डिज़ाइन क जेहका तू देखउब्या, कइ सकत ह। उ तोहरे कुसल कारीगरन क मदद करी अउर तोहरे बाप दाऊद क कुसल कारीगरन क मदद करी।

15“तू गोहूँ, जौ, तेल अउर दाखरस पठावइ क जउन बचन दिहे रह्या, ओका पूरा करा अउर उ सबइ चिजियन क मोरे सेवकन क लगे पठइ द्या। 16अउर हम लोग लबानोन देस स लकड़ी काटब। हम लोग ओतनि लकड़ी काटब जेतनी तोहका जरुरत अहइ। हम लोग समुद्धर मैं लकड़ी क लट्ठन क बेड़ा क उपयोग जापा नगर तलक

लकड़ी पहोंचावइ बरे करब। तब तू लकड़ी क यरूसलेम लइ जाइ सकत ह।”

17तब सुलैमान इस्राएल मैं बसइवाले सबहिं बाहरी लोगन क गनवाएस। इ उ समइ क पाछे भवा जब दाऊद लोगन क गने रहा। दाऊद, सुलैमान क बाप रहा। ओका 1,53,600 बाहरी लोग मिलेन। 18सुलैमान 70,000 बिदेसियन क चिजियन ढोवइ बरे, 80,000 बिदेसियन क पहाड़न मैं पाथर काटइ बरे अउर 3,600 बिदेसियन क पहाड़न मैं पाथर काटइवाले मनईन क निरिच्छक बरे चुनेस।

### सुलैमान मन्दिर बनावत ह

3 सुलैमान यहोवा क मन्दिर मोरिय्याह पर्वत पइ यरूसलेम मैं बनाउब सुरु किहस। पर्वत मोरिय्याह उ जगह अहइ जहाँ यहोवा सुलैमान क बाप दाऊद क दर्शन दिहे रहा। सुलैमान उहइ जगह पइ मन्दिर बनाएस जेका दाऊद तइयार कइ चुका रहा। उ जगह उ खरिहाने मैं रही जउन ओर्नान क रहा। ओर्नान यबूसी लोगन मैं स एक रहा। 2सुलैमान इस्राएल मैं अपनी हुकूमत क चउथे बरिस क दूसरे महीने मैं मन्दिर बनाउब सुरु किहस।

3सुलैमान परमेस्सर क मन्दिर क नेव क निर्माण क बरे जउने माप क उपयोग किहेस, इ उ अहइ: नेव साठ हाथ लम्बी अउर बीस हाथ चउड़ी रही। सुलैमान पुराने हाथ क माप क ही उपयोग तब किहस जब उ मन्दिर क मापेस। 4मन्दिर क सामने क दुआर मण्डप बीस हाथ लम्बा अउर बीस हाथ ऊँच रहा। सुलैमान दुआर मण्डप क भीतरी हीसा क निखालिस सोना स मढ़वाएस 5सुलैमान बड़े कमरन क देवार पइ सनोवर लकड़ी क बनी चौकोर सिल्लियन धरेस। तब उ सनोवर क सिल्लियन क निखालिस सोना स मढ़ेस अउर उ निखालिस सोने पइ खजूरे क बृच्छ क चित्र अउ जंजीरन बनाएस। 6सुलैमान मन्दिर क सुन्नरता क बरे ओहमाँ बहुमूल्य रतन लगाएस। जउने सोने क उपयोग सुलैमान किहस उ पैम स आवा रहा। 7सुलैमान मन्दिर क भीतरी भवन क सोना स मढ़ दिहस। सुलैमान छते क कड़ियन चौखटन, देवारन अउर दरवाजन पइ सोना मढ़वाएस। सुलैमान देवारन पइ करूब सरगदूतन क खुदवाएस।

8तब सुलैमान सब स जियादा पवित्तर जगहिया बनाएस। सब स जियादा पवित्तर जगहिया बीस हाथ लम्बी अउर बीस हाथ चउड़ी रही। इ ओतनी ही चउड़ी रही जेतना पूरा मन्दिर रहा। सुलैमान सब स जियादा पवित्तर जगहिया क देवारन पइ सोना मढ़वाएस। सोना क वजन लग भग बीस हजार चार सौ किलोग्राम रहा। 9सोना क कीलन क वजन पाँच सौ पचहत्तर ग्राम रहा। सुलैमान ऊपरी कमरन क सोना स मढ़वाएस। 10सुलैमान दुइ करूब सरगदूत सब स जियादा पवित्तर जगह पइ धरइ बरे बनाएस। कारीगरन करूब सरगदूतन क सोना स मढ़ दिहन। 11करूब (सरगदूतन) क हर एक पखना पाँच हाथ लम्बा रहा। पखनन क पूरी लम्बाई बीस हाथ रही। पहिले करूब सरगदूत क एक पखना कमरा क एक कइँती क देवार क छुअत रहा। दूसर पखना दूसरे करूब सरगदूत क पखना क छुअत रहा।

12दूसरे करूब सरगादूत क दूसर पखना कमरा क दूसरी कइँती क देवार क छुअत रहा। 13करूब सरगादूत क पखना सब मिलाइके बीस हाथ फइले रहेन। करूब सरगादूत भीतर पवितर जगह कइँती लखत भए खड़े रहेन।

14उ नीला, बैंगनी, लाल अउर कीमती ओढ़नन अउ कीमती सूती ओढ़नन स पर्दे\* क बनवाएस। परदे पइ करूबन क चित्र काढ़ दिहस।

15सुलैमान मन्दिर क समन्वा दुइ खम्भन खड़ा किहस। खम्भन पैतीस हाथ ऊँच रहेन। दुइनउँ खम्भन क सीर्स हींसा दुइ पाँच हाथ लम्बा रहा। 16सुलैमान जंजीरन क हार बनाएस। उ जंजीरन क खम्भन क सीर्स पइ धरेस। सुलैमान सौ अनार बनाएस अउर ओनका जंजीरन स लटकाएस। 17तब सुलैमान मन्दिर क समन्वा खम्भन खड़े किहस। एक खम्भा दाई कइँती रहा। दूसर खम्भा बाई कइँती रहा। सुलैमान दाई कइँती क खम्भा क नाउँ “याकीन” अउर बाई कइँती क खम्भा क नाउँ “बोअज” रखेस।

### मन्दिर क सजा

4 सुलैमान वेदी बनावइ बरे काँसा क उपयोग किहस। उ काँसा क वेदी बीस हाथ लम्बी, बिस हाथ चउड़ी अउर दस हाथ ऊँच रही। 2तब सुलैमान टेधरे काँसे क उपयोग एक बिसाल हौज बनावइ क बरे किहस। बिसाल हौज गोल रहा अउर एक सिरे स दूसर सिरे तलक एकर माप दस हाथ रही अउर इ पाँच हाथ ऊँच अउर तीस हाथ घेरे वाला रहा। 3बिसाल हौज क खाले मँ बर्धन क आकृतियन क दुई कतारन मँ जउन हौज क चारिहुँ कइँती दस हाथ ढाँपि लिहेन, बनान गएन। उ सबइ तब ढाले गएन जब हौज बनावा ग रहा। 4उ बिसाल काँसा क हौज बारह बर्धन क बिसाल प्रतिमा पइ स्थित रहा। तीन बर्धन उत्तर कइँती लखत रहेन। तीन बर्धन पच्छिम कइँती लखत रहेन। तीन बर्धन दक्खिन कइँती लखत रहेन। तीन बर्धन पूरब कइँती लखत रहेन। बिसाल काँसा क हौज एन बर्धन क ऊपर रहा। सबहिँ बर्धन अपने पिछवड़े केन्द्र कइँती रखके खड़ा रहा। 5बिसाल काँसा क तलाव चार अंगुल मोटा रहा। बिसाल तलाव क सिरा एक पियाले क सिरे क नाई रहा। सिरा खिली भइ लिली क तरह रहा। एहमाँ छछठ किलो लीटर आइ सकत रहा।

6सुलैमान दस चिलमचियन बनाएस। उ बिसाल काँसे क हौज क दाई कइँती पाँच चिलमचियन रखेस अउर सुलैमान काँसा क बिसाल हौज क बाई कइँती पाँच चिलमचियन रखेस। एन चिलमचियन क उपयोग होमबलि बरे चढ़ाई जाइवाली चिजियन क धोवइ बरे होब रहा, किन्तु बिसाल हौज क उपयोग बलि चढ़ावइ क पहिले याजकन क नहाइ बरे होब रहा।

7सुलैमान क निर्देस क अनुसार सोना क दस डीबट बनाएस अउर ओनका मन्दिर मँ रख दिहस: पाँच दाहिन

कइँती अउर पाँच बाई कइँती। 8सुलैमान दस मेजन बनाएस अउर ओनका मन्दिर मँ धरेस। मन्दिर मँ पाँच तु मेजन दाई रहिन अउर पाँच मेजन बाई। सुलैमान सौ चोलमचियन बनावइ क बारे सोना क उपयोग किहस। 9सुलैमान याजकन बरे आँगन बनाएन, बड़ा आँगन अउर दरवाजन ओकरे बरे बनाएस। उ आँगन मँ खुलइवाले दरवाजन क मढ़इ बरे काँसे क उपयोग किहस। 10तब उ बिसाल काँसे क तलाव क मन्दिर क दक्खिन पूरब कइँती दाई कइँती रखेस।

11हूराम बर्तन, बोलचन अउर खोरन क बनाएस। तब हूराम परमेस्सर क मन्दिर मँ सुलैमान बरे अपने काम खतम किहेस। 12हूराम दुइनउँ खम्भन अउर दुइनउँ खम्भन क सीर्सभाग क दुइनउँ बिसाल खोरन क बनाए रहा। हूराम दुइनउँ खम्भन क सीर्सभाग कि दुइनउँ बिसाल खोरन क ढकइ बरे सजावटी जाल क दुइ सेट भी बनाए रहा। 13हूराम चार सौ अनार दुई सेट सजावटी जाल बरे बनाएस। हर एक जाल क बरे अनारन क दुइ पंक्तियन रहिन। दुइनउँ खम्भन क सीर्सभाग पइ बिसाल खोरन जाल स ढके रहेन। 14हूराम आधार दण्ड अउ ओनके ऊपर क पियालन क भी बनाएस। 15हूराम एक बिसाल काँसे क तलाव अउ तलाव क खाले बारह बर्धन बनाएस। 16हूराम बर्तन, बेलचन, काँटन अउर सबहिँ चिजियन राजा यहोवा क मन्दिर बरे राजा सुलैमान क अनुरोध क अनुसार बनाएस। इ सबइ चिजियन कलई चढ़े काँसे क बनी रहिन। 17राजा सुलैमान पहिले एन चिजियन क माटी क साँचे मँ डारेस। इ सबइ साँचिन सुक्कोत अउर सरेदा नगरन क बीच यरदन घाटी मँ बने रहेन। 18सुलैमान इ सबइ ऐतनी जियादा तादाद मँ बनाएस कि कउनो मनई उपयोग मँ लाए गए काँसा क तउलइ क जतन नाहीं किहस। 19सुलैमान परमेस्सर क मन्दिर बरे भी चिचियन बनाएस। सुलैमान सुनहरी वेदी बनाएस। उ उ सबइ मेजन बनाएस जेन पइ उपस्थिति क रोटियन रखी जात रहिन। 20सुलैमान डीबट अउ ओनकर दिया निखालिस सोना क बनाएस। बनी भइ योजना क मुताबिक डीबटन क पवितर जगह क समन्वा भीतर बारब रहा। 21सुलैमान फूलन, दीयन अउ चिमटन क बनावइ बरे निखालिस सोना क उपयोग किहस। 22सुलैमान झालरन, पियालन, कड़ाहियन अउ धूपदान बनावइ बरे निखालिस सोना क उपयोग किहस। सुलैमान मन्दिर क दरवाजन, सब स जियादा पवितर जगह अउर मुख्य बिसाल कच्छ क भीतरी दरवाजन क बनावइ बरे निखालिस सोने क उपयोग किहस।

5 तब सुलैमान यहोवा क मन्दिर क बरे कीन्ह गए सबहिँ काम पूरे कइ लिहस। सुलैमान ओन सबहिँ चिजियन क लिआएस जउन ओकर बाप दाऊद क मन्दिर बरे दिहे रहा। सुलैमान सोना चाँदी क बनी भइ सबहिँ चिजियन अउर सबहिँ फर्निचरन (लकड़ी स बना भवा चिजियन) क लिआएन। सुलैमान ओन सबहिँ चिजियन क परमेस्सर क मन्दिर क खाजना मँ रखेस।

### पवितर सन्दूख मन्दिर मँ पहुँचावा गवा

2सुलैमान इघ्राएल क सबहिँ परिवार समूहन क प्रमुखन अउर परिवारन क एकट्ठा किहेस। उ सबहिँ क यरूसलेम

पर्दे इ पर्दा एक बड़ा ओढ़नना क टुका क रहा। इ पवितर ठउर अउर महा पवितर ठउर क बीच मँ लटकत रहा। एकरे कारण कउनो भी यहोवा क करार क सन्दूक क अउर करूब सरगादूतन क जउन भीतर रहा, नाहीं लख सकतेन।

में बटोरें। सुलैमान इ एह बरे किहस कि लेवी बंसी यहोवा क करार क सन्दूख क दाऊद क नगर स लाई सकई, जउन सिप्योन अहइ। 3राजा सुलैमान इस्राएल क सबहि लोगन क संग महीने क कुटीर क त्यौहार पइ जमा भएस।

4जब इस्राएल क सबहि बुजुगन आइ गएन तब लेवीबंसियन करार क सन्दूख क उठाएस। 5तब याजक अउर लेवीबंसी करार क सन्दूख क मन्दिर में लइ गएन। उ पचे मिलापवाले तम्बू अउ एहमाँ जउन पवितर चिजियन रहिन ओनका भी यरूसलेम लइ आएन।

6राजा सुलैमान अउ इस्राएल क सबहि लोग करार क सन्दूख क समन्वा मिलेन। राजा सुलैमान अउ इस्राएल क सबहि लोग भेड़िन अउ बर्धन क बलि चढ़ाएन। हुवाँ एँतेने जियादा भेड़िन अउ बर्धन रहेन कि कउनो मनई ओनका गन नाहीं सकत रहा। 7तब याजकन यहोवा क करार क सन्दूख क उ जगह पइ रखेन, जउन एकरे बरे तइयार कीन्ह गवा रहा। उ सब स जियादा पवितर जगह मन्दिरे क भीतर रही। करार क सन्दूख क करूब सरगदूत क पखनन क खाले धरा गवा।

8करार क सन्दूख क जगह क ऊपर करूब सरगदूतन क पखनन फइले भए रहेन, करूब सरगदूत करार क सन्दूखे क ऊपर अउर बल्लियन क ऊपर जउन सन्दूख क लइ जाइ में प्रयोग आवत होत ह, खड़े रहेन। 9बल्लियन एँतनी लम्बी रहिन कि महा पवितर ठउर क समन्वा स ओनकर सिसन क लखे जाइ सकतेन। मुला ओनका मन्दिर क बाहेर स कउनो नाहीं लखत सकतेन। बल्लियन, आजु तलक हुवाँ अहई।

10करार क सन्दूख में दुई ठू पाथर क सिलन क अलावा दूसर कछू नाहीं रखा रहा। मूसा दुइनउँ सिलन क होरेब पर्वत पइ करार क सन्दूख में रखे रहा। होरेब उ जगह रही जहाँ परमेस्सर इस्राएल क लोगन क संग जब उ पचे मिस्त्र छोड़ दिहे रहेन। एक करार किहे रहा।

11सबहि याजक जउन हुवाँ रहेन आपन आप क सुद्ध अउर पवितर करइ बरे समारोह क आयोजन किहेस। ओकर पाछे उ पचे महा पवितर ठउर स बाहर आएन, उ पचे एक संग खड़ा भएन, लेकिन एक बिसेस समूह में नाहीं। 12अउर सबहि लेवीबंसी गायक वेदी क पूरब कइँती खड़े रहेन। सबहि आसाप, हेमान अउ यदूतन क गायक समूह हुवाँ रहेन अउर ओनकर पूत अउर ओनकर सम्बन्धी भी हुवाँ रहेन। उ सबई लेवीबंसी गायक सफेद कीमती मलमल क ओढ़ना पहिरे भए रहेन। उ पचे झॉँझ, वीणा अउर सारंगी लिहे रहेन। ओन लेवी बंसी गाएकन क संग हुवाँ एक सौ बीस याजकन तुरही बजावत रहेन। 13जउन तुरही बजावत रहेन अउर गावत रहेन, उ पचे एक ठु मनई क तरह रहेन। जब उ पचे यहोवा क स्तुति करत रहेन अउर ओका धन्यवाद देत रहेन तब उ पचे एक ही स्वर में गावत रहेन। तुरही, झॉँझ अउ दूसर वाद्य यंत्रन पइ उ पचे जोर स आवाज करत रहेन, उ पचे यहोवा क स्तुति में इ गीत गाएन:

“यहोवा क स्तुति करा काहेकि उ भला अहइ। ओकर पिरेम अउर दया सास्वत अहइ।”

तब यहोवा क मन्दिर बादर स भरि उठा। 14बादर क कारण याजक लगातार सेवा कइ न सकेन। एकर कारण रहा यहोवा क महिमा मन्दिर में भरि गइ रही।

6 तब सुलैमान कहेस, “यहोवा कहेस कि उ करिया घने बदरे में रही। 2हे यहोवा, मई इ भव्य मन्दिर तोहरे बरे एहमाँ सदा-सर्वदा रहइ बरे बनाएउँ ह।”

### सुलैमान क भासण

3राजा सुलैमान मुड़ा अउर उ अपने समन्वा खड़े सबहि इस्राएल क लोगन क आसीबादि दिहस। 4सुलैमान कहेस, “इस्राएल क परमेस्सर, यहोवा क बड़कई करा। यहोवा उ कइ दिहेस ह जउन करइ क बचन उ तब दिहे रहा जब उ मोरे बाप दाऊद स बातन किहे रहा। परमेस्सर यहोवा इ कहे रहा: 5‘उहइ दिना स जब मई अपने लोगन क मिस्त्र स बाहेर लिआएउँ तब स अब तलक मई इस्राएल क कउनो परिवार समूह स कउनो नगर नाहीं चुनेउँ ह, जहाँ मोरे नाउँ क एक ठु भवन बनइ। मई अपने निज लोगन इस्राएलियन पइ हुकूमत करइ बरे भी कउनो मनई क नाहीं चुनेउँ ह। 6किन्तु अब मई यरूसलेम क अपने नाम बरे चुनेउँ ह अउर मई दाऊद क अपने इस्राएली लोगन क अगुवाई करइ बरे चुनेउँ ह।’

7‘मोरे बाप दाऊद क इ इच्छा रही कि उ इस्राएली रास्ट्र क यहोवा परमेस्सर क नाउँ क महिमा बरे एक ठु मन्दिर बनवावई। 8इसलिए यहोवा मोरे बाप स कहेस, ‘दाऊद, जब तू मोरे नाउँ बरे मन्दिर बनावइ क इच्छा किहा तब तू ठीक काम किहा ह। 9मुला तू मन्दिर बनाइ नाहीं सकत्या। मुला तोहार आपन पूत मोरे नाउँ बरे मन्दिर बनवाइ।’ 10अब, यहोवा उ कइ दिहेस ह जउन उ करइ क कहे रहा। मई अपने बाप क जगह पइ नवा राजा हउँ। दाऊद मोर बाप रहेन। अब मई इस्राएल क राजा अहउँ। यहोवा इहइ करइ क बचन दिहे रहा। मई इस्राएल क यहोवा परमेस्सर क नाउँ पइ मन्दिर बनवाएउँ ह। 11मई करार क सन्दूख क मन्दिर में धरेउँ ह। करार क सन्दूख हुवाँ अहइ जहाँ यहोवा क संग कीन्ह गइ वाचा रखी जात ह। यहोवा इ वाचा इस्राएल क लोगन क संग किहेस।”

### सुलैमान क पराथना

12सुलैमान यहोवा क वेदी क समन्वा खड़ा भवा। उ ओन इस्राएल क लोगन क समन्वा खड़ा भवा जउन हुवाँ बटुरे भए रहेन। तब सुलैमान अपने हाथन अउर अपनी भुजन क फइलाएस। 13सुलैमान एक ठु काँसे क मंच पाँच हाथ लम्बा, पाँच हाथ चउड़ा अउर तीन हाथ ऊँच बनाए रहा अउर एका बाहरी आँगन क बीच में रखे रहा। तब उ मंच पइ खड़ा भवा अउर इस्राएल क जउन लोग हुवाँ बटुरे भए रहेन ओनकर उपस्थिति में घुटने टेकेस। सुलैमान अकासे कइँती हाथ फइलाएस। 14सुलैमान कहेस:

“हे इस्राएल क परमेस्सर, यहोवा, तोहार समान कउनो भी परमेस्सर न तउ सरग में बाटइ, न ही धरती पइ अहइ। तू आपन पिरेम अउ दया क प्रतिग्या बनाए रख जेका तू आपन सेवकन क संग जउन नीक रास्ते पइ चलत ही अउर

पूरे हिरदइ स तोहरी आग्या क पालन करत हीं किहस ह। 15तू अपने सेवक दाऊद क दिए गए बचन क पूरा किहे रह्या, अउर आजु तू अपने हाथन स इ बचन क पूरा किहा ह। 16अब, हे यहोवा, इस्राएल क परमेस्सर! तू अपने सेवक दाऊद क दिए बचन क बनाए राखा। तू इ बचन दिहे रह्या: तू कहे रह्या, 'दाऊद, तू अपने परिवार स, मोरे समन्वा इस्राएल क सिंहासने पइ बइठइ बरे, एक मनई क पावइ म कबहुँ असफल नहीं होब्या। इहइ होइ यदि तोहार पूत ओन सबहिं बातन में सावधान रहिहीं जेनका उ पचे करिहीं। ओनका मोरे नेमन क पालन वइसे ही करइ चाही जइसा तू मोरे नेमन क पालन किहा ह।' 17अब, हे यहोवा, इस्राएल क परमेस्सर अपने बचन क पूर होइ द्या। तू इ बचन अपने सेवक दाऊद क दिहा ह।

18"हे परमेस्सर, हम जानित ह कि तू यथार्थ में, लोगन क संग धरती पइ नाहीं रहब्या। सरग, सब स ऊँच सरग भी तोहका अपने भीतर रखइ क छमता नाहीं राखत अउर हम जानित ह कि इ मन्दिर जेका मई बनाएउँ ह तोहका अपने भीतर नाहीं रखि सकत। 19किन्तु हे यहोवा, परमेस्सर तू हमार पराथना अउर कृपा याचना पइ धियान द्या। हे यहोवा, मोर परमेस्सर! तोहरे बरे कीन्ह गइ मोर पुकार तू सुना। मई तोहसे जउन पराथना करत हउँ, सुना। मई तोहार सेवक हउँ। 20मई पराथना करत हउँ कि तोहार आँखिन मन्दिर क लखइ बरे दिन रात खुली रहई। तू कहे रह्या कि तू इ जगह पइ आपन नाउँ अंकित करब्या। मन्दिर क लखत भवा जब मई तोहसे पराथना करत हउँ तउ तू मोर पराथना सुना। 21मोर पराथनन क सुना अउर तोहरे इस्राएल क लोग जउन पराथनन करत अहई, ओनका भी सुना। जब हम तोहरे मन्दिर क लखत भए पराथनन करित ह तउ तू हमार पराथनन क सुना। तू सरग में जहाँ रहत ह हुवई स सुना अउर जब तू हमार पराथनन सुन्या तउ तू हमका छिमा करा।

22"अगर कउनो मनई कउनो दूसर मनई क संग कछू बुरा करइ क कलंकित होइ, तउ उ कलंकित मनई तोहार नाउँ लेइके प्रतिग्या करी कि उ निरपराध अहइ, तउ जब उ तोहरी वेदी क समन्वा सपथ लेइ बरे आवइ, 23तउ तू सरग स सुना। तू अपने सेवकन क फैसला करा अउर ओका कार्यान्वित करा। दोखी मनई क सजा द्या अउर ओका ओतना कस्ट होइ द्या जेतना कस्ट उ दूसरे क दिहेस होइ। इ साबित करा कि जउन मनई अच्छा कार्य किहेस ह, उ निरपराध अहइ अउर ओका ओकर अच्छाई क कारण ओका इनाम द्या।

24"होई सकत ह तोहार लोग, इस्राएलियन आपन दुस्मनन स पराजित होइ, काहेकि उ पचे तोहरे खिलाफ पाप किहेन ह। अगर उ पचे तोहार लगे पराथना करइ बरे लउटी आई अउर इ मन्दिर स तोहार नाउँ क स्तुति करी, तउ 25सरग स अपने लोगन क सुना अउर इस्राएलियन क पापन क छिमा करा। ओनका उ भुइयाँ में लउटावा जेका तू ओनका अउर ओनके पुरखन क दिहे रह्या।

26"होई सकत आसमान बन्द होइ एह बरे बर्खा न होइ। उ तब होइ जब इस्राएल क लोग तोहरे बिरुद्ध पाप

करिहीं। यदि उ पचन्क एकर पछतावा होइ अउर तोहार नाउँ क स्वीकार करइ अउ इ मन्दिर क ओर पारथना करइ अउर यदि उ पचे पाप करब तजि देइहीं काहेकि तू ओनका सजा दिहेस ह, 27तउ सरग स तू ओनकर सुना। तू ओनकर सुना अउर ओनके पापन क छिमा करा। इस्राएल क लोग तोहार सेवक अहई। तब ओनका सही मारग क उपदेस द्या जेह पइ उ पचे चल सकत। तू अपनी भुइयाँ पइ बर्खा करा जउन तू अपने लोगन क दिहे रह्या।

28"अगर हुवाँ भुइयाँ में कउनो अकाल या महामारी या अगर फसलन क बेरामी बर्बाद होइ जाइ या अगर फफूँदी या अगर टिड्डी अउर टिड्डे या यदि इस्राएल क लोगन क नगरन में ओनकर दुस्मन घेरा डाइ देई, या यदि इस्राएल में कउनो प्रकार क बेरामी होइ, 29अउर तब तोहार लोग अर्थात इस्राएल क कउनो मनई पराथना या याचना करइ अउ हर एक मनई अपनी आपति अउ पीरा क जानत रहइ अउ यदि उ मनई इ मन्दिर क लखत भए आपन आपन हाथ अपनी बाँह उठावइ 30तउ तू ओनकर सरग स सुना। सरग उहइ अहइ जहाँ तू अहा। सुना अउर छिमा करा। हर एक मनई क ओकरे हक द्या काहेकि तू जानत ह कि हर एक मनई क हिरदइ में का बाटइ। सिरिफ तू ही जानत ह कि मनई क हिरदइ में का बाटइ। 31तब लोग तोहसे डेरइहीं अउर तोहार आग्या मानिहीं जब तलक उ पचे देस में रहिहीं जेका तू हमरे पुरखन क दिहे रह्या।

32"कउनो अइसा अजनबी होइ सकत ह जउन तोहार इस्राएल क लोगन में स न होइ, किन्तु उ देस स आवा होइ जउन बहोत दूर होइ अउर उ अजनबी इ बरे आवा होइ काहेकि उ तोहार महान नाउँ, तोहार महान सक्ती अउर बड़की ताकत बरे सुनेइ होइ। जब उ मनई आवइ अउर इ मन्दिर क लखत भवा पराथना करइ, 33तब सरग स जहाँ तू रहत ह, सुना अउर तू ओका अनुदान द्या जउन उ चाहत ह। तब सारे संसार क राष्ट्र तोहार नाउँ जनिहीं अउर तोहार आदर वइसे करिहीं जइसे तोहार लोग अर्थात इस्राएली करत हीं अउर संसार क सबहिं लोग जनिहीं कि जउने मन्दिर क मई बनवाएउँ ह उ तोहरे नाउँ स जाना जात ह।

34"जब तू अपने लोगन क कउनो जगह पइ ओनकर दुस्मनन क संग लइइ बरे पठएस अउर उ पचे इ नगर कईंती लखिके पराथना करई, जेका तू चुन्या ह अउ इ मन्दिर कईंती लखई जेका मई तोहरे नाउँ बरे बनाएउँ ह। 35तउ ओकर पराथना अउर याचना क सरग स सुना अउर ओकर सहायता करा।

36"लोग तोहरे खिलाफ पाप करिहीं कउनो अइसा मनई नाहीं जउन पाप न करत होइ अउर तू ओन पइ क्रोधित होब्या। तू कउनो दुस्मन क ओनका हरावइ देब्या अउर ओनसे धरे जाइ देब्या अउ बहोत दूर या निचके क भुइयाँ में जाइ देब्या। 37किन्तु जब उ पचे आपन बिचार बदलिहीं अउर पछतावा करिहीं अउर तोहसे याचना करिहीं जब कि उ पचे बन्दी बनाए जाइवाले देस में ही अहई। उ पचे कहिहीं, 'हम लोग पाप किहा ह, हम लोग बुरा किहा ह अउ हम लोग दुट्ठता कीन्ह ह।' 38तब उ पचे उ देस में जहाँ उ पचे बन्दी क रूप में अहई, अपने पूरे हिरदइ व आत्मा स

तोहरे लगे लउटिहीं अउर इ देस कइँती जउन तू ओनके पुरखन क दिहा ह, इ नगर कइँती जेका तू चुन्या ह, अउर इ मन्दिर कइँती जउन मई तोहरे नाउँ क महिमा बरे बनाएउँ ह, ओकरे कइँती मुँह कइके पराथना करिहीं। 39 जब अइसा होइ तउ तू सरग स ओकर सुना। सरग तोहार आवास अहइ। ओनकर पराथना अउर याचना क स्वीकार करा अउर ओनकर सहायता करा अउर अपने ओन लोगन क छिमा कइ द्या जउन तोहरे खिलाफ पाप किहन ह। 40 अब, मोरे परमेस्सर, मई तोहसे माँगत हउँ, तू अपनी आँखी अउर कान खोल ल्या। तू हम लोगन क, जउन पराथना इ जगह पइ करत अहइँ ओका सुना अउर ओह पइ धियान द्या।

41 “अब, हे यहोवा परमेस्सर उठा अउर अपने करार क सन्दूख क संग जउन कि तोहार सक्ती क स्थल अहइ आपन बिस्वाम स्थल पइ आवा। तोहार याजक मुक्ती रूपी वस्त्र पहिरा रहइ। हे यहोवा, परमेस्सर तोहार भक्तजन तोहार अच्छाई में आनन्दित होइ।

42 हे यहोवा, परमेस्सर अपने अभिसिक्त राजा क स्वीकार करा। अपने सेवक दाऊद क विस्वासभक्ति क याद राख।”

### मन्दिर यहोवा क अर्पित

7 जब सुलैमान पराथना पूरी किहस तउ अकासे स सागी उतरी अउर उ होमबलि अउर बलियन क बारेस। यहोवा क तेज मन्दिर क भर दिहस। 2 याजक यहोवा क मन्दिर में नहीं जाइ सकत रहेन काहेकि यहोवा क तेज ओका भरि दिहे रहा। 3 इस्त्राएल क सबहि लोग आकासे स आगी क उतरत लखेन। इस्त्राएल क लोग मन्दिर पइ भी यहोवा क तेज क लखेन। उ पचे अपने चेहरे क चबूतरे क फर्स तलक निहुराएन। उ पचे यहोवा क उपासना किहन अउ ओका धन्यवाद दिहन। उ पचे गाएन, “यहोवा भला बा, अउर ओकर दाया सदा रहत ह।”

4 तब राजा सुलैमान अउ इस्त्राएल क सबहि लोग बलि यहोवा क समन्वा चढ़ाएन। 5 राजा सुलैमान बाईस हजार बर्था अउ एक लाख बीस हजार भेड़िन भेंट किहस। राजा अउ सबहि लोग परमेस्सर क मन्दिर क समर्पित किहसे। 6 याजक आपन कार्य करइ बरे तइयार खड़े रहेन। लेवीबंसी भी यहोवा क वाद्य यंत्र क संग खड़े रहेन। इ सबइ यंत्र राजा दाऊद क जरिये यहोवा क धन्नवाद देइ बरे बनाए गए रहेन। याजक अउ लेवीबंसी कहत रहेन, “यहोवा क स्तुति करा काहेकि ओकर पिरेम हमेसा रहत हीं।” याजकन लेवीबंसियन क दूसरी कइँती खड़े रहेन, तउ याजकन अपनी तुरहियन बजाएन अउर इस्त्राएल क सबहि लोग खड़े रहेन।

7 सुलैमान यहोवा क मन्दिर क समन्वा वाले आँगन क मध्य हींसा क भी पवितर किहस। इ उहइ जगह अहइ जहाँ सुलैमान होमबलि अउर मेलबलि क चर्बी चढ़ाएस। सुलैमान आँगन क बीच क हींसा काम में लिहस काहेकि काँसे क वेदी पइ जेका सुलैमान बनाए रहा, सारी होमबलि, अन्नबलि अउ चर्बी नाही आइ सकत रही काहेकि भेंटन बहोत जियादा रहिन।

8 सुलैमान अउ इस्त्राएल क सबहि लोग सात दिना तलक दावतन क उत्सव मानएन। सुलैमान क संग लोगन क एक बहोत बड़ा समूह रहा। उ सबइ लोग उत्तर दिसा क हमथ नगर क प्रवेश दुआर अउ दक्खिन क मिस्र क झरनन जइसे सुदूर पहुँचन स आए रहेन। 9 वेदी क पवितर करइ, अउर कुटीर क त्यौहार क सात दिना क उत्सव मनाइ क पाछे, उ पचे अठएँ दिन एक ठु पवितर सभा किहे रहेन। 10 सातवें महीने क तेईसवें दिन सुलैमान लोगन क वापस ओनके घरे पठइ दिहस। लोग बड़े खुस रहेन अउर ओनकर हिरदइ आनन्द स भरा रहा काहेकि यहोवा दाऊद, सुलैमान अउर अपने इस्त्राएल क लोगन क बरे बहोत भला रहा।

### यहोवा सुलैमान क लगे आवत ह

11 सुलैमान यहोवा क मन्दिर अउ राजमहल ज पूरा कइ लिहस। सुलैमान यहोवा क मन्दिर अउर अपने आवास में जउन कछू करइ क योजना बनाए रहा ओहमाँ ओका कामयाबी मिली। 12 तब यहोवा सुलैमान क लगे राति में परगट भवा। यहोवा ओहसे कहेस, “सुलैमान, मई तोहार पराथना सुनेउँ ह अउर मई इ जगह क अपने बरे मन्दिर क रूप में भेंट चढ़ावइ बरे चुनेउँ ह। 13 जब मई अकास क बंद करत हउँ तउ बरखा नाही होत या मई टिड्डियन क आदेस देत हउँ कि उ सबइ फसल क खाइ जा या अपने लोगन में बेरामी पठवत हउँ, 14 अउर मोरे नाउँ स गोहरावइ जाइवाले लोग जदि बिनम्र होतेन अउर पराथना करत हीं, अउर मोका हेरत हीं अउर अपने बुरे राहन स दूर हट जात हीं तउ मई सरग स ओनकर सुनब अउर मई ओनके पापन क छिमा करब अउर ओनके देस क नीक कइ देब। 15 अब, मोरी आँखिन खुली अहइँ अउर मोरे कान इ जगह पइ कीन्ह गइ पराथना पइ धियान देइहीं। 16 मई इ मन्दिर क चुनेउँ ह अउर मई एका पवितर किहेउँ ह जेहसे मोर नाउँ हिआँ सदा ही रहइ। हाँ, मोर आँखिन अउर मोर हिरदइ इ मन्दिर में सदा रही।

17 “अब सुलैमान, जदि तू मोरे समन्वा वइसे ही रहब्या जइसे तोहार बाप दाऊद रहा, जदि तू ओन सबहि क पालन करब्या जेनके बरे मई आदेस दिहेउँ ह अउर जदि तू मोर बिधियन अउ नेमन क पालन करब्या। 18 तब मई तोहका सक्तीसाली राजा बनाउब अउर तोहार राज महान होइ। इहइ वाचा अहइ जउन मई तोहरे बाप दाऊद स कीन्ह अहइ। मई ओहसे काहे रहेउँ, ‘दाऊद, तू अपने परिवार में एक ठु अइसा मनई सदा पउब्या जउन इस्त्राएल में राजा होइ।’

19 “किन्तु जदि तू मोरे नेमन अउर आदेसन क नाही मनब्या जेनका मई दिहेउँ ह अउर तू दूसर देवतन क पूजा अउर सेवा करब्या, अउर ओकर समन्वा निहुरब्या, 20 तब मई इस्त्राएल क लोगन क अपने उ देस स बाहेर करब जेका मई ओनका दिहेउँ ह। अउर मई इ मन्दिर क जेका मई आपन नाउँ बरे पवितर बनाएउँ ह अस्वीकार कइ देब। मई इ मन्दिर क सबहि रास्ट्रन बरे मजाक अउर सम्मानहीन बनाइ देब। 21 हर एक मनई जउन एकर पास स गुजरी इ प्रतिष्ठित मन्दिर देखिके चकित होइ जाई। उ पचे कहिहीं, ‘यहोवा अइसा भयंकर काम इ देस अउ इ मन्दिर क संग

काहे किहस?’ 22तब लोग जवाब देईहीं, ‘काहेकि इस्राएल क लोगन यहोवा, परमेस्सर जेकरी आग्या क पालन ओनके पुरखन करत रहेन, ओकरी आग्या क पालन करइ स इन्कार कइ दिहस। उ ही परमेस्सर अहइ जउन ओनका मिस्र क बाहेर लइ आवा। किन्तु इस्राएल क लोग दूसर देवतन क अपनाएस। उ पचे मूर्ति रूप में देवतन क पूजा अउर सेवा किहस। इहइ कारण अहइ कि यहोवा इस्राएल क लोगन पइ ऐतना सब भयंकर घटित कराएस ह।”

### सुलैमान क बसाए नगर

8 यहोवा क मन्दिर क बनावइ अउर आपन महल बनावइ में सुलैमान क बीस बरिस लागेन। 2तब सुलैमान फुन ओन नगरन क बनाएस जउन हूराम ओका दिहस अउर सुलैमान इस्राएल क कछू लोगन क ओन नगरन में रहइ क आग्या दइ दिहस। 3एकरे पाछे सुलैमान सोबा क हमात क गवा अउर ओह पइ अधिकार कइ लिहस। 4सुलैमान रेगिस्ताने में तदमोर नगर भी बनाएस। उ चिजियन क संग्रह क बरे हमात में सबहिं नगर बनाएस। 5सुलैमान ऊँच बेशेरोन अउ निम्म बेरोथोन क नगरन क फुन बनाएस। उ ओन नगरन क सक्तीसाली गढ़ बनाएस। ओन नगरन क मजबूत देवारन अउर फाटकन रहेन अउर फाटकन में छड़न लगे रहेन। 6सुलैमान बालात नगर क फुन बनाएस अउर दूसर नगरन क भी जहाँ उ चिजियन क संग्रह किहस। उ सबहिं नगरन क बनाएस जहाँ रथ रखे गए रहेन तथा जहाँ सबहिं नगरन में घुड़सवार रहत रहेन। सुलैमान यरूसलेम, लबानोन अउर ओन सबहिं प्रदेशन क जहाँ उ राजा रहा, जउन चाहेन बनाएस।

7-8जहाँ इस्राएल क लोग रहत रहेन हुवाँ बहोत स अजनबी बचे रहि गए रहेन। उ पचे हिती, एमोरी, परिब्जी, हिब्वी अउर यबूषी लोग रहेन। सुलैमान ओन अजनबियन क दास-मजदूर होइ बरे मजबूर किहस। उ सबइ लोग इस्राएल क लोगन में स नाहीं रहेन। उ सबइ लोग ओनकर संतान रहेन जउन देस में बचे रहि गए रहेन अउर तब तलक इस्राएल क लोगन क जरिये नस्ट नाहीं कीन्ह गए रहेन। इ अब तलक चलत अहइ। 9सुलैमान इस्राएल क कउनो भी मनई क दास मजदूर बनावइ क मजबूर नाहीं किहस। उ पचे ओकर जोधन, फउज क सेनापतियन, ओकर फउज क मुख्य अधिकारियन, ओकर रथन क सेनापतियन अउर सारथियन क सेनापति रहेन। 10अउर इस्राएल क कछू लोग सुलैमान क महत्त्वपूर्ण अधिकारियन क प्रमुख रहेन। लोगन क निरीच्छण करइवाले ढाई सौ प्रमुखन रहेन।

11सुलैमान दाऊद क नगर स फिरौन क बिटिया क उ महल में लिआवा जेका उ ओकरे खातिर बनाए रहा। सुलैमान कहेस, “मोर मेहरारू राजा दाऊद क महल में नाहीं रहि सकत काहेकि जउने जगहन पइ करार क सन्दूख रहा होइ, उ सबइ जगह पवितर अहइ।”

12तब सुलैमान यहोवा क होमबलि यहोवा क वेदी पइ चढ़ाएस। सुलैमान उ वेदी क मन्दिर क ओसारे क समन्वा बनाएस। 13सुलैमान हर एक दिन मूसा क आदेस क अनुसार बलि चढ़ाएस। इ बलि सबित क क दिन नवचन्द्र उत्सव क

अउर तीन वार्षिक पर्वन क दीन्ह जाइ क रही। इ सबइ तीन वार्षिक पर्व अखमीरी रोटी क पर्व सप्ताहन क पर्व अउर आस्रय क पर्व रहेन। 14सुलैमान अपने बाप दाऊद क निर्देसन क पालन किहस। सुलैमान याजकन क वर्ग हुवाँ सेवा करइ बरे चुनेस। सुलैमान लेवीबंसियन क भी ओनके कार्य क बरे चुनेस। लेवीबंसियन परार्थना में अगुवाइ करत रही अउर मन्दिर में जउन कछू रोज रोज कीन्ह जाब होत रहा ओनमाँ याजकन क मदद करत रहा। सुलैमान दुआर पालन क चुनेस जेनके समूहन हर दुआर पइ सेवा करब रही। परमेस्सर क मनई दाऊद क निर्देसन क अनुसार इ सबइ काम कीन्ह गवा रहेन। 15इस्राएल क लोग सुलैमान क जरिये याजकन अउर लेवीबंसियन क दीन्ह गए निर्देसन क न बदलेस, नाहीं ओनकर उल्लंघन किहस। उ पचे कउनो भी निर्देस में वइसे भी परिवर्तन नाहीं किहन जइसे उ पचे कीमती चिजियन क रखइ में करत रहेन।

16सुलैमान क सबहिं कारज पूरे होइ गएन। यहोवा क मन्दिर क आरम्भ होइ स ओकर पूरे होइ क दिन तलक योजना ठीक बनी रही। इ तरह यहोवा क मन्दिर पूरा भवा।

17तब सुलैमान एष्योनगेबेर अउर एलोट नगरन क गवा। उ पचे नगर एदोम प्रदेश में लाल सागर क किनारा में बसा रहेन। 18हूराम सुलैमान क जहाज पठएस। हूराम क उ मनइयन जउन समुदर में जहाज चलाई में कुसल रहेन जहाज क चलावत रहेन। हूराम क मनई सुलैमान क सेवकन क संग ओपीर गएन अउर सत्रह टन सोना लइके राजा सुलैमान क लगे लउटेन।

### सीबा क राही सुलैमान क हिआँ आवत ह

9 सीबा क रानी सुलैमान क जस सुनेस। उ यरूसलेम में कठिन सवालन स सुलैमान क परिच्छा लेइ आइ। सीबा क रानी अपने संग एक लोगन क बड़ा समूह लइके आइ रही। ओकरे पास ऊँट रहेन जेन पइ मसालन, बहोत जिआदा सोना अउ कीमती पाथर लदे रहेन। उ सुलैमान क लगे आइ अउर उ सुलैमान स बातन किहस। ओका सुलैमान स अनेक सवाल पूछब रहेन। 2सुलैमान ओकरे सबहिं सवालन क उत्तर दिहस। सुलैमान क बरे व्याख्या करइ या जवाब देइ बरे कछू भी बहोत कठिन नाहीं रहा। 3सीबा क रानी सुलैमान क बुद्धिमानी अउ ओकर बनाए महल क लखेस। 4उ भोजन क निरिच्छन किहस जउन सुलैमान क मेज पई परोसा जात रहा। उ लखेन कि अधीकारियन अउर नउकर कइसा कार्य करत अहइँ अउर उ पचे कइसा वस्त्र पहिरे रखे अहइँ, उ लखेस कि ओकर दाखरस पिआवइवाले सेवक कइसे कार्य करत अहइँ अउर उ पचे कइसे वस्त्र पहिर रखे अहइँ। उ यहोवा क मन्दिर क ओर जात भवा जुलूस क लखेस। जब सीबा क रानी एन सबहिं चिजियन क लखेस तउ माना कि ओकर मुँह क बोली बन्द होइ गवा। 5तब उ राजा सुलैमान स कहेस, “मई अपने देस में तोहरे महान कार्यन अउर तोहार बुद्धिमानी क बारे में जउन कहानी सुनेउँ ह। उ सबइ सच अहइ! 6ओका एन कहानियन पइ तब तलक बिस्सास नाहीं होत रहा जब तलक मई आई नाहीं अउर अपनी आँखिन स लखेउँ नाहीं।

ओह! तोहरी बुद्धिमानी क आधा भी मोहसे नहीं कहा गवा रहा। जउन कछु मई सुनेउँ तू उ सबइ स जियादा महान अहइ। 7तोहार मेहरुअन अउर तोहार अधिकारी बहोत भाग्यसाली अहई। उ पचे तोहार गियान क बातन तोहार सेवा करत भए सुन सकत हीं। 8तोहरे परमेस्सर यहोवा क बड़कई होइ। उ तोह पइ खुस अहइ अउर उ तोहका अपने सिंहासन पइ, परमेस्सर यहोवा बरे, राजा बनई क बइठाएस ह। तोहार परमेस्सर इस्त्राएल स पिरेम करत ह अउर इस्त्राएल क मदद सदा ही करत रही। इहइ कारण अहइ कि यहोवा तोहका इस्त्राएल क राजा बनाएस ह कि तू निआव अउर धार्मिकता क बनाए राख।”

9तब सीबा क रानी राजा सुलैमान क 4,140 किलोग्राम सोना, बहोत स मसाला अउर कीमती पाथर दिहस। कउनो एताना नीक मसाला राजा सुलैमान क नहीं दिहस जेतना नीक रानी सीबा दिहस।

10हूराम क नउकर अउर सुलैमान क नउकर ओपीर स सोना लइ आएन। उ पचे चन्दन क काठ अउर बहुमुल्य रत्न पाथर भी लइ आएन। 11राजा सुलैमान यहोवा क मन्दिर अउर महल क सीढियन क बरे चन्दन क काठे क उपयोग किहस। सुलैमान चन्दन क काठे क उपयोग गायकन क बरे वीणा अउर तम्बूरा बनावइ क बरे भी किहस। यहूदा देस में चन्दन क काठे स बनी ओन जइसी सुन्नर चिजियन कउनो कवहुँ लखे नहीं रहा।

12जउन कछु भी सीबा देस क रानी राजा सुलैमान स माँगस, ओका उ दिहस। जउन उ दिहस, उ ओहसे जियादा रहा जउन उ राजा सुलैमान बरे लिआइ रहीं। ओकरे पाछे उ अपने सेवक अउर सेविकाओं क संग बिदा भइ। उ अपने देस लउट गइ।

### सुलैमान क खूब धनदौलत

13एक बरिस में सुलैमान जेतना सोना पाएस, ओकर वजन पचीस टन रहा। 14बड़पारी अउर सौदागर सुलैमान क लगे अउर जिआदा सोना लाएन। अरब क सबहिं राजा अउर प्रदेशन क सासक भी सुलैमान क बरे सोना चाँदी लाएन। 15राजा सुलैमान सोने क पत्तर क दुइ सौ बरा ढारन बनाएस। लगभग छः सौ सेकेल पीटा सोना हर एक ढार क बनावइ में उपयोग में आवा। 16सुलैमान तीन सौ नान्ह ढारन भी सोने क पत्तर क बनाएस। लगभग तीन सौ सेकेल सोना हर एक ढार क बनावइ में उपयोग में आवा रहा। राजा सुलैमान सोना क ढारन क “लबानोन क बन महल” में रखेस।

17राजा सुलैमान एक बिसाल सिंहासन बनावइ क बरे हाथी दाँत क उपयोग किहस। उ सिंहासने क निखालिस सोना स मढ़ेस। 18सिंहासने पइ चढ़इ क छः सीढियन रहिन अउर एकर एक टु पद पीठ रहा। उ सोने क बना रहा। सिंहासने में दुइनउँ कइँती भुजन क आराम देइ क बरे बाजू लगी एक-एक सेर क मूर्ती खड़ी रही। 19हवों छः सीढियन स लगे बगल में बारह सेरन क मूर्तियन खड़ी रहिन। हर सीढी क हर कइँती एक सेर रहा। इ तरह क सिंहासन कउनो दूसर राज में नहीं बना रहा। 20राजा सुलैमान क

सबहिं पिअइ क पियालन सोना क बने रहेन। लबानोन वन महल क सबहिं हर रोज क चिजियन निखालिस सोना क बनी रहिन। सुलैमान क समइ में चाँदी कीमती नहीं समुझी जात रही। 21राजा सुलैमान क लगे जहाज रहेन जउन तसीस क जात रहेन। हूराम क आदमी सुलैमान क जहाजन क चलावत रहेन। हर तीसरे बरीस जहाज तसीस स सोना, चाँदी, हाथी-दाँत, बनार अउर मोर लइके सुलैमान क लगे लउटन रहेन।

22राजा सुलैमान धन अउर बुद्धि दुइनउँ में संसार क कउनो भी राजा स बड़ा होइ गवा। 23संसार क सारे राजा सुलैमान क लखइ बरे आइतेन अउर ओकरे बुद्धिमानी क सब्दन जउन परमेस्सर ओका दिहस ह सुनतेन। 24हर बरिस उ पचे राजा सुलैमान क भेंट लिआवत रहेन। उ पचे चाँदी सोना क चिजियन, ओढ़ना, कवच, मसालन, घोड़न अउर खच्चर लिआवत रहेन।

25सुलैमान क लगे ओकर घोड़न अउर रथन क रखइ बरे चार हजार अस्तबल रहेन। ओकरे लगे बारह हजार सारथी रहेन। सुलैमान ओनका आपन रथन क नगरन में रखत रहा अउर कछु क यरूसलेम में अपने लगे रखत रहा। 26सुलैमान फरात नदी स लगातार पलिस्ती लोगन क देस तलक अउर मिस्त्र क सीमा तलक क राजा लोगन क सम्राट रहा। 27राजा सुलैमान क लगे बहोत स चाँदी क पाथर समान्य पाथर जइसा अउर बहोत सारा देवदार काठ क पहाड़ी देस में गूलर क बृच्छन जइसा रहेन। 28लोग सुलैमान क बरे मिस्त्र अउर दूसर सबहिं देसन स घोड़न लिआवत रहेन।

### सुलैमान क मउत

29सुरू स लइके अन्त तलक सुलैमान अउर जउन कछु किहस उ नातान नबी क लेखन, सीलो क अहिय्याह क भविस्सबाणियन अउर इहो दर्सी क दर्सनन में अहइ। इहो एक दर्सी रहा जउन नबात क पूत यारोबाम क बारे में भविस्सबाणी किहस। 30सुलैमान यरूसलेम में पूरे इस्त्राएल क राजा चालीस बरिस तलक रहा। 31तब सुलैमान अपने पुरखन क संग बिस्त्राम करइ गवा। लोगन ओका ओकरे बाप दाऊद क नगर में दफनाएन। सुलैमान क पूत रहूबियाम सुलैमान क जगह नवा राजा भवा।

### रहूबियाम बेवकूपी क काम करत ह

10 रहूबियाम सकेम नगर क गवा काहेकि इस्त्राएल क सबहिं लोग ओका राजा बनावइ बरे हुवई गएन। 2नाबात क पूत यारोबाम मिस्त्र में रहा काहेकि उ राजा सुलैमान क हिआँ स पराइ गवा रहा। किन्तु यारोबाम सुनेस कि सुलैमान मरि गवा अउर रहूबियाम नवा राजा होइ जात अहइ। एह बरे यारोबाम मिस्त्र स लउट आवा। 3इस्त्राएल क लोग यारोबाम क अपने संग रहइ क बरे बोलाएस। तब यारोबाम अउर इस्त्राएल क सबहिं लोग रहूबियाम क हिआँ गएन। उ पचे ओहसे कहेन, “रहूबियाम, 4तोहरे बिना हम लोगन क जिन्नगी क कस्टकर बनाएस। उ भारी वजन लइ

चलइ क नाई रहा। उ वजन क हल्का करा तउ हम तोहार सेव करब।”

5रहूबियाम ओनसे कहेस, “तीन दिन पाछे लउटिके मोरे लगे आवा।” एह बरे लोग चले गएन।

6तब राजा रहूबियाम ओन बुजुर्ग लोगन स बातन किहस जउने पहिले ओकरे बाप क सेवा किहे रहेन। रहूबियाम ओनसे कहेस, “आप एन लोगन स का कहइ बरे सलाह देत ही?” 7बुजुर्ग रहूबियाम स कहेन, “जदि तू ओन लोग क बरे दयालु अहा अउर ओनका खुस करत अहा अउ ओहसे नीक बातन कहत अहा तउ उ पचे तोहार सेवा सदा ही करिहीं।”

8मुला रहूबियाम बुजुर्गन क दीन्ह सलाह क अंगीकार नाहीं किहस। रहूबियाम ओन जुवकन स बात किहस जउन ओकरे संग जुवा रहेन अउर ओकर सेवा करत रहेन। 9रहूबियाम ओनसे कहेस, “तू लोग का सलाह देत अहा जेका मई ओन लोगन स कहउ? उ पचे मोहसे अपने काम क हल्का करइ क कहे ह अउर उ पचे चाहत ही कि मई अपने बाप क जरिये ओन पइ डाले गए वजन क कछू कम करउँ।”

10तब ओन जुवकन जउन रहूबियाम क संग जुवा भए रहेन, ओहसे कहेन, “जउन लोगन तोहसे बातन किहन ओनसे तू इ कहा। लोगन तोहसे कहेन, ‘तोहार बाप हमरी जिन्गी क कस्टकर बनाएन रहेन। इ भारी वजन लइ चलइ क नाई रहा। मुला हम चाहित ह कि तू हम लोगन क वजन क कछू हल्का करा।’ किन्तु रहूबियाम, तोहका इ इहइ ओन लोगन स कहइ चाही। ओनसे कहा, ‘मोर नान्ह अँगरी भी मोरे बाप क करिहाउँ स मोटी होइ। 11मोर बाप तोह पइ भारे बोझा लादेन। मुला मई उ बोझा क बढ़ाउव। मोर बाप तोहका कोड़ा लगावइ क सजा दिहे रहेन। मई अइसे कोड़ा लगावइ क सजा देब जेकरे छोर पइ तेज धातु क टूका अहई।”

12राजा रहूबियाम लोगन स कहे रहा: “तीसरे दिन लउटिके आवा।” एह बरे तीसरे दिन यारोबाम अउ सब इस्त्राएली जनता राजा रहूबियाम क लगे आएन। 13तब राजा रहूबियाम ओनसे कठोरता स बातन किहस। राजा रहूबियाम बुजुर्ग लोगन क सलाह न मानेस। 14राजा रहूबियाम लोगन स वइसे ही बात किहस जइसे जुवकन सलाह दिहे रहेन। उ कहेस, “मोर बाप तोहरे बोझ क भारी किहे रहा, किन्तु मई ओका अउर जिआदा भारी करब। मोर बाप तोह पइ कोड़न लगावइ क सजा दिहे रहेन, किन्तु मई अइसे कोड़न लगावइ क सजा देब जेनकर छोर तेज धातु क टूकन होइहीं।” 15इ तरह राजा रहूबियाम लोगन क एक न सुनेन। एकर कारण इ रहा कि उ परमेस्सर रहा जउन इ किहेस ह। यहोवा आपन बचन क पूरा करइ चाहत ह जउन उ सीलो क अहिय्याह क जरिये नबात क पूत यारोबाम स किहे रहा।

16इस्त्राएल क लोग लखेन कि राजा रहूबियाम ओनकर एक नाहीं सुनत। उ पचे राजा स कहेन, “का हम दाऊद क पखिरे क अंग अही? नाहीं! का हम क यिसै क कउनो भुईया मिलइ क अहइ? नाहीं! एह बरे इस्त्राएलियन क हम लोगन क सिबिर में वापिस जाइ द्या। दाऊद क पूत क

ओकरे अपने लोगन पइ हुकूमत करइ देई।” तब इस्त्राएल क सबहिं लोग अपने सिबिरन में लउटि गएन। 17किन्तु इस्त्राएल क कछू अइसे लोग रहेन जउन यहूदा नगर में रहत रहेन अउर रहूबियाम ओनकर राजा रहा।

18हदोराम काम करइ क बरे मजबूर कीन्ह जाइवाले लोगन क अधीच्छक रहा। रहूबियाम ओका इस्त्राएल क लोगन क लगे पठाएस। किन्तु इस्त्राएल क लोग हदोराम पइ पाथर लोकाएन अउर ओका मार डाएन। तब रहूबियाम भागा अउर अपने रथ में कूद पड़ा अउ बच निकरा। उ पराइके यरूसलेम गवा। 19उ समइ स लइके अब तलक इस्त्राएली दाऊद क परिवार क खिलाफ होइ गएन ह।

**1** जब रहूबियाम यरूसलेम आवा, उ एक लाख अस्सी हजार सर्वोत्तम जोधन क बटोरेस। उ एन जोधन क यहूदा अउ बिन्यामीम क परिवार समूहन स बटोरेस। उ एनका इस्त्राएल क खिलाफ लइइ बरे तइयार किहेस जेहसे उ राज क रहूबियाम क वापस लउटाइ सकइ। 2किन्तु यहोवा क सँदिस समायाह क लगे आवा। समायाह परमेस्सर क मनई रहा। यहोवा कहेस, 3“समायाह यहूदा क राजा, सुलैमान क पूत रहूबियाम स बातन करा अउर यहूदा अउ बिन्यामीन में रहइवाले सबहिं इस्त्राएल क लोगन स बातन करा। 4ओनसे कहा, यहोवा इ कहत ह: ‘तोहका अपने भाइयन क खिलाफ नाहीं लइइ चाही। हर एक मनई अपने घर लउटि जाइ। मई ही अइसा होइ दिहेउँ ह।” एह बरे राजा रहूबियाम अउर ओकर फउज यहोवा क सँदिस मानेस अउर उ पचे लउटि गएन। उ पचे यारोबाम पइ हमला नाहीं किहन।

### रहूबियाम यहोवा क सक्तीसाली बनावत ह

5रहूबियाम यरूसलेम में रहइ लाग। उ हमलन क खिलाफ रच्छा बरे यहूदा में सुदृढ़ नगर बनाएस। 6उ बेतलेहेम, एताम, तकौआ, 7बेत्सूर, सोको, अदुल्लाम, 8गत, मारेसा, जीप, 9अदौरैम, लाकीस, अजेका, 10सोरा, अय्यालोन, अउर हेब्रोन नगरन क मरम्मत कराएस। यहूदा अउ बिन्यामीन में इ सबइ नगर मजबूत बनाए गएन। 11जब रहूबियाम ओन नगरन क मजबूत बनाइ लिहस तउ ओनमाँ सेनापति रखेस। उ ओन नगरन में भोजन, तेल अउर दाखरस क पूर्ति क व्यवस्था किहस। 12रहूबियाम ढार अउ भालन भी हर एक नगर में रखेस अउर ओनका बहोत सक्तीसाली बनाएस। रहूबियाम यहूदा अउ बिन्यामीन क लोगन अउर नगरन क अपने अधिकार में रखेस।

13पूरे इस्त्राएल क याजक अउ लेवीबंसी रहूबियाम स सहमत रहेन अउर उ पचे ओकरे संग होइ गएन। 14लेवी बंसियन अपनी घासवाली भुइयाँ अउर आपन खेत छोड़ दिहन अउर उ पचे यहूदा अउ यरूसलेम आइ गएन। लेवीबंसियन इ एह बरे किहेन कि यारोबाम अउर ओकर पूतन ओनका यहोवा क याजक क रूप में सेवा करावइ क अनुमति देइ स इन्कार कइ दिहस। 15यारोबाम अपने ही याजकन क हुवाँ ऊँची जगहन पइ सेवा करइ बरे नियुक्त किहस जहाँ उ बोकनन अउ बछवन क ओन मूरतियन क स्थापना किहस जेनका उ बनाए रहा। 16जब लेवीबंसियन इस्त्राएल क तजि

दिहन तब इस्त्राएल क परिवार समूह क उ सबइ लोग जउन इस्त्राएल क यहोवा परमेस्सर क बरे बिस्सास जोगग रहेन, यरूसलेम मँ यहोवा, अपने बापन क परमेस्सर क बलि चढ़ावइ आपन। 17ओन लोग यहूदा क राज क सक्तीसाली बनाएस अउर उ पचे सुलैमान क पूत रहूबियाम क तीन बरिस तलक समर्थन दिहन। उ पचे अइसा करत रहेन काहेकि इ समइ मँ उ पचे वइसे रहत रहेन जइसे दाऊद अउ सुलैमान रतह रहेन।

### रहूबियाम क परिवार

18रहूबियाम महलत स बियाह किहेस। ओकर बाप यरीमोत रहा। ओकर महतारी अबीहैल रही। यरीमोत दाऊद क पूत रहा। अबीहैल एलीआब क बिटिया रही अउर एलीआब यिसै क पूत रहा। 19महलत स रहूबियाम क इ सबइ पूत पइदा भएन: यूस, समर्याह अउर जाहम। 20तब रहूबियाम माका स बियाह किहेस। माका अबसलोम क पोती रही अउर माका स रहूबियाम क इ सबइ बच्चन भएन: अबिय्याह, अते, जीजा अउर सलोमीत। 21रहूबियाम माका स सबहिं दूसर मेहररुअन अउ दासियन स जियादा पिरेम करत रहा। माका अबसालोम क पोती रही। रहूबियाम क अट्टारह मेहररुअन अउ साठ रखैल रहिन। रहूबियाम अट्टाईस पूतन अउ साठ बिटियन क बाप रहा।

22रहूबियाम अपने भाइयन मँ माका क पूत अबिय्याह क प्रमुख चुनेस। रहूबियाम इ एह बरे किहेस काहेकि उ अबिय्याह क राजा बनावइ क योजना बनाएस। 23रहूबियाम इ बुद्धिमानी क काम अपने पूतन क यहूदा अउर बिन्यामीन क पूरा प्रान्तन मँ अउर हर एक सक्तीसाली नगर मँ फैइलाइ कइ क किहेस। उ अपने पूतन क बहोत जियादा भोजन दिहेस अउर ओकरे बरे मेहररुअन क खोज किहेस।

### मिस्री राजा सीसक क यरूसलेम पइ हमला

12 रहूबियाम एक सक्तीसाली राजा होइ गवा। अपने राज क सक्तीसाली बनाइ क पाछे उ अउ यहूदा क सबहिं लोग यहोवा क नेम क पालन करइ क बन्द कइ दिहन। 2रहूबियाम क राजकाल क पाँचवे बरिस सीसक यरूसलेम पइ हमला किहेस। सीसक मिस्र क राजा रहा। इ एह बरे भवा कि रहूबियाम अउ यहूदा क लोग यहोवा क बरे निष्ठावान नाहीं रहेन। 3सीसक क लगे एक हजार दुई सौ रथ, साठ हजार घुड़सवार, अउर एक फउज रही जेका कउनो गन नाहीं सकत रहा। सीसक क फउज मँ लूबी, सुक्किथ्यी अउर कूसी फउजी रहेन। 4सीसक यहूदा क सक्तीसाली नगरन क पराजित कइ दिहेस। तब सीसक अपनी फउज क यरूसलेम लिआवा।

5तब समायाह नबी रहूबियाम अउ यहूदा क प्रमुखन क लगे आवा। यहूदा क उ सबइ प्रमुख यरूसलेम मँ बटुरे रहेन काहेकि उ पचे सबहिं सीसक स ससान रहेन। समायाह रहूबियाम अउ यहूदा क प्रमुखन स कहेस, “यहोवा जउन कहत ह, उ इ अहइ: ‘रहूबियाम, तू अउर यहूदा क लोग मोका तजि दिहा ह अउर मोरे नेमन क पालन करइ स

इन्कार कइ दिहा ह। एह बरे मई तोहका अपनी मदद क बिना सीसक क सामना करइ क छोड़बा।” 6तब यहूदा क प्रमुखन अउर राजा रहूबियाम पछतावा करत भए अपने क विनम्र किहेस अउर कहेस, “यहोवा नियावी अहइ।”

7यहोवा लखेस कि राजा अउर यहूदा क प्रमुखन अपने आप क विनम्र बनाएन ह। तब तहोवा क सँदेसा समायाह क लगे आवा। यहोवा समायाह स कहेस, “राजा अउर लोग अपने क विनम्र किहेन ह, एह बरे मई ओनका नस्त नाहीं करब बल्कि मई ओनका हाली ही बचाउब। मई सीसक क उपयोग यरूसलेम पइ आपन क्रोध उतारइ क बरे नहीं करब। 8किन्तु यरूसलेम क लोग सीसक क सेवक होइ जइहीं। इ होई एह बरे कि उ पचे सीख सकई कि मोर सेवा करब दूसर रास्ट्रन क राजा लोगन क सेवा करइ स अलग अहइ।”

9मिस्र क राजा सीसक यरूसलेम पइ हमला किहेस अउर यहोवा क मन्दिर मँ जउन खजाना रहेन, ओका लइ गवा। अउर उ उ सबइ खजाने क भी लइ लिहेस जउन राजा क महल मँ रहेन। उ सोने क ढारन क भी लिहेस जेनका सुलैमान बनाए रहा। 10राजा रहूबियाम सोने क ढारन क जगह पइ काँसे क ढारन बनाएस। रहूबियाम ओन सेनापतियन क जउन राजमहल क दुआरन क रच्छा क जिम्मेदार रहेन, काँसे क ढारन दिहेस। 11जब राजा यहोवा क मन्दिर मँ जात तहा तउ रच्छक काँसे क ढारन बाहेर निकारत रहेन। ओकरे पाछे उ पचे काँचे क ढारन क रच्छक घर मँ वापस रखत रहेन।

12जब रहूबियाम पछतावा किहेने अउर अपने क विनम्र कइ लिहेस तउ यहोवा अपने क्रोध क ओह पइ रोकि दिहेस। एह बरे यहोवा रहूबियाम क पूरी तरह नस्त नाहीं किहेस। यहूदा मँ कछू अच्छाई बची रही।

13राजा रहूबियाम यरूसलेम मँ अपने क सुदृढ़ राजा बनाइ लिहेस। उ उ समइ इकतालीस बरिस क रहा, जब राजा बना। रहूबियाम यरूसलेम मँ सत्रह बरिस तलक राजा रहा। यरूसलेम उ नगर रहा जेका यहोवा इस्त्राएल क सारे परिवार समूह मँ स चुने रहा। यहोवा यरूसलेम क अपने नाउँ स्थापित करइ बरे चुनेस। रहूबियाम क महतारी नामा रही। जउन कि अम्मोन देस क रही। 14रहूबियाम बुरी चिजियन किहेस काहेकि उ यहोवा क आग्या क पालन करइ बरे अपने हिरदइ मँ निहचइ नहीं किह रहेन।

15सबइ चिजियन जउन रहूबियाम आपन हुकूमत मँ सुरू स आखीर तलक किहेस उ नबी समायाह अउर सीर (दर्सी) इदो क किताब मँ लिखा गवा ह। उ पचे परिवारिक इतिहास क बारे मँ अउर यहूबियाम अउ यहूबियाम अउ यहोबाम जब तलक हुकुमत किहेने ओकर बीच होइवाले जुद्ध क बारे मँ लिखेन। 16रहूबियाम अपने पुरखन क संग बिस्त्राम किहेस। रहूबियाम क दाऊद नगर मँ दफनावा गवा। रहूबियाम क पूत अबिय्याह नवा राजा भवा।

### यहूदा क राजा

13 जब राजा यारोबाम इस्त्राएल क राजा क रूप मँ अट्टारहवें बरिस मँ रहा अबिय्याह यहूदा क नवा

राजा बना। 2अबिव्याह यरूसलेम में तीन बरिस तलक राजा रहा। गिबा नगर क ऊरीएल क बिटिया, मीकायाह अबिव्याह क महतारी रही। अउर हुवाँ अबिव्याह अउर यारोबाम क बीच जुद्ध चलत रहा। 3अबियाह क फउज में चार लाख वीर सैनिक रहेन। अबियाह जुद्ध बरे आपन फउज में गएन। यारोबाम अबिव्याह क खिलाफ जुद्ध बरे तइयारी किहस। ओकरे लगे आठ लाख वीर सैनिक रहेन।

4तब अबिव्याह एप्रैम क पर्वतीय पहेँटा में समारैम पर्वत पइ खड़ा भवा। अबिव्याह कहेस, “यारोबाम अउर सारे इस्राएल मोर बात सुना। 5तू लोगन क जानइ चाही कि यहोवा, इस्राएल क परमेस्सर दाऊद अउर ओकरी सन्तानन क इस्राएल सासन करइ क अधिकार दिहस ह। यहोवा दाऊद क इ अधिकार सास्वत करार क संग दिहस। 6किन्तु यारोबाम अपने सुआमी क खिलाफ होइ गवा। यारोबाम जउन नबात क पूत रहा, दाऊद क पूत सुलैमान क अधिकारियन में स एक रहा। 7तब निकम्मे, बुरे मनइयन यारोबाम क मीत होइ गएन अउर यारोबाम अउर उ सबइ बुरे मनइयन सुलैमान क पूत रहूबियाम क खिलाफ होइ गएन। रहूबियाम जुवक रहा अउर ओका अनुभव नाहीं रहा। एह बरे रहूबियाम यारोबाम अउर ओकरे बुरे मीतन क रोकने न सका।

8“तू लोग परमेस्सर क राज, जउन दाऊद क पूतन क जरिये सासित अहइ, हरावइ क योजना बनाया ह। तू लोगन क गनती बहोत अहइ अउर यारोबाम क तोहरे बरे बनावा गवा सोने क बछवा तोहार इस्सर अहइ। 9तू लोग हारून क संतानन यहोवा क याजकन अउ लेवीबंसियन क बाहेर फेंकि दिहस ह। तू पचे पृथ्वी क दूसर देसन क समान अपने याजकन क चुन्या ह। तब तउ कउनो भी मनई जउन एक जुवक बर्घा अउर सात ठु भेड़न लिआवइ, ओन ‘अइसन देवतन क जउन परमेस्सर ह ही नाहीं’ क सेवा करइवाला याजक बन सकत ह।

10“किन्तु जहाँ तलक हमार बात अहइ यहोवा हमार परमेस्सर अहइ। हम यहूदा क निवासी लोग यहोवा क आग्या पालन स इन्कार किहा नाहीं ह। हम लोग ओका तजा नाहीं ह। जउन याजक यहोवा क सेवा करत हीं, उ पचे हारून क सन्तान अहइँ अउर लेवीबंसी यहोवा क सेवा करइ मैं याजकन क मदद करत हीं। 11उ पचे होमबलि चढ़ावत हीं अउर धूपे क सुगन्धि यहोवा क हर भिंसारे साँझि बारत हीं। उ पचे मन्दिर में बिसेस मेज पइ रोटियन कतारन में रखत भी अहइँ अउर उ पचे सोना क डीबट पइ रखे भए दीपकन क देख भाल करत हीं ताकि हर साँझि क उ प्रकास क संग चलइ। हम लोग यहोवा, अपने परमेस्सर क सेवा सावधानी क संग करित ह। किन्तु तू लोग ओका तजि दिहा ह। 12खुद परमेस्सर हम लोगन क संग अहइ। उ हमार सासक अहइ अउर ओकर याजक हमरे संग अहइँ। परमेस्सर क याजक आपन तुरही तोहका जगावइ अउर तोहका ओकरे लगे आवइ क उत्साहित करइ क बरे फूँकत हीं। ऐ इस्राएल क लोगो, अपने पुरखन क यहोवा, परमेस्सर क खिलाफ जिन लड़ा। काहेकि तू कामयाब नाहीं होव्या।”

13किन्तु यारोबाम फउजियन क एक टुकड़ी क चुपके चुपके गुप्त रूप स अबिव्याह क फउज क पाछे पठएस, इ तरह स जब यारोबाम क फउज अबिव्याह क फउज क समन्वा रही तब यारोबाम क फउज क गुप्त फउजी अबिव्याह क फउज क पाछे रही। 14जब अबिव्याह क यहूदा क फउजियन चारिहुँ कइँती लखेन तउ उ पचे यारोबाम क फउज क आगे अउर पाछे स हमला करत पाएन। तउ यहूदा क लोग यहोवा क जोर स गोहराएन अउर याजकन तुहियन बजाएन। 15तब अबिव्याह क फउज क लोग चिचियाएस। जब यहूदा क लोग चिचियाएस तउ परमेस्सर यारोबाम क फउज के हराइ दिहस। यारोबाम क इस्राएल क सारी फउज क अबिव्याह क यहूदा क फउज क जरिये हराइ दीन्ह गइ। 16इस्राएल क लोग यहूदा क लोगन क समन्वा भाग पराइ गएन। परमेस्सर यहूदा क फउज क जरिये इस्राएल क फउज क हरावइ दिहस। 17अबिव्याह क फउज इस्राएल क फउज क बुरी तरह हराएस अउर इस्राएल क पाँच लाख उत्तिम फउज मारे गएन। 18इ तरह उ समइ इस्राएल क लोग पराजित अउर यहूदा क लोग बिजयी भएन। यहूदा क फउज बिजयी भइ काहेकि उ अपने पुरखन क परमेस्सर, यहोवा पइ निर्भर रही।

19अबियाह क फउज यारोबाम क फउज क पाछा किहस। अबियाह क फउज यारोबाम स बेतेल, यसाना अउ एपोन नगरन पइ कब्जा कइ लिहस। उ पचे ओन नगरन अउर ओनके आस पास क नान्ह गाँवन पइ अधिकार कइ लिहस।

20यारोबाम जियादा सक्तीसाली फुन कबहुँ नाहीं भवा जब तलक अबिव्याह जिअत रहा। यहोवा यारोबाम क मार डाएस। 21किन्तु अबिव्याह सक्तीसाली होइ गवा। उ चौदह मेहररुअन स बियाह किहस अउर उ बाईस पूतन अउ सोरह बिटियन क बाप रहा। 22दूसर जउन कछू अबिव्याह किहस, उ इद्दो नबी क किताबन में लिखा अहइ।

**14** अबिव्याह अपने पुरखन क संग बिस्त्राम किहस। लोगन ओका दाऊद नगर में दफनाएन। तब अबिव्याह क पूत आसा अबिव्याह क जगह पइ नवा राजा भवा। आसा क समइ मैं देस मैं दस बरिस सान्ति रही।

### यहूदा क राजा आसा

2आसा उहइ काम किहस जउन यहोवा ओकर परमेस्सर क समन्वा अच्छा अउ ठीक रहा। 3आसा ओन विचित्र वेदियन क हटाइ दिहस जेनकर उपयोग मूरतियन क पूजा क बरे होत रहा। आसा ऊँच जगहन क हटाइ दिहस अउर पवित्र पाथरन क बर्बाद कइ दिहस अउर आसा असेरा खम्भन क तोर डाएस। 4आसा यहूदा क लोगन क ओनकइ पुरखन क यहोवा परमेस्सर क अनुसरण करइ क आदेस दिहस। अउ आसा लोगन क यहोवा क नेमन अउ आदेसन क पालन करइ क आदेस दिहस। 5आसा ऊँची जगहन क अउर सुगन्धि क वेदियन क यहूदा क सबहिं नगरन स हटाएस। इ तरह जब आसा राजा रहा, राज सान्ति रहा। 6आसा यहूदा मैं सान्ति क समइ सक्तीसाली नगर बनाएस।

आसा एन दिनन जुद्ध स मुक्त रहा काहेकि यहोवा ओका सान्ति दिहस।

7आसा यहूदा क लोगन स कहेस, “हम पचन क नगरन क निर्माण अउ एनके चारिहूँ कइँती चरहदीवार बनावइ द्या। हम गुम्बद, दुआर अउ दुआसन मँ छड़न लगावइँ। हम पचन क तब तलक करइ द्या जब तलक इ देस हमार अहइ। इ हमार देस अहइ काहेकि हम लोग अपने यहोवा क अनुसरण किहा ह। उ हम लोगन क सब कइँती स सान्ति दिहस ह।” एह बरे उ पचे इ सबइ बनाएस अउर उ पचे सफल भएन।

8आसा क लगे यहूदा क परिवार समूह स तीन लाख अउर बिन्यामीन क परिवार समूह स दुइ लाख अस्सी हजार फउज रही। यहूदा क मनइयन बड़ी ढारन अउर भालन लइके चलत रहेन। बिन्यामीन क मनइयन नान्ह ढारन अउ धनुस स चलइवाले बाण लइ चलत रहेन। उ पचे सबहि बलवान अउर साहसी जोधा रहेन।

9जब जेरह आसा क फउज क खिलाफ आवा। जेरह कूस द रहा। जेरह क फउज मँ दस लाख मनई अउर तीन सौ रथ रहेन। जेरह क फउज मारेसा नगर तलक गइ। 10आसा जेरह क खिलाफ लइइ बरे गवा। आसा क फउज मारेस क निअरे सापता घाटी मँ जुद्ध क बरे तइयार भइ।

11आसा यहोवा परमेस्सर क गोहराएस अउर कहेस, “यहोवा, तू केवल तू ही बलवान लोगन क खिलाफ कमजोर लोगन क मदद कइ सकत ह। हे मोर यहोवा परमेस्सर हमार मदद करा। हम तोह पइ निर्भर अही। हम तोहरे नाउँ पइ इ बिसाल फउज स जुद्ध करित ह। हे यहोवा, तू हमार परमेस्सर अहा। अपने खिलाफ कउनो क जीतइ न द्या।”

12तब यहोवा यहूदा कइँती स आसा क फउज क उपयोग कूस क फउज क पराजित करइ बरे किहस अउर कूस क फउज भाग खड़ी भइ। 13आसा क फउज कूस क फउज क लगातार गारार नगर तलक पाछा किहस। एतने जियादा कूस क लोग मारे गएन कि उ पचे जुद्ध करइ बरे एक फउज क रूप मँ फुन बटुर न सकइँ। उ पचे यहोवा अउ ओकरी फउज क जरिये कुचर दीन्ह गएन। आसा अउर ओकर फउज दुस्मन स बहोत सारी लूट क माल लइ लिहन। 14आसा अउर ओकर फउज गारार क नजिक क सबहि नगरन क हराएस। ओन नगरन मँ रहइवाले लोग यहोवा स डरात रहेन। ओन नगरन मँ अनगिनत कीमती चिजियन रहिन। आसा क फउज ओन नगरन स एन कीमती चिजियन क संग लइ आइ। 15आसा क फउज ओन डेरन पइ भी हमला किहस जेनमों गइरियन रहत रहेन। उ पचे अनेक भेड़िन अउ ऊँट लूट लिहेन अउर ओनका लइ गएन। तब आसा क फउज यरूसलेम लउटि गइ।

### आसा क परिवर्तन

**15** परमेस्सर क आत्मा आदेद क पूत अजर्याह पइ उतरी। 2अजर्याह आसा स भेंटइ गवा। अजर्याह कहेस, “आसा अउ यहूदा अउ बिन्यामीन क सबहि लोग मोर सुनइँ। यहोवा तोहरे संग तब अहइ जब तू ओकरे संग

अहा। जदि तू यहोवा क हेरब्या तउ तू ओका पउब्या। किन्तु जदि तू ओका छोड़ब्या तउ उ तोहका तजि देइ। 3बहोत समइ तलक इस्त्राएल बिना सच्चे परमेस्सर क, सिच्छा देइ वाला बिना याजक क अउ बिना नेम क रहेन। 4किन्तु जब इस्त्राएल क लोग कस्ट मँ पइइँ तउ उ पचे फुन इस्त्राएल क यहोवा परमेस्सर कइँती लउटइ। उ पचे यहोवा क हेरेन अउ ओका पाएन। 5ओन बिपति क दिनन मँ कउनो मनई सुरच्छित जात्रा नाहीं कइ सकत रहा। सबहि रास्ट्र बहोत जियादा उपद्रव ग्रस्त रहेन। 6एक रास्ट्र दूसरे रास्ट्र क अउर एक नगर दूसरे नगर क नस्ट करत रहा। इ एह बरे होत रहा कि परमेस्सर हर तरह क बिपतियन स ओनका परेसान करत रहा। 7किन्तु आसा, तू अउर यहूदा अउ बिन्यामीन क लोगो, सक्तीसाली बना। कमजोर न पड़ा, ढीले न पड़ा काहेकि तोहका पचनक अपने नीक काम क पुरस्कार मिली।”

8आसा जब एन बातन अउर ओदेद नबी क संदेसा क सुनेस, तउ उ बहोत उत्साहित भवा। तब उ सारे यहूदा अउ बिन्यामीन छेत्र स घिनौनी मूरतियन क हटाइ दिहस अउर उ एप्रैम क पहाड़ी देस मँ अपने अधिकार मँ लाए गए नगरन मँ मूरतियन क हटाएस अउर उ यहोवा क उ वेदी क मरम्मत किहस जउन यहोवा क मन्दिर क ओसारे क समन्वा रही।

9तब आसा यहूदा अउ बिन्यामीन क सबहि लोगन क बटोरेस। उ एप्रैम, मनस्से अउर सिमोन परिवारन क भी बटोरेस जउन इस्त्राएल देस स यहूदा देस मँ रहइ बरे आइ ग रहेन। ओनकर बड़ी गनती यहूदा मँ आइ काहेकि उ पचे लखेन कि आसा क यहोवा परमेस्सर, आसा क संग अहइ।

10आसा क हुकूमत क पन्द्रहवें बरिस क तीसरे महीने मँ आसा अउर उ सबइ लोग यरूसलेम मँ बटुरेन। 11उ समइ उ पचे यहोवा क सात सौ बर्धन अउ सात हजार भेड़िन अउ बोकसन क बलि दिहन। आसा क फउज ओन जनावरन अउर दूसर कीमती चिजियन क अपने दुस्मनन स लिहे रहा। 12तब उ पचे आपन पुरखन क यहोवा परमेस्सर क सेवा पूरे हिरदइ अउर आपन पूरी जान स करइ क एक करार अउर वाचा मँ किहन। 13कउनो मनई जउन यहोवा परमेस्सर क सेवा स इन्कार करत रहा, मार दीन्ह जात रहा। इ बात क कउनो महत्व नाहीं रहा कि उ मनई महत्वपूर्ण या साधारण अहइ या मनसेधू या मेहरारु अहइ। 14तब आसा अउ लोगन यहोवा क किरिया लिहन। उ पचे ऊँची अवाज मँ उद्घोस किहन। उ पचे तुरही अउ भेड़न क सींग बजाएन। 15यहूदा स सबहि लोग खुस रहेन काहेकि उ पचे पूरे हिरदइ स किरिया खाए रहेन। उ पचे पूरे हिरदइ स यहोवा क अनुसरण किहन अउ यहोवा क खोज किहन अउर ओका पाएन। एह बरे यहोवा यहोवा ओनके पूरे देस मँ सान्ति दिहस।

16राजा आसा अपनी महतारी आका क राजमाता क पद स हटाइ दिहस। आसा इ एह बरे किहस काहेकि माका असेरा क सम्मान देइ बरे एक भयंकर खम्भा खड़ा किहे रहा। आसा इ खम्भा क काट दिहस अउर एका नान्ह नान्ह टूकन मँ तहस नहस कइ दिहस। तब उ ओन नान्ह टूकन

क किद्रोन घाटी में बार दिहस। 17ऊँच जगहन क यहूदा स नाहीं हटावा गवा, किन्तु आसा क हिरदइ जिन्गी भइ यहोवा क बरे स्रद्धालु रहा।

18आसा ओन पवित्र भेंटन यहोवा क मन्दिर में लिआएस जेनका ओकर बाप राखस रहेन। उ सबइ चिजियन चाँदी अउ सोना क बनी रहिन। 19आसा क हुकूमत क पैतीस बरिस तलक कउनो जुद्ध नाहीं भवा।

### आसा क आखिरी बरिसन

**16** आसा क राजकाल क छतीसवें बरिस बासा यहूदा क भुइँया पइ हमला किहस। बासा इस्राएल क राजा रहा। उ रामा नगर गवा अउर एका लोगन क राजा आसा क लगे जावइ अउ आवइ स रोकइ बरे किला बनाइ दिहस।

2आसाने यहोवा क मन्दिर क कोसागार में रखे भए चाँदी अउर सोना क लिहस अउर उ राजमहल स चाँदी सोना लिहस। तब आसा बेन्हदद क सँदेसा पठएस। बेन्हदद अराम क राजा रहा अउर दमिस्क में रहत रहा। आसा क सँदेसा रहा: 3“बेन्हदद, मोरे अउर अपने बीच एक तु सन्धि होइ द्या। इ सन्धि क वइसे ही होइ द्या जइसा उ हमरे बाप अउर तोहरे बाप क बीच कीन्ह गइ रही। धियान द्या, मई तोहरे लगे चाँदी सोना पठवत हउँ। अब तू इस्राएल क राजा बासा क संग कीन्ह गइ सन्धि क तोड़ द्या जेहसे उ मोका अजाद छोड़ देब्या अउर मोका परेसान करब बन्द कइ देब्या।”

4बेन्हदद आसा क बात मान लिहस। बेन्हदद आपन फउजे क सेनापतियन क इस्राएल क नगरन पइ हमला करइ क बरे पठएस। एन सेनापतियन इय्योन, दान अउर आबेलमैम नगरन पइ हमला किहस। उ पचे नप्ताली देस में ओन सबहिँ नगरन पइ हमला किहस जहाँ खजाने रखे रहेन। 5बासा इस्राएल क नगरन पइ हमला क बात सुनेस। एह बरे उ रामा में किला बनावइ क काम रोक दिहस अउर आपन काम छोड़ दिहस। 6तब राजा आसा यहूदा क सबहिँ लोगन क बटोरेस। उ पचे रामा नगर क गएन अउर काठ अउ पाथर उठाइ लाएन जेनकर उपयोग बासा किला बनावइ बरे किहे रहा। आसा अउर यहूदा क लोग पाथरन अउ काठे क उपयोग गोवा अउ मिस्या नगरन क जियादा मजबूत बनावइ बरे किहस।

7उ समइ द्रस्टा हनानी यहूदा क राजा आसा क लगे आवा। हनानी ओहसे कहेस, “आसा, तू मदद क बरे अराम क राजा पइ आस्रित रहया, किन्तु तू यहोवा आपन परमेस्सर पइ मदद बरे आस्रित नाहीं रहया। एह बरे अराम क राजा क फउज तोहसे पराइ निकरी। 8कूस अउ लुबी बहोत बिसाल अउ सक्तीसाली फउज रखत रहेन। “ओकरे लगे अनेक रथ अउ सारथी रहेन। किन्तु आसा, तू उ बिसाल सक्तीसाली फउज क हरावइ में मदद क बरे यहोवा पइ आस्रित भए अउर यहोवा तोहका ओनका हरावइ दिहस। 9यहोवा क आँखिन सारी पृथ्वी पइ ओन लोगन क लखत फिरत हीँ जउन ओकरे बरे स्रद्धालु अहईँ जेहसे उ ओन लोगन क सक्तीसाली बनाइ सकइ। आसा, तू बेवकूफी क

काम किहा। एह बरे अब स लइके आगे तलक तोहका जुद्ध क सामना करइ क पड़ी।”

10आसा हनानी पइ उ बात स कोहाइ गवा जउन उ कहेस। आसा एँतना किरोध स पागल होइ उठा कि उ हनानी क बन्दीघरे में डाइ दिहस। आसा उ समइ कछू लोगन पइ अत्याचार भी करत रहा।

11आसा जउन कछू सुरु स आखीर तलक किहस। उ इस्राएल अउर “यहूदा क राजा लोगन क इतिहास” क पुस्तक में लिखा अहइ। 12आसा क गोड़ ओकरे राजकाल क उन्तालीसवें बरिस में रोगी होइ गवा। ओकरे रोग बहोत बुरा रहा किन्तु उ यहोवा स मदद नाहीं चाहेस। आसा वैद्यन स मदद चाहेस। 13आसा अपने राजकाल क इकतालीसवें बरिस में मरा अउर इ प्रकार आसा अपने पुरखन क संग बिस्त्राम किहस। 14लोग आसा क ओकरी कब्र में दफनाएन जेका खुद दाऊद क नगर में बनाए रहा। लोग ओका एक आखिरी चारपाई पइ रखेन जेह पइ सुगन्धित द्रव्य अउर अलग अलग तरह क मिले इत्र रखे रहेन। लोग आसा क सम्मान करइ क आगी क महाज्वाला किहन।

### यहूदा क राजा यहोसापात

**17** आसा क जगह पइ यहोसापात यहूदा क नवा राजा भवा। यहोसापात आसा क पूत रहा। यहोसापात यहूदा क सक्तीसाली बनाएस जेहसे उ पचे इस्राएल क खिलाफ लड़ सकत रहेन। 2उ फउजे क टुकड़ियन क यहूदा सबहिँ किलाबन्द नगरन में रखेस। यहोसापात फउजे क टुकड़ियन क यहूदा अउ एप्रैम क ओन नगरन में राखेस जेनका ओकर बाप आसा अपने अधिकार में किहे रहेन।

3यहोवा यहोसापात क संग रहा काहेकि पहिले क बरिसन में उ उ सबइ नीक काम किहेस जेनका ओकर पुरखा दाऊद किहे रहा। यहोसापात बाल क मूरतियन क अनुसरण नाहीं किहस। 4यहोसापात उ परमेस्सर क हेरेस जेकर अनुसरण ओकरे पुरखन करत रहेन। उ परमेस्सर क आदेसन क पालन किहेस। उ उ तरह नाहीं रहा जइसा इस्राएल क दूसर लोग रहत रहेन। 5यहोवा यहोसापात क यहूदा क सक्तीसाली राजा बनाएस। यहूदा क सबहिँ लोग यहोसापात क भेंट लिआएन। इ तरह यहोसापात क लगे बहोत स सम्पत्ति अउ सम्मान दुइनउँ रहेन। 6यहोसापात यहोवा क मारग पइ चलेस अउ ओका ओन पइ गर्व रहा। उ ऊँच जगहियन अउ असेरा क खम्भन क यहूदा देस स बाहेर किहस।

7यहोसापात अपने प्रमुखन क यहूदा क नगरन में सिच्छा देइ क बरे पठएस। इ यहोसापात क राजकाल क तीसरे बरिस भवा। उ पचे बेन्हैल, ओबद्याह, जकर्याह, नतनेल अउर मीकायाह रहेन। 8उ लेवीबंसी क ओनकर संग पठइ दिहस। उ सबइ समाया, नतन्याह, असाहेल, समीरामोत, यहोनातान, अदोनियाह अउर तोबियाह रहेन। यहोसापात याजक एलीसामा अउर यहोराम रहेन। 9ओन प्रमुखन, लेवीबंसियन अउ याजकन यहूदा में लोगन क सिच्छा दिहन। ओनके लगे, “यहोवा क नेमन क किताब” रही। उ पचे

यहूदा क सबहिं नगरन में गएन अउर लोगन क उ पचे सिच्छा दिहन।

10 यहूदा क आस-पास क रास्ट्रन यहोवा स डेरात रहेन। इहइ कारण रहा कि उ पचे यहोसापात क खिलाफ जुद्ध नाहीं छेडेन। 11 कछू पलिस्ती लोग यहोसापात क लगे भेंट लिआएन। उ पचे यहोसापात क लगे चाँदी लिआएन काहेकि उ पचे जानत रहेन कि उ बहोत सक्तीसाली राजा अहइ। कछू अरब क लोग यहोसापात क लगे रेवड़न लिआएन। उ पचे ओकरे लगे सात हजार सात सौ भेड़िन अउर सात हजार सात सौ बोकरियन लिआएन।

12 यहोसापात जियादा स जियादा सक्तीसाली होत गवा। उ यहूदा देस में किलन अउर मज़बूत नगर बनाएन। 13 यहोसापात क लगे बहोत स कलाकार अउर मजदूर रहेन जउन ओकरे बरे ओन नगरन में काम करत रहेन। उ यरूसलेम में प्रसिच्छित सैनिक रखेन। 14 ओन फउजियन क अपने परिवार समूह में गनती रही। यरूसलेम क ओन फउजियन क सूची इ अहइ:

यहूदा क परिवार समूह स इ सेनाध्यच्छ रहेन: अदना तीन लाख फउजियन क सेनाध्यच्छ रहा। 15 यहोनानान दुइ लाख अस्सी हजार फउजियन क सेनाध्यच्छ रहा। 16 अमस्याह दुइ लाख फउजियन क सेनाध्यच्छ रहा। अमस्याह जिक्री क पूत रहा। अमस्याह अपने क यहोवा क सेवा में अर्पित करइ में खुस रहा।

17 बिन्यामीन क परिवार समूह स इ सेनाध्यच्छ रहेन: एल्यादा क लगे दुइ लाख फउजी रहेन जउन धनुस, बाण अउर ढाल क उपयोग करत रहेन। एल्यादा एक साहसी फउजी रहा। 18 यहोनाबाद क लगे एक लाख अस्सी हजार मनई जुद्ध बरे तइयार रहेन। 19 उ सबइ सबहिं फउजी यहोसापात क सेवा करत रहेन। राजा पूरे यहूदा देस क किलन में दूसर मनइयन क भी रखे रहा।

### मीकायाह राजा अहाब क चिताउनी देत ह

18 यहोसापात क लगे सम्पत्ति अउ सम्मान रहा। उ राजा अहाब क संग बियाह क जरिये एक तु सन्धि किहस। 2 कछू बरिस पाछे, यहोसापात सोमरोन नगर में अहाब स भेंटइ गवा। अहाब बहोत स भेड़िन अउर गोरुअन क बलि यहोसापात अउ ओकरे संग क मनइयन क बरे चढ़ाएस। अहाब यहोसापात क गिलाद क रामोद नगर पइ हमला बरे प्रोत्साहित किहस। 3 अहाब यहोसापात स कहेस, “का तू मोरे संग गिलाद क रामोत पइ हमला करइ चलब्या?” अहाब इस्राएल क अउर यहोसापात यहूदा क राजा रहा। यहोसापात अहाब क जवाब दिहस, “मई तोहरि तरह हउँ अउर हमरे लोग तोहरे लोगन क तरह अहइँ। हम जुद्ध में तोहार साथ देब।” 4 यहोसापात अहाब स इ कहेस, “आवा, पहिले हम यहोवा स सँदेसा प्राप्त करी।”

5 एह बरे अहाब चार सौ नबियन क बटोरेस। अहाब ओनसे कहेस, “का हम क गिलाद क रामोत नगर क बिरुद्ध जुद्ध में जाइ चाही या नाहीं?” नबियन अहाब क उत्तर दिहन, “जा, काहेकि यहोवा गिलाद क रामोत क तोहका पराजित करइ देइ।”

6 किन्तु यहोसापात कहेस, “का कउनो हिआँ यहोवा क नबी अहइ? हम लोग ओकरे नबियन में स एक क जरिये यहोवा स पूछइ चाहित ह।”

7 तब राजा अहाब यहोसापात स कहेस, “हिआँ हमार लगे सिरिफ एक मनई अहइ। हम ओकरे माध्यम स यहोवा क पूछ सकित ह। किन्तु मई इ मनई स घिना करत हउँ काहेकि इ कबहुँ मोका यहोवा स कउनो अच्छा सँदेसा नाहीं दिहस। इ सदा ही बुरा सँदेसा मोरे बरे दिहस ह। इ आदमी क नाउँ मीकायाह अहइ। जउन कि यिम्ला क पूत अहइ।” किन्तु यहोसापात कहेस, “अहाब, तोहका अइसा नाहीं कहइ चाही।”

8 तब इस्राएल क राजा अहाब अपने अधिकारियन में स एक क बोलाएस अउ कहेस, “हाली करा, यिम्ला क पूत मीकायाह क हिआँ लिआवा।”

9 इस्राएल क राजा अहाब अउ यहूदा क राजा यहोसापात अपने राजसी ओढ़ना पहिर रखे रहेन। उ पचे अपने सिंहासनन पइ खरिहान में सोमरोन नगर क सम्मुख दुआरे क निचके बइठे रहेन। उ सबइ चार सौ नबी आपन सँदेसा दुइनउँ राजा लोगन क समन्वा देत रहेन। 10 कनान क पूत सिदकिय्याह लोहा क कछू सींगन बनाएस। सिदकिय्याह कहेस, “इहइ अहइ जउन यहोवा कहत ह: ‘तू लोग लोहे क सींगन क उपयोग तब तलक अस्सूर क लोगन में घोंपइ क बरे करब्या जब तलक उ पचे नस्ट न होइ जाई।’”

11 सबहिं नबियन इहइ बात कहेन। उ पचे कहेन, “गिलाद क रामोत नगर क जा। तू लोग सफल होब्या अउर जितब्या। यहोवा राजा अउ अस्सूर क लोगन क हरावइ देइ।”

12 जउन दूत मीकायाह क लिआवइ गवा रहा उ ओहसे कहेस, “मीकायाह, मोका, सबहिं नबी एक ही बात कहत रहत हीं। उ पचे कहत रहत हीं कि राजा क कामयाबी मिली। एह बरे उहइ कहा जउन उ पचे कहत रहत हीं। तू भी अच्छी बात कहा।”

13 किन्तु मीकायाह जवाब दिहेस, “यहोवा क जिन्नगी क किरिया मई उहइ कहब जउन मोर परमेस्सर कहत ह।”

14 तब मीकायाह राजा अहाब क लगे आवा। राजा ओहसे कहेस, “मीकायाह, का हम क जुद्ध करइ बरे गिलाद क रामोत नगर क जाइ चाही या नाहीं?” मीकायाह कहेस, “जा अउर हमला करा। यहोवा तोहका ओन लोगन क हरावइ देइ।”

15 राजा अहाब मीकायाह स कहेस, “कइउ दाई मई तोहसे प्रतिग्या करवाई रही कि तू यहोवा क नाउँ पइ मोका सिरिफ फुरइ बतावा।”

16 तब मीकायाह कहेस, “मई इस्राएल क सबहिं लोगन क पहाड़न पइ बिखेर भए लखेउँ। उ पचे गइरियन क बिना भेड़ी क नाई रहेन। यहोवा कहेस, ‘ओनकर कउनो नेता नाहीं अहइ। हर एक मनई क ओकरे घरे में सुरच्छित लउटइ द्या।’”

17 इस्राएल क राजा अहाब यहोसापात स कहेस, “मई कहे रहेउँ कि मीकायाह मोरे बरे यहोवा स बढ़िया सँदेसा नाहीं पाइ। उ मोरे बरे सिरिफ बुरे सँदेसा रखत ह।”

18मीकायाह कहेस, “यहोवा क सँदेसा सुना: मई यहोवा क अपने सिंहासने पड़ बड़ठे लखेउँ। सरग क पूरी फउज ओकरे चारिहूँ कईती खड़ी रही। कछू ओकरे दाहिन कईती अउर कछू ओकरे बाई कईती। 19यहोवा कहेस, ‘इस्त्राएल क राजा अहाब क कउन बहकाएस? जेहसे उ गिलाद क रामोत नगर पड़ हमला करब अउर उ हुवाँ मार दीन्ह देब?’ यहोवा क चारिहूँ कईती खड़े अलग अलग अतिमा अलग अलग मस्वरा दिहल। 20तब एक आतिमा आइ अउर उ यहोवा क समन्वा खड़ी भइ। उ आतिमा कहेस, ‘मई अहाब क धोखा देब। यहोवा आतिमा स पूछेस, ‘कइसे?’ 21उ आतिमा जवाब दिहस, ‘मइ बाहेर जाब अउर अहाब क नबियन क मुँह में झूठ बोलइवाली आतिमा बनब’ अउर यहोवा कहेस, ‘तोहका अहाब क धोखा देइ मैं कामयाबी मिली। एह बरे जा अउर एका करा।’

22“अहाब, अब धियान द्या, यहोवा तोहरे नबियन’ क मुँह में झूठ बोलइवाली आतिमा प्रवेस कराएस ह। यहोवा कहेस ह कि तोहरे संग बुरा घटी।”

23तब सिदकिय्याह मीकायाह क लगे गवा अउर ओकरे मुँह पड़ मारेस। कनना क पूत सिदकिय्याह कहेस, “मीकायाह, यहोवा क आतिमा मोका तजिके तोहसे बातचीत करइ कइसे आइ?” 24मीकायाह जवाब दिहस, “सिदकिय्याह, तू उ दिन एका जनब्या जब तू एक भीतरी घरे में छुपइ जाब्या।”

25तब राजा अहाब कहेस, “मीकायाह क ल्या अउर एँका नगर क प्रसासक आमोन अउ राजा क पूत योआस क लगे पठइ द्या। 26आमोन अउ योआस स कहा, ‘राजा इ कहत हीं: मीकायाह क बन्दीघरे में डाइ द्या। ओका सेटी अउ पानी क अलावा तब तलक कछू खाइ क जिन द्या जब तलक मई जुद्ध स सुरच्छित न लउटउँ।”

27मीकायाह जवाब दिहस, “अहाब, जदि तू जुद्ध स सुरच्छित लउटि आवत ह तउ यहोवा मोरे जरिये नाहीं कहेस ह। तू सबहि लोग सुना अउर मोरे बचन क याद रखा।”

### अहाब गिलाद क रामोद में मारा गवा

28एह बरे इस्त्राएल क राजा अहाब अउ यहूदा क राजा यहोसापात गिलाद क रामोत नगर पड़ हमला किहस। 29इस्त्राएल क राजा अहाब यहोसापात स कहेस, “मई जुद्ध में जाइ क पहिले आपन रुप बदल देब। किन्तु तू अपना राजवस्त्र ही पहिरा।” एह बरे इस्त्राएल क राजा अहाब अपना रुप बदल दिहस अउर दुइनउँ राजा जुद्ध में गएन।

30अराम क राजा अपने रथन क रथपतियन क आदेस दिहस। उ ओनसे कहेस, “कउनो भी मनइ स चाहे उ बड़ा फउज होइ या छोट फउज होइ ओहसे जुद्ध जिन करा। किन्तु सिरिफ इस्त्राएल क राजा अहाब स जुद्ध करा।” 31जब रथपतियन यहोसापात क लखेन उ पचे सोचेन, “उहइ इस्त्राएल क राजा अहाब अहइ।” उ पचे यहोसापात पड़ हमला करइ क बरे ओकरी कईती मुडेन। किन्तु यहोसापात उद्घोस किहस अउर यहोवा ओकर मदद किहस। परमेस्सर रथपतियन क यहोसापात क समन्वा स दूर मुड़ जाइ दिहस। 32जब उ पचे समुझेन कि यहोसापात इस्त्राएल क राजा नाहीं अहइ उ पचे ओकर पाछा करब छोड़ दिहल।

33किन्तु एक फउजी स बिना कउनो लच्छ बेध क धनुस स बाण छूट गएन। उ बाण इस्त्राएल क राजा अहाब क बेध दिहस। इ, अहाब क कवच क खुले आग में बेधेस। अहाब अपने रथे क सारथी स कहेस, “पाछे मुड़ा अउर मोहसे जुद्ध स बाहेर लइ चला। मई घायल होइ गवा अहउँ।” 34उ दिन जुद्ध घमासान होइ गवा। इस्त्राएल क राजा आपन रथ में अरामियन क सामना करत भए साँझ तलक अपने क सँभारे रखेस। तब अहाब सूरज बूड़ाइ पड़ मर गवा।

19 यहूदा क राजा यहोसापात सुरच्छित यरूसलेम अपने घरे लउटा। 2दूस्टा येहू यहोसापात स भेंटइ गवा। येहू क बाप क नाउँ हनानी रहा। येहू राजा यहोसापात स कहेस, “तू बुरे मनइयन क मदद काहे करत ह? तू ओन लोगन स काहे पिरैम करत ह जउन यहोवा स घिना करत हीं? इहइ कारण अहइ कि यहोवा तोह पड़ कोहान अहइ। 3किन्तु तोहरी जिन्नगी में कछू अच्छी बातन अहइ। तू असेरा खम्भन क इ देस स बाहेर किहा अउर तू हिरदइ स परमेस्सर क अनुसरण करइ क निहिचय किहा।”

### यहोसापात निआवाधीसन क चुनत ह

4यहोसापात यरूसलेम में रहत रहा। उ लोगन स संग मिलइ बरे फुन एप्रैम क पहाड़ी पहुँटा स बेर्सेबा नगर तलक गएन। यहोसापात ओन लोगन क उ यहोवा परमेस्सर क लगे लउटाएस जेकर अनुसरण ओनकर पुरखन करत रहेन। 5यहोसापात यहूदा में निआवाधीस चुनेस। उ यहूदा क हर किला नगर में रहइ क बरे निआवाधीस चुनेस। 6यहोसापात एन निआवाधीसन स कहेस, “जउन कछू तू करा ओहमों सावधान रहा काहेकि तू, लोगन क बरे निआव नाहीं करत रह्या मुला यहोवा बरे करत अहा। जब तू निर्णय करब्या तब यहोवा तोहरे संग होइ। 7तोहमों स हर एक क अब यहोवा स डेराइ चाही। जउन करा ओहमों सावधान रहा काहेकि हमार यहोवा परमेस्सर निआवी बाटइ। उ कउनो मनई क दूसर मनई स जियादा महत्वपूर्ण मानिके बेउहार नाहीं करत। उ अपने निर्णय क बदलइ क बरे धन नाहीं लेत।”

8अउर यहोसापात यरूसलेम में, लेवीबंसियन, याजकन अउर इस्त्राएल क परिवार क प्रमुखन क निआवाधीस चुनेस। ओन लोगन क यहोवा क नेमन क उपयोग यरूसलेम क लोगन क समस्यन क निपटावइ बरे करब रहा। 9यहोसापात ओनका आदेस दिहस अउ कहेस, “तोहका अपने पूरे हिरदइ स निस्तावान पुर्वक सेवा करइ चाही। तोहका यहोवा स जरूर डेराइ चाही। 10तोहरे लगे हत्या, परमेस्सर क नेम में हिंसा, आदेस, सासन या कउनो दूसर नेमन क मामले आइ सकत हीं। इ सबइ सबहि मामले नगरन में रहइवाले तोहरे भाइयन दुआरा तोहार समन्वा आइहीं। एन सबहि मामलन में तोहका लोगन क इ बात क चितउनी देइ चाही कि उ तोहार निर्देसन क जरूर मानिहीं अन्यथा उ परमेस्सर क समन्वा दोखी होइ अउर ओकर किरोध ओन पड़, तोह पड़ अउर तोहार भाइयन क ऊपर उतरिहीं। इ करा तब तू अपराधी नाहीं होब्या। 11अमर्याह मार्गदर्सक याजक अहइ। उ

यहोवा क सम्बन्ध क सबहिं बातन में तोहरे ऊपर होइ। इस्माएल क पूत जबद्याह राजा क सबहिं बातन क अधिकारी होइ। जबद्याह यहूदा क परिवार समूह में प्रमुख अहइ। लेवीबंसी अधिकारियन क रूप में भी तोहार सहायता करिहीं। जउन कछू करा ओहमों साहस रखा। यहोवा ओन लोगन क संग होइ, जउन उहइ करत हीं जउन ठीक अहइ।”

### यहोसापात जुद्ध क सामना करत ह

**20** कछू समइ पाछे मोआबी, अम्मोनी अउर कछू मूनी लोग यहोसापात क संग जुद्ध करइ आएन। 2कछू लोग आएन अउर उ पचे यहोसापात स कहेस, “तोहरे खिलाफ एदोम स, मृत-सागर क दूसर कईंती स एक ठु बिसाल फउज आवति अहइ। उ पचे हसासोन्तामार में पहिले स ही अहई।” (हसासोन्तामार क एनगदी भी कहा जात ह।) 3यहोसापात डर गवा अउर उ यहोवा स इ पूछइ क निहचइ किहेस कि ओका का करइ चाही? उ यहूदा में हर एक क बरे उपवास क समइ घोसित किहस। 4यहूदा क लोग एक संग यहोवा स मदद माँगइ आएन। उ पचे यहूदा क सबहिं नगरन स यहोवा क मदद माँगइ आएन।

5यहोसापात यहोवा क मन्दिर में नवे अंगना क समन्वा रहा। य यरूसलेम अउ यहूदा स आए लोगन क सभा में खड़ा भवा। 6उ कहेस,

“हे हमरे पुरखन क यहोवा परमेस्सर, तू सरग में परमेस्सर अहा। तू सबइ देसन क सबइ राज्जन पइ हुकूमत करत ह। तोहार लगे सक्ती अउ ताकत अहइ! कउनो मनई तोहरे बिरूद्ध खड़ा नाहीं होइ सकत। 7तू हमार परमेस्सर अहा। तू इ भुईया में रहइवालन क एका तजइ क मजबूर किहा। इ तू अपने इस्त्राएली लोगन क समन्वा किहा। तू इ भुईया तू आपन मीत इब्राहीम क संतानन क सदा ही क बरे दइ दिहा। 8इब्राहीम क संतान इ देस में रहत रहेन अउर उ पचे एक ठु मन्दिर तोहरे नाउँ पइ बनाएन।” 9उ पचे कहेन, “जदि हम लोगन पइ बिपद आइ जइसे तरवार, दण्ड, रोग या अकाल तउ हम इ मन्दिर क समन्वा अउर तोहरे समन्वा खड़े होब। इ मन्दिर पइ तोहार नाउँ अहइ। जब हम लोगन पइ बिपति आइ तउ हम लोग तोहका गोहराउब। तब तू हमरी सुनब्या अउर हमार रच्छा करब्या।”

10“मुला इ समइ हिआँ अम्मोन, मोआब अउर सेईर पर्वत क लोग चढ़ आएन ह। तू इस्त्राएल क लोगन क उ समइ ओनकी भुईया में नाहीं जाइ दिहा जब उ पचे मिस्त्र स बाहेर आएन। एह बरे इस्त्राएल क लोग मुड़ गए रहेन अउर ओन लोग ओनका नस्ट नाहीं किहेन। 11मुला लखा कि उ सबइ लोग हम क ओनका नस्ट न करइ क कउनो तरह क पुरस्कार देत अहई। उ पचे हम क तोहरी भुईया स बाहेर होइ बरे मजबूत करइ आए अहई। इ भुईया तू हम क दिहा ह। 12हे हमार परमेस्सर, ओन लोगन क दण्ड देइ। हम लोग उ बिसाल फउज क खिलाफ कउनो सक्ती नाहीं रखतेन जउन हमरे खिलाफ आवति अहइ। हम नाहीं जानित कि का करी। इहइ कारण अहइ कि हम तोहार मदद बरे लखिही!”

13यहूदा क सबहिं लोग यहोवा क समन्वा अपने गदेलन, मेहररुअन अउ बच्चन क संग खड़े रहेन। 14तब यहोवा क आतिमा यहजीएल पइ उतरी। यहजीएल जकर्याह क पूत रहा बनायाह यीएल क पूत रहा अउर यीएल मत्न्याह क पूत रहा। यहजीएल एक लेवीबंसी रहा अउर आसाप क संतान रहा। 15उ सभा क बीच यहजीएल कहेस, “हे राजा यहोसापात अउ यहूदा अउ यरूसलेम में रहइवाले लोगो, मोर सुना। यहोवा तोहसे इ कहत ह: ‘इ बिसाल फउज स न तउ डरा, न ही चिन्ता करा काहेकि इ तोहार जुद्ध नाहीं अहइ। इ परमेस्सर इ जुद्ध अहइ। 16भियान तू हुवाँ जा अउर ओन लोगन स लड़ा। उ पचे सीस क दर् स होइके अइहीं। तू लोग ओनका घाटी क आखिर में यरूसलेम रेगिस्तान क दूसरि कईंती पउब्या। 17इ जुद्ध में तोहका लड़ब नाहीं पड़ी। अपने जगहन पइ मजबूती स खड़ा रहा। तू लखब्या कि यहोवा तोहका कइसे बचावत ह। यहूदा अउ यरूसलेम क लोगो, डेराअ नाहीं। चिन्ता जिन करा! यहोवा तोहरे संग अहइ एह बरे भियान ओन लोगन क खिलाफ जा।”

18यहोसापात बहोत नम्रता स निहुरा। ओकर मुँड भुईया क छूअत रहा अउर यहूदा अउ यरूसलेम में रहइवाले सबहिं लोग यहोवा क समन्वा गिर गएन अउर ओन सबहिं यहोवा क उपासना किहन। 19कहाती परिवार समूह क लेवीबंसी अउ कहाती लोग, इस्त्राएल क यहोवा परमेस्सर क स्तुति क बरे खड़े भएन। उ पचे बहोत ऊँची अवाज में स्तुति किहन।

20यहोसापात क फउज तकोआ रेगिस्तान में बहोत सबेरे गइ। जब उ पचे बढ़ब आरम्भ करत रहेन, यहोसापात खड़ा भवा अउर उ कहेस, “यहूदा अउ यरूसलेम क लोगो, मोर सुना। अपने यहोवा परमेस्सर में बिस्सास रखा अउर तब तू मजबूती क संग खड़े रहब्या। यहोवा क नबियन में बिस्सास रखा। तू लोग सफल होब्या।”

21यहोसापात लोगन क उत्साहित किहेस अउर निर्देस दिहेस। तब उ यहोवा क बरे गायक चुनेस। उ पचे गायक यहोवा क स्तुति करइ क बरे चुने ग रहेन काहेकि उ पवित्तर अउर महिमामय बाटइ। उ पचे फउजे क समन्वा कदम मिलावत भए बढ़ेन अउर उ पचे यहोवा क स्तुति किहन। एन गायकन गाएन, “परमेस्सर क धन्यवाद दया काहेकि ओकर पिरेम सदैव रहत ह।” 22जइसे ही ओन लोग गाना गाइके यहोवा क स्तुति सुरु किहन, यहोवा अम्मोनी, मोआबी अउर सेईर पर्वत क लोगन क खिलाफ अचानक हमला किहेस। इ सबइ उ सब लोग रहेन जउन यहूदा पइ आक्रमन करइ आए रहेन। उ सबइ लोग पिट गएन। 23अम्मोनी अउ मोआबी लोग सेईर पर्वत स आए लोगन क क खिलाफ जुद्ध करइ सुरु कइ दिहेन अउ ओनका नस्ट कइ दिहन। जब उ पचे सेईर क लोगन क मार चुकेन तु पचे एक दूसर क मार डाएन।

24यहूदा क लोग एक अइसी जगह पइ आएन जहाँ स उ पचे सारे रेगिस्तान क लखइ सकत। उ पचे दुस्मन क बिसाल सेना क लखेन। किन्तु उ पचे सिरिफ लहासन क भुईया पइ पड़े लखेन। कउनो मनई बचा न रहा। 25यहोसापात अउर ओकर फउज लहासन स कीमती चिजियन लइ लिहेस।

उ पचे बहोत स सामानन, वस्त्रन अउ कीमती चिजियन पाएन। उ पचे बहोत सारा जनावरन भी पाएन। चिजियन ओहसे अधिक रहिन जेतना यहोसापात अउर ओकर फउज लइ जाइ सकत रही। ओनका ल्हासन स कीमती चिजियन बटोरइ में तीन दिन लगने, काहेकि हुवाँ बहोत जियादा रहेन। 26चउथे दिन यहोसापात अउर ओकर फउज बराका क घाटी\* में मिलेन। उ पचे उ जगह पइ यहोवा क स्तुति किहिन। इहइ कारण अहइ कि उ जगह क नाउँ आनु तलक “बराका क घाटी” अहइ।

27तब यहोसापात यहूदा अउ यरूसलेम क लोगन क यरूसलेम लउटाइके लइ गवा। यहोवा ओनका बहोत खुस किहस काहेकि ओनकर दुस्मन पराजित होइ गए रहेन। 28उ पचे यरूसलेम में प्रवेश किहेन अउर वीणा, सितार अउ तुरहियन बजावत भए यहोवा क मन्दिर में दाखिल भएन।

29सबहिँ देस क सारे राज्ज यहोवा स डेरान रहेन काहेकि उ पचे सुनेन कि यहोवा इस्त्राएल क दुस्मनन स लड़ा। 30इहइ कारण अहइ कि यहोसापात क राज्ज में सान्ति रही। यहोसापात क परमेस्सर ओका चारिहुँ कइँती स सान्ति दिहस।

### यहोसापात क सासन क अन्त

31यहोसापात यहूदा देस पइ हुकूमत किहस। यहोसापात जब सासन सुरु किहस तउ उ पैतीस बरिस क रहा। उ पच्चीस बरिस यरूसलेम में हुकूमत किहस। ओकर महतारी क नाउँ अजूबा रहा। अजूबा सिल्ही क बिटिया रही। 32यहोसापात सच्चे मारग पइ अपने बाप आसा क तरह रहा। यहोसापात, आसा क मारग क अनुसरण करइ स मुड़ा नाहीं। यहोसापात यहोवा क दृष्टि में उचित किहस। 33मुला ऊँच जगहियन नाहीं हटाई गइन अउर लोग आपन हिरदय परमेस्सर क अनुसरण करइ में नाहीं लगाएस जेकर अनुसरण ओनकर पुरखन करत रहेन।

34यहोसापात सुरु स आखीर तलक जउन कछू किहस उ येहू क सबइ रचना में लिखा अहइ। येहू क बाप क नाउँ हनानी रहा। इ सबइ बातन “इस्त्राएल क राजा लोगन क इतिहास” नाउँ क किताब में लिखा भवा अहइ।

35कछू समइ पाछे यहूदा क राजा यहोसापात इस्त्राएल क राजा अहज्याह क संग सन्धि किहस। अहज्याह बुरा किहस। 36यहोसापात अहज्याह क संग जहाजन क बरे, बनाइ बरे राजी होइ गएन जउन तर्सीस नगर जाइहीं। उ पचे जहाजन क एस्योन गेबेर नगर में बनाएस। 37तब दोदावाह जउन मारेस क रहा क पूत एलीआज़ार यहोसापात क खिलाफ भविस्सबाणी किहेस। उ कहेस, “यहोसापात, तू अहज्याह क संग मिल गए अहा, इहइ कारण अहइ कि यहोवा तोहरे कारज क नस्ट करी।” जहाज टूट गएन, एह बरे यहोसापात अउ अहज्याह ओनका तर्सीस नगर क न पठइ सकेन।

**21** तब यहोसापात अउर अपने पुरखन क संग दफनावा गवा। ओका दाऊद नगर में दफनावा गवा। यहोराम यहोसापात क जगह पइ नवा राजा भवा। यहोराम

यहोसापात क पूत राह। 2यहोराम क भाई अजर्याह, यहीएल, जकर्याह, अजर्याह, मीकाएल अउर सपत्याह रहेन। उ सबइ लोग यहोसापात क पूत रहेन। यहोसापात यहूदा क राजा रहा। 3यहोसापात अपने पूतन क चाँदी, सोना अउर कीमती चिजियन भेंट में दिहस। उ ओनका यहूदा में सक्तीसाली किलन भी दिहस। किन्तु यहोसापात राज यहोराम क दिहस काहेकि यहोराम सब स बड़का पूत रहा।

### यहूदा क राजा यहोराम

4यहोराम अपने बाप क राज्ज प्राप्त किहस अउर अपने क सक्तीसाली बनाएस। उ आपन तरवारे स आपन सबहिँ भाइयन क मार डाएस। उ इस्त्राएल क कछू प्रमुखन क मार डाएस। 5जब यहोराम सासन सुरु किहेस तउ उ बतीस बरिस क रहा। उ यरूसलेम में आठ बरिस तलक हुकूमत किहस। 6उ उहइ तरह रहा जइसे इस्त्राएल क राजा रहत रहेन। उ उहइ तरह रहा जउने तरह अहाब क परिवार रहत रहा। इ एह बरे भवा कि यहोराम अहाब क बिटिया स बियाह किहस अउर यहोराम यहोवा क निगह में बुरा किहस। 7किन्तु यहोवा दाऊद क परिवार क नस्ट नाहीं करइ चाहत रहा, काहेकि उ दाऊद क संग वाचा किहे रहा। यहोवा बचन दिहे रहा कि दाऊद अउर ओकरी सन्तान क एक बंस सदा ही सासन करब।

8यहोराम क समइ में, एदोम यहूदा क अधिकार छेत्र स बाहेर निकर गवा। एदोम क लोग अपना राजा चुन लिहिन। 9एह बरे यहोराम अपने सबहिँ सेनापतियन अउर रथन क संग एदोम गवा। एदोमी सेना यहोराम अउर ओकरे रथ क रथपतियन क घेर लिहस। किन्तु यहोराम रात में जुद्ध कइके अपने निकरइ क रस्ता हेर लिहस। 10उ सबइ स अब तलक एदोन क देस यहूदा क खिलाफ बिद्रोही रहा ह। लिब्ना नगर क लोग भी यहोराम क बिरुद्ध होइ गएन। इ एह बरे भवा कि यहोराम पुरखन क, यहोवा परमेस्सर क छोड़ दिहस। 11यहोराम ऊँची जगह भी यहूदा क पहाड़ियन पइ बनाएस। यहोराम यरूसलेम क लोगन क परमेस्सर बरे अबिस्सासी बनइ क कारण बनेस। उ यहूदा क लोगन क यहोवा क खिलाफ भड़काएस।

12एलिय्याह नवी स यहोराम क एक सँदेसा मिला। सँदेसा में इ कहा गवा रहा: “इ उ अहइ जउन परमेस्सर यहोवा कहत ह। इहइ उ परमेस्सर अहइ जेकर अनुसरण तोहार पुरखा दाऊद करत रहा। यहोवा कहत ह, ‘यहोराम, तू उ तरह नाहीं रह्या जउने तरह तोहार बाप यहोसापात रहा। तू उ प्रकार नाहीं रह्या जउने तरह यहूदा क राजा आसा रहा। 13मुला तू उ तरह रह्या जउने तरह इस्त्राएल क राजा रहेन। तू यहूदा अउ यरूसलेम क लोगन क उ काम करइ स रोक्वा ह जउन यहोवा चाहत ह। इहइ अहाब अउर ओकर परिवार किहस। उ पचे यहोवा क बरे बिस्सास क जोगग न रहेन तू अपने भाइयन क मार डया। तोहार भाई तोहसे नीक रहेन। 14एह बरे अब यहोवा हाली ही तोहरे लोगन क बहोत जियादा सजा देइ। यहोवा तोहरे बच्चन, मेहरुअन अउर तोहार सारी सम्पती क सजा देइ। 15तू पचन्क आँतन में भयंकर बीमारी होइ। इ हर रोज जियादा बिगड़त जाइ।

**बराका क घाटी** इ सब्द क अरथ अहइ “आसीर्बाद” या “पराथना”।

तब तोहार भयंकर बीमारी क कारण आँतन बाहेर निकरि अइहीं।”

16यहोवा इथियोपियन क लगे रहइवाले पलिस्तियन अउ अरबियन क यहोराम स रूठाइ दिहस। 17उ पचे यहूदा देस पइ हमला कइ दिहन अउर राजमहल क सारी सम्पत्ति अउ यहोराम क पूतन अउ मेहररुअन क लइ गएन। सिरिफ यहोराम क सब स छोटका पूत छोड़ दीन्ह गवा। यहोराम क सब स नान्ह पूत क नाउँ यहोआहाज रहा।

18ओन चिजियन क होइ क पाछे यहोवा यहोराम क आँतन में अइसा रोग पइदा किहस जेकर उपचार न होइ सका। 19तब यहोराम क आँतन, दुइ बरिस पाछे ओकरी बीमारी क कारण बाहेर आइ गइ। उ बहोत बुरी पीरा में मरा। यहोराम क सम्मान में लोग आगी क महाज्वाला नाहीं बारेन जइसा उ पचे ओकरे बाप क बरे किहे रहेन। 20यहोराम उ समइ बतीस बरिस क राह जब उ राजा भवा रहा। उ यरूसलेम में आठ बरिस हुकूमत किहस। जब यहोराम मरा तउ कउनो मनई दुखी नाहीं भवा। लोग यहोराम क दाऊद क नगर में दफनाएन किन्तु ओन कब्रन में नाहीं जहाँ राजा दफनाए जात हीं।

### यहूदा क राजा अहज्याह

**22** यरूसलेम क लोग अहज्याह क यहोराम क जगह पइ नवा राजा होइ क बरे चुनेन। अहज्याह यहोराम क सबस नान्ह पूत रहा। अरब लोगन क संग जउन लोग यहोराम क डेरन पइ हमला करइ आए रहेन उ पचे यहोराम क बड़े पूतन क मार डाए रहेन। एह बरे यहूदा में अहज्याह सासन करब सुरु किहस। 2अहज्याह जब हुकूमत करब सुरु किहस तब उ बाईस बरिस क रहा। अहज्याह यरूसलेम में एक बरिस हुकूमत किहस। ओकरी महतारी क नाउँ अतल्याह रहा। अतल्याह क बाप क नाउँ ओम्री रहा। 3उ अहज्याह भी वइसे ही रहा जइसे अहाब क परिवार रहत रहा। उ उ तरह रहा काहेकि ओकर महतारी ओका गलत काम करइ क बरे हुसकाएस। 4अहज्याह यहोवा क दृष्टि में बुरे काम किहस, जइसा कि अहाब क परिवार किहे रहा। अहाब क परिवार अहज्याह क ओकरे बाप क मरई क पाछे बुरी सलाह दिहस। उ बुरी सलाह ओकरे मउत क कारण रहा। 5अहज्याह उहइ सलाह क मानेस जउन अहाब क परिवार ओका दिहस। अहज्याह राजा योराम क संग अराम क राजा हजाएल क खिलाफ गिलाद क रामोत नगर में गवा। योराम क बाप क नाउँ अहाब रहा जउन इस्त्राएल क राजा रहा। किन्तु अर्मिया क लोग योराम क जुद्ध में घायल कइ दिहन। 6योराम लउटिके यिज्रेल नगर क स्वस्थ होइ क बरे गवा। उ रामोत में तब घायल भवा रहा जब उ अराम क राजा हजाएल क खिलाफ जुद्ध करत रहा।

तब यहोराम क पूत अहज्याह अहाब क पूत योराम स मिलइ यिज्रेल नगर क गवा। योराम यिज्रेल नगर में रहा काहेकि उ घायल रहा।

7परमेस्सर अहज्याह क मउत तब करवाइ दिहस जब उ योराम स भेंटइ गवा। अहज्याह पहोंचा अउर योराम क संग यहू स भेंटइ गवा। यहू क बाप क नाउँ निमसी रहा। यहोवा

येहू क अहाब क परिवार क नस्ट करइ बरे चुनेस। 8येहू अहाब क परिवार क सजा देत रहा। येहू यहूदा क प्रमुखन अउर अहज्याह क ओन सम्बन्धियन क पता लगाएस जउन अहज्याह क सेवा करत रहेन। येहू यहूदा क ओन प्रमुखन अउर अहज्याह क सम्बन्धियन क मार डाएस। 9तब येहू अहज्याह क खोज में रहा। येहू क लोग ओका उ समइ पकरि लिहन जब उ सोमरोन नगर में छुपइ क जतन करत रहा। उ पचे अहज्याह क येहू क लगे लिआएन। उ पचे अहज्याह क मार दिहन अउर ओका दफनाइ दिहन। उ पचे कहेन, “अहज्याह यहोसापात क संतान अहइ। यहोसापात पूरे हिरदइ स यहोवा क अनुसरण किहे रहे।” अहज्याह क परिवार में उ सक्ती नाहीं रही कि यहूदा क राज क अखण्ड रख सकइ।

### रानी अतल्याह

10अतल्याह अहज्याह क महतारी रही। जब उ लखेस कि ओकर पूत मर गवा तउ उ यहूदा में राजा क सबहिं पूतन क मार डाएस। 11एहँ बरे राजा यहोराम क बिटिया यहोसावत अहज्याह क पूत योआस क लिहस अउर ओका छुपाइ दिहस। जब राजा क दूसर पूतन क मार दीन्ह ग रहेन। यहोसापात योआस अउर ओकरी धाई क अपने सयनकच्छ क भीतर रखेस। यहोसावत याजक यहोयादा क मेहरारु रही अउर उ अहज्याह क बहिन रही। यहोसावत योआस क छुपाइ दिहे रहा। एँह बरे रानी अतल्याह ओका नाहीं मार सकेस। 12योआस याजकन क संग परमेस्सर क मन्दिर में छः बरिस तलक छुपा रहा। उ जमाने में अतल्याह रानी क रुप में देस पइ हुकूमत किहस।

### याजक यहोयादा अउर राजा योआस

**23** सताएँ बरिस में यहोयादा आपन सक्ती देखाएस। उ सेनापितयन क संग सन्धि किहस। उ सबइ नायकः यरोहाम क पूत अजर्याह यहोहानान क पूत इस्माएल, ओबेद क पूत अजर्याह, अदायाह क पूत मासेयाह अउर जिब्री क पूत एलीसापात रहेन। 2उ पचे यहूदा क चारिहुँ कइँती गएन अउर यहूदा क सबहिं नगरन स उ पचे लेवीबंसियन क बटोरेन। उ पचे इस्त्राएल क परिवारन क प्रमुखन क भी बटोरेन। तब उ पचे यरूसलेम गएन। 3सबहिं लोग एक संग मिलिके राजा क संग परमेस्सर क मन्दिर में एक ठु सन्धि किहन।

यहोयादा एन लोगन स कहेस, “राजा क पूत हुकूमत करी। इहइ उ बचन अहइ जउन यहोवा दाऊद क संतानन क सम्बन्धित दिहे रहा। 4अब, तोहका इ जरूर करइ चाहीः याजकन अउ लेवीयन सबित क दिन तू पचन्में स जउन सेवा पइ जात हीं ओनकर एक तिहाई दुआरे क रच्छा करी। 5तोहार एक तिहाई राजमहल पइ रही अउर तोहार एक तिहाई पहिले फाटक पइ रही। मुला दूसर सबहिं लोग यहोवा क मन्दिर क अँगना में रहिहीं। 6कउनो भी मनई क यहोवा क मन्दिर में न आवइ दया। सिरिफ सेवा करइवाले याजकन अउ लेवीबंसियन क पवितर होइ क कारण, यहोवा क मन्दिर में आवइ क आग्या अहइ। मुला दूसर लोग उ

कारज करिहीं जउन यहोवा दइ रखेस ह। 7लेवीबंसियन जरूर राजा क नजिक रहइ चाही। हर एक मनई अपनी तरवार अपने संग रखी। जदि कउनो मनई मन्दिर में प्रवेस करइ क कोसिस करत ह तउ उ मनई क मार डावा। तू पचन्क राजा क संग रहब बाटइ उ जहाँ।”

8लेवीबंसी अउ यहूदा क सबहि लोग याजक यहोयादा जउन आदेस दिहस, ओकर पालन किहस। याजक यहोयादा याजकन क समूह में स कउनो क छूट नाहीं दिहस। इ तरह हरेक सेनापित आपन सबहि लोगन क जउन सबित क दिन सेवा में जात रहेन, अउर जउन सेवा में नाहीं जात रहेन लइ लिहेन। 9याजक यहोयादा अधिकारियन क उ सबइ भालन अउर बड़ा अउ नान्ह ढारन क दिहन जउन राजा दाऊद क रहिन। उ सबइ हथियार परमेस्सर क मन्दिर में धरे रहेन। 10तब यहोयादा लोगन क बताएस कि ओनका कहाँ खड़ा होब अहइ। हर एक मनई अपने हथियार अपने हाथ में लिहे रहा। उ पचे मन्दिर क दाई अउ बाई सबइ रासतन में खड़ा भएन। उ पचे वेदी, मन्दिर अउर राजा क निचके खड़े रहेन। 11उ पचे राजा क पूत क बाहेर लिआएन अउर ओका मुकुट पहिराइ दिहन। उ पचे ओका व्यवस्था क किताब क एक प्रति दिहन। तब उ पचे योआस क राजा बनाएसन यहोयादा अउर ओकरे पूतन योआस क अभिसेक किहन। उ पचे कहेन, “राजा दीर्घायु होइ।”

12अतल्याह मन्दिर कईती दउड़त भए अउर राजा क बड़कइ करत भए लोगन क सोर सुनेस। उ यहोवा क मन्दिर पइ लोगन क लगे आइ। 13उ नजर दउड़ाएस अउर राजा क लखेस। राजा राज स्तम्भ क संग सामनेवाले दुआर पइ खड़ा रहा। अधिकारी अउ लोग जउन तुरही बजावत रहेन, राजा क लगे रहेन। देस क लोग खुस रहेन अउर तुरही बजावत रहेन। गायक संगीत क बाजन क बजावत रहेन। गायक बड़कई क गायन में लोगन क अगुवाई करत रहेन। तब अतल्याह अपने ओढ़नन क फारि डाएस, अउर उ कहेस, “सङ्गन्त्र, सङ्गन्त्र।”

14याजक यहोयादा फउजे क नायकन क बाहेर लिआवा। उ ओनसे कहेस, “अतल्याह क, सेना स, बाहेर लइ आवा। अपनी तरवार क उपयोग उ मनई क मार डावइ बरे करा जउन ओकरे संग जात ह।” तब याजक फउजियन क चितउनी दिहस, “अतल्याह क यहोवा क मन्दिर में जिन मारा।” 15तब ओन लोग अतल्याह क पकड़ लिहन जब उ राजमहल क घोड़ दुआर पइ आइ। तब उ पचे उहइ जगह पइ ओका मार डाएन।

16तब यहोयादा राजा अउर सबहि लोगन क संग एक ठु सन्धि किहस। सबहि स्वीकार किहन कि उ पचे यहोवा क लोग रहिहीं। 17सबहि लोग बाल क मूर्ति क मन्दिर में गएन अउर ओका उखाड़ डाएन। उ पचे बाल क मन्दिर क वेदियन अउर मूरतियन क तोड़ डाएन। उ पचे बाल क वेदी क समन्वा बाल क याजक मतान क मार डाएस।

18तब यहोयादा याजकन क चुनेस अउर ओनका यहोवा क मन्दिर बरे उत्तरदायी बनाएस। उ पचे याजक लेवीबंसी रहेन अउर दाऊद ओनका यहोवा क मन्दिर क बरे उत्तरदायी होइ क कार्य सौपे रहा। ओन याजकन क होमबलि मूसा क

आदेस क अनुसार यहोवा क चढ़ाउब रही। उ पचे बहोत खुसी स दाऊद क निर्देस क अनुसार गावत भए बलि चढ़ावत रहेन। 19यहोयादा यहोवा क मन्दिर क दुआरे पइ दुआरपाल रखेस जेहसे कउनो मनई जउन कउनो दृष्टि स सुद्ध नाहीं रहा मन्दिर में नाहीं जाइ सकत रहा।

20यहोयादा फउज क नायकन, प्रमुखन लोगन क प्रसासकन अउ देस क सबहि लोगन क अपने संग लिहस। तब यहोयादा राजा क यहोवा क मन्दिर स बाहेर निकारेस अउर उ पचे ऊपरी दुआरे स राजमहल में गएन। उ जगह पइ उ पचे राजा क गद्दी पइ बइठाएन। 21यहूदा क सबहि लोग बहोत खुस रहेन अउर यरूसलेम नगर में सान्ति रही काहेकि अतल्याह तरकारे स मार दीन्ह गइ रही।

### योआस फुन मन्दिर बनावत ह

24 योआस जब राजा बना सात बरिस क राहा। उ यरूसलेम में चालिस बरिस तलक सासन किहस। ओकरी महतारी क नाउँ सिब्या रहा। सिब्या बेर्सेबा नगर क रही। 2योआस उ काम जउन यहोवा क नज़र में नीक अहा तब तलक करत रहेन जब तलक याजक यहोयादा जितत रहा। 3यहोयादा योआस क बरे दुइ मेहररुअन चुनेस। योआस क पूत अउर बितियन रहिन।

4तब कछू समइ पाछे, योआस यहोवा क मन्दिर दुबारा बनावइ क निहचइ किहस। 5योआस याजकन अउ लेवीबंसियन क एक संग बोलाएस। उ ओनसे कहेस, “यहूदा क नगरन में जा अउर उ धने क बटोरा जेकर भुगतान इस्राएल क लोग हर बरिस करत हीं। उ धने क उपयोग परमेस्सर क मन्दिर दुबारा बनावइ में करो। हाली करा अउर एका पूरा कइ ल्या।” मुला लेवीबंसियन हाली नाहीं किहन।

6एह बरे राजा योआस मुख्य याजक, यहोयादा क बोलाएस। राजा कहेस, “यहोयादा, तू यहूदा अउ यरूसलेम स यहोवा क सेवक मोसा दुआरा कर क धन वसूलइ बरे लेवीबंसियन क नाहीं लिहा? मूसा अउर इस्राएल क लोग पवितर तम्बू बरे इ कर क धन क उपयोग किहे रहेन।”

7पुराने जमाने में अतल्याह क पूत, परमेस्सर क मन्दिर में जबरदस्ती घुस गए रहेन। उ पचे यहोवा क मन्दिर क पवितर चिजियन क उपयोग अपने बाल देवतन क पूजा क बरे किहस। अतल्याह एक ठु दुट्ट मेहरारु रही।

8राजा योआस एक ठु सन्दूख बनावइ क आदेस दिहेस अउर ओका यहोवा क मन्दिर क दुआरे क बाहेर रखइ क आदेस दिहस। 9तब लेविबंसियन यहूदा अउ यरूसलेम में इ घोसणा किहन। उ पचे लोगन स कर क धन यहोवा क बरे लिआवइ क कहेन। यहोवा क सेवक मूसा इस्राएल क लोगन स रेगिस्ताने में रहत समइ जउन कर क रुप में धन माँगे रहा ओतना ही इ धन अहइ। 10सबहि प्रमुख अउर सबहि लोग खुस रहेन। उ पचे धन लइके आपन अउर उ पचे ओका सन्दूखे में डाएन। उ पचे तब तलक देत रहेन जब तलक सन्दूख नाहीं भरि गवा। 11तब लेवीबंसियन क राजा क अधिकारियन क समन्वा सन्दूख लइ जाइ क पड़ी। उ पचे लखेन कि सन्दूख धन स भरि गवा ह। राजा क

सचिव अउर प्रमुख याजक क अधिकारी आएन अउर उ पचे धने क सन्दूख स निकारेन। तब उ पचे सन्दूख क अपनी जगहिया पइ फुन वापस लइ गएन। उ पचे बार-बार किहन अउर धन बटोरें। 12तब राजा योआस अउर यहोयादा उ धन ओन लोगन क दिहस जउन यहोवा क मन्दिर क बनावइ क कार्य करत रहेन अउर यहोवा क मन्दिर बनावइ में कार्य करइवालन यहोवा क मन्दिर क दुबारा बनावइ बरे कुसल बढई अउर काठे पइ खुदाई क कार्य करइवालन क मजदूरी पइ धरेन। उ पचे यहोवा क मन्दिर क दुबारा बनावइ बरे काँसे अउर लोहा क काम करइ क जानकारी रखइवालन क भी मजूरी पइ रखेन।

13काम क निगरानी रखइवाले मनई बहोत बिस्सास क जोगग रहेन। यहोवा क मन्दिर क दुबारा बनावइ गवा। उ पचे परमेस्सर क मन्दिर क पहिले क तरह ही बनाएन अउर इ पहिले स जियादा मजबूत बनाएन। 14जब कारीगरन कार्य पूरा कइ लिहिन तउ उ पचे उ धने क जउन बचा रहा राजा योआस अउर यहोयादा क लगे लइ आएन। उ पचे धन क उपयोग यहोवा क मन्दिर बरे चिजियन बनावइ बरे किहन। उ सबइ चिजियन मन्दिर क सेवाकार्य में अउर होमबलि चढ़ावइ में काम आवति रहिन। उ पचे खोरन अउर दूसर चिजियन क सोना अउ चाँदी स बनाएन। याजकन यहोवा क मन्दिर में हर एक दिन क होमबलि तब तलक चढ़ाएन जब तलक यहोयादा जितत रहा।

15यहोयादा बूढ़ा भवा। उ बहोत लम्बी उमिर बिताएस तब उ मरा। यहोयादा जब मरा, उ एक सौ तीस बरिस क रहा। 16लोगन यहोयादा क दाऊद क नगर में हुवाँ दफनाएन जहाँ राजा दफनाए जात हीं। लोगन यहोयादा क हुवाँ दफनाएन काहेकि अपनी जिन्गी में उ परमेस्सर अउ परमेस्सर क मन्दिर बरे बहोत अच्छे कार्य किहस।

17यहोयादा क मरई क पाछे यहूदा क प्रमुख आएन अउर उ पचे राजा योआस क समन्वा निहुरेन। राजा एन प्रमुखन क सुनेस। 18राजा अउ प्रमुखन उ यहोवा, परमेस्सर क मन्दिर क छोड़ दिहस जेकर अनुसरण ओनकर पुरखन करत रहेन। उ पचे असेरा स्तम्भ अउर दूसर मूरतियन क पूजा सुरू किहस। परमेस्सर यहूदा अउ यरूसलेम क लोगन पइ कोहाइ गवा काहेकि राजा अउ उ प्रमुखन अपराधी रहेन। 19परमेस्सर लोगन क लगे नबियन क ओनका यहोवा कईती लउटाइ क बरे पठएस। नबियन लोगन क चितउनी दिहिन। किन्तु लोग सुनइ स इन्कार कइ दिहिन।

20तब परमेस्सर क आतिमा याजक यहोयादा क पूत जकर्याह पइ उतरी। जकर्याह लोगन क समन्वा खड़ा भवा अउर उ कहेस, “जउन यहोवा कहत ह उ इ अहइ: ‘तू लोग यहोवा क आदेस पालन करइ स काहे इन्कार करत अहा? तू कामयाब नाहीं होब्या। तू यहोवा क तजा ह। एह बरे यहोवा भी तोहका छोड़ दिहस ह।”

21लेकिन लोग जकर्याह क खिलाफ योजना बनाएस। राजा जकर्याह क मार डावइ क आदेस दिहस, एह बरे उ पचे ओह पइ तब तलक पाथर मारेन जब तलक उ मर नाहीं गवा। लोगन इ मन्दिर क आँगन में किहन। 22राजा योआस अपने ऊपर यहोयादा क दयालुता क भी याद नाहीं

रखेन। यहोयादा जकर्याह क बाप रहा। मुला योआस यहोयादा क पूत जकर्याह क मार डाएस। मरइ क पहिले जकर्याह कहेस, “यहोवा ओह क लिखि जउन तू करत अहा अउर तोहका दण्ड देइ।”

23बरिस क आखीर में अराम क फउज योआस क खिलाफ आइ। उ पचे यहूदा अउ यरूसलेम पइ हमला किहन अउर लोगन क सबहिं प्रमुखन क मार डाएन। उ पचे सारी कीमती चिजियन दमिस्क क राजा क लगे पठइ दिहिन। 24अराम क फउज बहोत कम सैनिकन क संग आइ रही किन्तु यहोवा ओका यहूदा क बहोत बड़ी फउज क हरावइ दिहस। यहोवा इ एह बरे किहस कि यहूदा क लोग यहोवा परमेस्सर क तजि दिहिन जेकर अनुसरण ओनकर पुरखन करत रहेन। इ तरह योआस क सजा मिली। 25जब अराम क लोग योआस क छोड़ें, उ बुरी तरह घायल रहा। योआस क अपने सेवकन ओकरे खिलाफ योजना बनाएन। उ पचे अइसा एह बरे किहन कि योआस याजक यहोयादा क पूत जकर्याह क मार डाए रहा। सेवकन योआस क ओकरी अपनी चारपाई पइ मार डाएन। योआस क मरइ क पाछे लोग ओका दाऊद क नगर में दफनाएन। किन्तु लोग ओका उ जगहिया पइ नाहीं दफनाएन जहाँ राजा दफनाए जात हीं।

26जउन सेवकन योआस क खिलाफ योजना बनाएन, उ पचे इ सबइ अहई जाबाद अउ यहोजाबाद जाबाद क महतारी क नाउँ सिमात रहा। सिमात अम्मोन क रही। यहोजाबाद क महतारी क नाउँ सिम्रित रहा। सिम्रित मोआब क रही।

27योआस क पूतन क कथा, ओकर खिलाफ बहोत सारी भविस्सबाणियन अउर उ फुन परमेस्सर क मन्दिर कइसे बनाएस, “राजा लोगन क व्याख्या” नाउँ क किताबे में लिखा अहइ। ओकरे पाछे योआस क पूत अमस्याह नवा राजा भवा।

### यहूदा क राजा अमस्याह

**25** अमस्याह राजा बनई क समइ पचीस बरिस क रहा। उ यरूसलेम में उन्तीस बरिस तलक हुकूमत किहस। ओकरी महतारी क नाउँ यहोअद्दान रहा। यहोअद्दान यरूसलेम क रही। 2अमस्याह उहइ किहस जेका यहोवा नीक समुझत ह। मुला उ पूरे हिरदइ स नाहीं किहस। 3अमस्याह क हाथ में राजसत्ता सुदृढ़ होइ गइ। तब उ ओन अधिकारियन क मार डाएस जउन ओकरे बाप राजा क मारे रहेन। 4मुला अमस्याह ओन अधिकारियन क बच्चन क नाहीं मारेस। काहेकि उ मूसा क किताबे में लिखे नेमन क मानेस। यहोवा आदेस दिहे रहा, “पिता लोगन क अपने पूतन क पाप बरे नाहीं मरइ चाही। बच्चन अपने बाप क पापन क बरे नाहीं मरइ चाही। हर एक मनई क अपने खुद क पाप क बरे मरइ चाही।”

5अमस्याह यहूदा क लोगन क बटोरेंस। उ ओनके परिवार क एक तु बर्ग बनाएस अउर ओन बर्गन क अधिकारि सेनाध्यच्छ अउर नायक नियुक्त कीन्ह गएन। उ पचे प्रमुख यहूदा अउर बिन्यामीन क सबहिं फउजियन क

अधिकारी भएन। सबहिं लोग जउन फउजी होइ बरे चुने गएन, बीस बरिस क या ओहसे जियादा क रहेन। उ पचे सब तीन लाख प्रसिच्छित फउजी भालन अउर ढार क संग लड़इवालन रहेन। 6अमस्याह एक लाख फउजियन क इस्त्राएल स भाड़े पड़ रखेस। उ पउने पौने चार टन चाँदी क भुगतान ओन फउजियन क किराये पड़ लेइ बरे किहस। 7मुला परमेस्सर क एक मनई अमस्याह क लगे आवा। परमेस्सर क मनई कहेस, “राजा, अपने संग इस्त्राएल क सेना क न जाइ द्या। परमेस्सर इस्त्राएल क संग नाही अहइ। परमेस्सर एप्रैम क लोगन क संग नाही अहइ। 8हिआँ तलक कि अगर तू आपन आप क मज़बूत बनाइ लिहा अउर जुद्ध बरे तइयार होइ गवा, तउ भी परमेस्सर तोहका हराइ देब, कहेकि जीत अउर हार दुइनउँ यहोवा क मदद पड़ निर्भर करत ह।” 9अमस्याह परमेस्सर क मनई स कहेस, “किन्तु हमरे धने क का होइ जउन मई पहिले ही इस्त्राएल क फउज क दइ दिहे हउँ?” परमेस्सर क मनई जवाब दिहस, “यहोवा क लगे बहोत जियादा अहइ। उ ओहसे भी जियादा तोहका दइ सकत ह।”

10एह बरे अमस्याह इस्त्राएल क फउज क वापस घर एप्रैम क पठइ दिहस। उ सबइ लोग राजा अउर यहूदा क लोगन क खिलाफ बहोत कोहाइ गएन। उ पचे बहोत जियाद किरोधित होइके अपने घरे लउटेन।

11तब अमस्याह बहोत हिम्मती होइ गवा अउर उ अपनी फउज क एदोम देस में नमक क घाटी में लइ गवा। उ जगह पड़ अमस्याह क फउज सेईर क दस हजार फउजियन क मार डाएस। 12यहूदा क फउज सेईर स दस हजार मनई धरेस। उ सबइ ओन मनइयन एक ऊँच चोटि पड़ लइ गएन। उ सबइ लोग तब तलक जिअत रहेन। तब यहूदा क फउज ओन मनइयन क उ ऊँच चट्टान क चोटी स खाले लोकाइ दिहस अउर ओनकर तन खाले क चट्टानन पड़ ध्वस्त होइ गएन।

13किन्तु उहइ समइ इस्त्राएली फउज यहूदा क कछू नगरन पड़ हमला करत रही। उ सबइ सोमरोन स बेथोरोन नगर तलक क नगरन पड़ हमला करत रहेन। उ पचे तीन हजार लोगन क मार डाएन अउर उ पचे बहोत स कीमती चिजियन लइ गएन। उ फउजे क लोग एह बरे कोहान रहेन काहेकि अमस्याह ओनका जुद्ध में अपने संग सामिल नाही होइ दिहस।

14अमस्याह एदोमी लोगन क हरावइ क पाछे घरे लउटा। उ सेइर क लोगन क ओन देवमूरतियन क लिआवा जेनकर उ पचे पूजा करत रहेन। अमस्याह ओन देवमूरतियन क पूजब सुरु किहस। उ ओन देवतन क प्रणाम किहस अउर ओनका सुगन्धि भेंट किहस। 15यहोवा अमस्याह पड़ बहोत कोहाइ गवा। यहोवा अमस्याह क लगे एक नबी पठाएस। नबी कहेस, “अमस्याह, तू ओन देवतन क काहे पूजा किहा जेनका उ सबइ लोग पूजत रहेन? उ सबइ देवता तउ अपने लोगन क भी तोहसे रच्छा न कइ सकेन।”

16जब नवी इ बोला, अमस्याह नवी स कहेस, “हम लोग तोहका कबहुँ राजा क सलाहकार नाही बनावा। चुप रहा, जदि तू चुप नाही रह्या तउ मार डावा जब्या।” नबी

चुप होइ गवा, मुला उ तब कहेस, “परमेस्सर फुरइ तोहका नस्ट करइ क निहचइ कइ लिहस ह। काहेकि तू बुरी बातन करत अहा अउर मोर सलाह नाही सुनत्या।”

17यहूदा क राजा अमस्याह अपने सलाहकार क संग सलाह किहस। तब उ योआस क लगे सँदिसा पठाएस। अमस्याह योआस स कहेस, “हम लोग आपने आमने-सामने मिलइ द्या।” योआस यहोआहाज क पूत रहा। यहोआहाज येहू क पूत रहा। येहू इस्त्राएल क राजा रहा।

18तब योआस अपना जवाब अमस्याह क पठाएस। योआस इस्त्राएल क राजा रहा अउर अमस्याह यहूदा क राजा रहा। योआस इ कथा सुनाएस: “लबानोन क एक तु नान्ह कँटेहरी झाड़ी लबानोन क एक बिसाल देवदारु क बृच्छ क सँदिसा, पठाएस। नान्ह कँटेहरी झाड़ी कहेस, ‘अपनी बिटिया क बियाह मोरे पूत क सँग कइ द्या,’ मुला एक तु जंगली जनावर निकरा अउर उ कँटेहरी झाड़ी क कुचरेस अउर ओका नस्ट किहस। 19तू कहत ह, ‘मई एदोम क हराएँ ह।’ तोहका ओकर घमण्ड अहइ अउर ओकर डींग हँकत अहा। मुला तोहका घरे में घुसा रहइ चाही। तोहका खतरा मोल लेइ क जरूरत नाही अहइ। जदि तू मोहसे जुद्ध करब्या तउ तू अउर यहूदा नस्ट होइ जइहीं।”

20मुला अमस्याह सुनइ स इन्कार कइ दिहस। इ परमेस्सर कइँती स भवा। परमेस्सर यहूदा क इस्त्राएल क जरिये हरावइ क योजना बनाएस काहेकि यहूदा क लोग ओन देवतन क अनुसरण करत रहेन जेनकर अनुसरण एदोम क लोग करत रहेन। 21एह बरे इस्त्राएल क राजा योआस बेतसेमेस नगर में यहूदा क राजा अमस्याह स आमने-सामने मिला। बेतसेमेस यहूदा में अहइ। 22इस्त्राएल यहूदा क हराएस। यहूदा क हर एक मनई अपने घरन क पराइ गवा। 23योआस अमस्याह क बेतसेमेस में धरेस अउर ओका यरूसलेम लइ गवा। अमस्याह क बाप क नाउँ योआस रहा। योआस क बाप क नाउँ यहोआहाज रहा। योआस छःसौ फुट लम्बी यरूसलेम क उ देवार क जउन एप्रैम फाटक स कोने क फाटक तलक रही, गिराइ दिहस। 24तब योआस परमेस्सर क मन्दिर क सोना, चाँदी अउ कइउ दूसर सामान लइ लिहस। ओबेदेदोम मन्दिर में ओन चिजियन क सुरच्छा क जिम्मेदार रहा। मुला योआस ओन सबहिं चिजियन क टाइ लिहस। योआस राजमहल स भी कीमती चिजियन क लिहस। तब योआस कछू लोगन क बन्दी क रूप में लिहा अउर सोमरोन लउटि गवा।

25अमस्याह योआस क मरइ क पाछे पन्द्रह बरिस जिअत रहा। अमस्याह क बाप यहूदा क राजा योआस रहा। 26अमस्याह सुरु स आखीर तलक दूसर जउन कछू किहस उ सब, “इस्त्राएल अउर यहूदा क राजा क इतिहास” नाउँ क किताबे में लिखा अहइ। 27जब अमस्याह यहोवा क आग्या क पालन करब तजि दिहस, यरूसलेम क लोग ओकरे खिलाफ एक ठु योजना बनाएन। उ लाकीस नगर क पराइ गवा। किन्तु लोग लाकीस में मनइयन क पठाएन अउर उ पचे अमस्याह क हुवाँ मार डाएन। 28तब उ पचे अमस्याह क लहासे क घोड़न पड़ लइ गएन अउर ओका ओकरे पुरखन क संग दाऊद नगर में दफनाएन।

### यहूदा क राजा उज्जियाह

**26** तब यहूदा क लोग अमस्याह क जगह पड़ नवा राजा होइ क बरे उज्जियाह क चुनेन। अमस्याह उज्जियाह क बाप रहा। जब इ भवा तउ उज्जियाह सोलह बरिस क राह। 2उज्जियाह एलोट नगर क दुबारा बनाएस अउर एका यहूदा क लउटाइ दिहस। उज्जियाह इ अमस्याह क मरि जाइ अउ पुरखन क संग ओकरे दफनाए जाइ क पाछे किहस।

3उज्जियाह जब राजा भवा तउ उ सोलह बरिस क रहा। उ यरूसलेम में बावन बरिस तलक राज्ज किहस। ओकर महतारी क नाउँ यकील्याह रहा। यकील्याह यरूसलेम क रही। 4उज्जियाह उ कामन किहस जेका यहोवा नीक समुझत ह। उ यहोवा क अनुसरण वइसा ही किहस जइसे ओकर बाप अमस्याह किहे रहा। 5उज्जियाह परमेस्सर क अनुसरण जकर्याह क जीवन-काल में किहस। जकर्याह उज्जियाह क सिच्छा दिहस कि परमेस्सर क सम्मान अउ ओकरी आग्या क पालन कइसे कीन्ह जात ह। जब उज्जियाह यहोवा क आग्या क पालन करत रहा तब परमेस्सर ओका कामयाबी दियाएस।

6उज्जियाह पलिस्ती लोगन क खिलाफ एक जुद्ध किहस। उ गत, यब्ने, अउर असदोद नगर क देवारन क गिराइ दिहस। उज्जियाह अस्दोद नगर क लगे अउर पलिस्ती लोगन क बीच दूसर जगहन में नगर बसाएस। 7परमेस्सर उज्जियाह क पलिस्तियन अउर अरबियन जउन गुर्बाल नगर में रहत रहेन अउर मूनियन क खिलाफ जुद्ध करइ में मदद किहेन। 8अम्मोनी उज्जियाह क नज़राना (कर) देत रहेन। उज्जियाह क नाउँ मिस्त्र क सीमा तलक प्रसिद्ध होइ गवा। काहेकि उ बहोत सक्तीसाली रहा।

9उज्जियाह यरूसलेम में कोने क फाटक पड़, घाटी क फाटक पड़ अउर देवारे क मुड़इ क जगहन पड़ मीनारन बनावास। उज्जियाह ओन मीनारन क दृढ़ बनाएस। 10उज्जियाह मीनारन क रेगिस्ताने में बनाएस। उ बहोत स कुएँ भी खोदवास। ओकरे लगे पहाड़ी देसन अउर मइदानी छेत्र में बहोत स गोरूअन रहेन। उज्जियाह क लगे पर्वतन में अउर जहाँ अच्छी उपज होत रही, उ भुइँया में किसान रहेन। उ अइसे मनइयन क भी रखे भए रहा जउन ओन खेतन क रखवारी करत रहेन जेनमाँ अंगूर रहेन। ओका खेती स पिरेम रहा।

11उज्जियाह क लगे प्रसिच्छित फउजियन क एक फउज रही। उ सबइ फउजी सचिव यीएल अउर अधिकारी मासेयाह जरिये बर्गन में बेटे रहेन। हनन्याह ओनकर प्रमुखन रहा। यीएल अउर मासेयाह ओन फउजियन क गनेस अउर ओनका बर्गन में रखेस। हनन्याह राजा क अधिकारियन में स एक रहा। 12फउजियन क ऊपर दुइ हजार छः सौ प्रमुखन रहेन। 13उ पचे परिवार परिवार प्रमुखन तीन लाख सात हजार पाँच सौ मनसेधुअन क उ फउज क अधिपति रहेन जउन बड़की सक्ती स लड़त रहिन। उ सबइ फउजी राजा क दुस्मनन क बिरुद्ध मदद करत रहेन। 14उज्जियाह फउज क ढार, भालन, टोप, कवच, धनुस अउ गुलेलन बरे पाथर दिहे रहा। 15यरूसलेम में उज्जियाह जउन यन्त्र बनाएस

उ बुद्धिमानन क आविस्कार रहेन। उ सबइ यन्त्र मीनारन अउ कोने क देवारन पड़ रखे गए रहेन। इ सबइ यन्त्र क बड़के पाथर लोकावइ अउर बाण चलावइ बरे प्रयोग रहेन। उज्जियाह प्रसिद्ध होइ गवा। लोग ओकर नाउँ दूर-दूर क देसन में जानत रहेन। ओकरे लगे बड़की मदद रही अउर उ सक्तीसाली राजा होइ गवा।

16किन्तु जब उज्जियाह सक्तीसाली होइ गवा, तउ ओकर घमण्ड ओकरे नस्ट क कारण बनेस। उ यहोवा आपन परमेस्सर यहोवा क मन्दिर में वेदी पड़ सुगन्धित बारइ बरे जाइ क धोका दिहस। 17याजक अजर्याह अउर यहोवा क अस्सी हिम्मती याजक सेवक उज्जियाह क पाछे मन्दिर में गएन। 18उ पचे उज्जियाह स कहेन कि तू गलत अहा। उ पचे ओहसे कहेन, “उज्जियाह यहोवा क बरे सुगन्धि बारब तोहार काम नहीं अहइ। याजक, हारून क संतान ही सिरिफ यहोवा बरे सुगन्धि बारत हीं। एन याजकन क सुगन्धि बारइ क पवितर सेवा क बरे प्रसिच्छण दीन्ह गवा अउर समर्पित कीन्ह गवा ह। सब स जियादा पवितर ठउर स बाहेर निकरि जा तू यहोवा परमेस्सर क धोका देत ह। उ तोहका एकरे बरे सम्मान नहीं देइ।”

19मुला उज्जियाह कोहाइ गवा। ओकरे हाथे में सुगन्धि बारइ बरे एक ठु खोरा रहा। जउने समइ उज्जियाह याजकन पड़ बहोत कोहाइ गवा, उहइ समइ माथे पड़ कोढ़ होइ गवा। इ याजकन क समन्वा यहोवा क मन्दिर में सुगन्धि बारइ क वेदी क लगे भवा। 20प्रमुख याजक अजर्याह अउ सबहिं याजकन उज्जियाह क लखेन। उ पचे ओकरे माथे पड़ कोढ़ देखत रहेन। याजकन हाली स उज्जियाह क मन्दिर स बाहेर जाइ क मजबूर किहन। उज्जियाह खुद ही हाली स बाहेर गएस काहेकि यहोवा ओका सजा दइ दिहे रहा। 21राजा उज्जियाह मउत तलक कोढ़ी रहा। उ यहोवा क मन्दिर में प्रवेस नहीं कइ सकत रहा। उ दूसर घरन स दूर एक अलग घरे में रहेन। उज्जियाह क पूत योताम राजमहल क कब्जा में रखेस अउर लोगन क प्रसासक रहेन।

22उज्जियाह सुरु स लइके आखीर तलक जउन कछू किहस उ यसायाह नबी क जरिये लिखा गवा। यसायाह क बाप यामोस रहा। 23उज्जियाह मरा अउर अपने पुरखन क लगे दफनावा गवा। उज्जियाह क राजा लोगन क कब्रिस्तान क लगे मैदान में दफनावा गवा। काहे? काहेकि लोग कहेन, “उज्जियाह क कोढ़ अहइ।” योताम उज्जियाह क जगह पड़ नवा राजा भवा। योताम उज्जियाह क पूत रहा।

### यहूदा क राजा योताम

**27** योताम पचीस बरिस क रहा जब उ राजा भवा। उ सोलह बरिस तलक यरूसलेम में हुकूमत किहस। ओकरी महतारी क नाउँ यरूसा रहा। यरूसा सादोक क बिटिया रही। 2योताम उ काम किहस जेका यहोवा नीक समुझत ह। उ परमेस्सर क आग्या क पालन वइसे ही किहस जइसे ओकर बाप उज्जियाह किहे रहा। मुला योताम यहोवा क मन्दिर में सुगन्धि बारइ क बरे उहइ तरह नहीं घुसा जइसे ओकर बाप घुसा रहा। मुला लोग बुरा काम करब जारी रखेन। 3योताम यहोवा क मन्दिर क ऊपरी दुआर

क दुबारा बनाएँ। उ ओपेल नाउँ क जगह पइ बहोत स निर्माण कार्य सुरू किहस। 4योताम यहूदा क पहाड़ी पहुँटा में नगर बनाएँ। योताम मीनार अउर किलन जंगलन में बनाएँ। 5योताम अम्मोनी लोगन क राजा अउर ओकरी फउज क खिलाफ लड़ा अउ ओनका हराएँ। एह बरे हर साल तीन बरिस तलक अम्मोनी लोग योताम क पौने चार टन चाँदी, बासठ हजार बुसल गोहूँ अउर बासठ बुसल जौ देत रहेन।

6योताम सक्तीसाली होइ गवा काहेकि उ बिस्सास पूर्वक यहोवा, अपने परमेस्सर क आग्या क पालन किहस। 7योताम दूसर जउन कछू भी किहस अउ ओकर सबहिं जुद्ध “यहूदा अउ इस्राएल क राजा लोगन क इतिहास” क पुस्तक में लिखे भए अहई। 8योताम जब राजा भवा, पच्चीस बरिस क रहा। उ यरूसलेम में सोलह बरिस हुकूमत किहस। 9तब योताम मरा अउर अपने पुरखन क संग दफनावा गवा। लोग ओका दाऊद क नगर में दफनाएँ। योताम क जगह पइ आहाज राजा भवा। आहाज योताम क पूत रहा।

### यहूदा क राजा आहाज

**28** आहाज बीस बरिस क रहा जब उ राजा भवा। उ यरूसलेम में सोलह बरिस तलक राज् किहस। आहाज उ नाहीं किहस जेका ओकर पुरखन दाऊद किहस जेका यहोवा नीक समुझत ह। 2आहाज इस्राएली राजा लोगन क बुरे उदाहरणन क अनुसरण किहस। उ बाल-देवता क पूजा क बरे मूरतियन क बनावइ क बरे साँचे क उपयोग किहस। 3आहाज हिन्नोम क घाटी में सुगन्धि बारेस। उ अपने पूतन क आगी में जराइके बलि भेंट किहस। उ उ सबइ सब भयंकर पाप किहस जेका उ पहुँटा में रहइवाले मनइयन किहे रहेन। ओन सबइ पापन क करण यहोवा ओन मनइयन क बाहेर जाइ क मजबूर किहे रहा जब इस्राएल क लोग उ भुइँया में आएँ रहेन। 4आहाज बलि भेंट किहस अउर सुगन्धि क ऊँची जगहियन अर्थात पहाड़ियन अउर हर एक हरियर बृच्छ क खाले बारेस।

5आहाज पाप किहस, एह बरे यहोवा, ओकर परमेस्सर अराम क राजा क ओका पराजित करइ दिहस। अराम क राजा अउर ओकर फउज आहाज क हराएँ अउर यहूदा क अनेक लोगन क बन्दी बनाएँ। अराम क राजा ओन बन्दिन क दमिस्क नगर क लइ गवा। यहोवा इस्राएल क राजा अउर रमल्याह क पूत पेकह क भी आहाज क पराजित करइ दिहस। 6पेकह अउर ओकर फउज एक दिन में यहूदा क एक लाख बीस हजार बीर फउजियन क मार डाएँ। पेकह यहूदा क ओन लोगन क एह बरे हराएँ कि उ पचे उ यहोवा, परमेस्सर क आग्या क पालन करइ बन्द कइ दिहस जेकर आग्या ओनकर पुरखन मानत रहेन। 7जिक्री एप्रैमी क एक बीर सिपाही रहा। जिक्री राजा आहाज क पूत मासेयाह अउ राजमहल क सरंछक अधिकारी अज्रीकाम अउ एलकाना क मार डाएँ। एलकाना राजा क ठीक पाछे दूसर सक्ती रहा।

8इस्राएल क फउज यहूदा में रहइवाले दुइ लाख अपने निचके सम्बन्धियन क धरेस। उ पचे मेहररुअन, बच्चन

अउर यहूदा स बहोत कीमती चिजियन लिहस। इस्राएली ओन बन्दिन अउर ओन चिजियन क सोमरोन नगर क लइ आएँ। 9मुला हुवाँ यहोवा क एक नबी रहा। इ नबी क नाउँ ओदेद रहा। ओदेद इस्राएल क इ सेना स मिला जउन सोमरोन लउटि आइ। ओदेद इस्राएल क सेना स कहेस, “यहोवा परमेस्सर जेकर आग्या तोहरे पुरखन मानेन, तोहका यहूदा क लोगन क हरावइ दिहन काहेकि उ ओन पइ कोहान रहा। तू लोग यहूदा क लोगन क बहोत क्रूरता स मारया अउर दण्डित किहा। अब परमेस्सर तू पचनपइ कोहान अहइ। 10तू पचे यहूदा अउ यरूसलेम क लोगन क दास क तरह रखइ क जोजना बनावत अहा। तू लोग भी यहोवा, अपने परमेस्सर क बिरुद्ध पाप किहा ह। 11अब मोर सुना। अपने जउने भाई बहिनियन क तू लोग बन्दी बनाया ह ओनका वापस कइ दया। इ करा काहेकि यहोवा क भयंकर किरोध तोहरे पचनक बिरुद्ध अहइ।”

12तब एप्रैम क कछू प्रमुखन इस्राएल क फउजियन क जुद्ध स लउटिके घर आवत लख्या। उ सबइ प्रमुखन इस्राएल क फउजियन स मिलेन अउर ओनका चितउनी दिहन। उ पचे प्रमुख योहानान क पूत अजय्याह, मसिल्लेमोत क पूत बेरेक्याह, सल्लूम क पूत यहिजकिय्याह अउर हदलै क पूत अमासा रहेन। 13ओन प्रमुखन इस्राएली फउजियन स कहेन, “यहूदा क बन्दिन क हिआँ जिन लिआवा। जदि तू इ करत अहा तउ इ हम लोगन क यहोवा क बिरुद्ध बुरा पाप कराइ। उ हमरे पाप अउर अपराध क अउर जियादा बुरा करी अउ यहोवा इस्राएलियन क बिरुद्ध बहोत कोहान होइ।”

14एह बरे फउजियन बन्दिन अउ कीमती चिजियन क ओन प्रमुखन अउ इस्राएल क लोगन क दइ दिहस। 15उ सबइ प्रमुखन खड़े भएँ अउर उ पचे बन्दिन क मदद किहन। एन चारिहुँ मनइयन ओन ओढनन क लिहन जउन इस्राएली फउज लिहे रही अउर एका ओन लोगन क दिहस जउन नंगे रहेन। ओन प्रमुख ओन लोगन क जूते भी दिहन। उ पचे यहूदा क बन्दिन क कछू खाइ अउर पिअइ क दिहन। उ पचे ओन लोगन क ओकर घाव क नरम करइ बरे अउ उपचार बरे तेल मलेन। तब एप्रैम क प्रमुख लोग कमजोर बन्दिन क गदहन पइ चढ़ाएँ अउर ओनका ओनके घर खजूर क बृच्छ क नगर यरीहो में ओनके परिवारन क लगे लइ गएँ। तब उ सबइ चारिहुँ प्रमुख अपने घर सोमरोन क लउटि गएँ।

16-17उहइ समइ, एदोम क लोग फुन आएँ अउर उ पचे यहूदा क लोगन क हराएँ। एदोमी लोग लोगन क बन्दी बनाएँ अउर ओनका बन्दी क रुप में लइ गएँ। एह बरे राजा आहाज अस्सूर क राजा स मदद माँगैस। 18पलिस्ती लोग भी पहाड़ी क नगरन अउर दक्खिन यहूदा पइ हमला किहन। पलिस्ती लोग बेतसेमेस, अथ्यालोन, गदरोत, सोको, तिम्ना अउर गिमजो नाउँ क नगरन पइ कब्जा कइ लिहन। उ पचे ओन नगरन क लगे क गाँवन पइ भी कब्जा कइ लिहन। तब ओन नगरन में पलिस्ती रहइ लागेन। 19यहोवा यहूदा बरे परेसानियन लाएँस काहेकि यहूदा क राजा आहाज यहूदा क लोगन क पाप करइ क बरे

प्रोत्साहित किहस। उ यहोवा क धोखा दिहस। 20अस्सूर क राजा तिलगतपिलनेसेर आवा अउर आहाज क मदद देइ क जगह पइ उ परेसानी दिहस। 21आहाज कछू कीमती चिजियन यहोवा क मन्दिर, राजमहल अउ राजकुमार भवन स एकट्ठा किहस। आहाज उ सबइ चिजियन अस्सूर क राजा क दिहस। किन्तु उ आहाज क मदद नहीं दिहस।

22आहाज क परेसानियन क समइ मैं उ अउर जियादा बुरे पाप किहस अउर यहोवा क अउर जियादा अबिस्सास जोगग बन गवा। 23उ दमिस्क क लोगन क जरिये पूजे जाइवाले देवतन क बलि भेंट किहस। दमिस्क क लोग आहाज क पराजित किहे रहेन। एह बरे उ मन ही मन सोचे रहा, “अराम क लोगन क देवतन क पूजा ओनका मदद दिहस। जदि मई ओन देवतन क बलि भेंट करउँ तउ संभव अहइ, उ पचे मोर भी मदद करई।” आहाज ओन देवतन क पूजा किहस। किन्तु एँकर बवले ओका अउर इस्त्राएल क लोगन क पतन क कारण बनेस।

24आहाज यहोवा क मन्दिर स चिजियन बटोरेस अउर ओनकर टूकन कइ दिहस। तब उ यहोवा क मन्दिर क दरवाजन क बन्द कइ दिहस। उ वेदियन बनाएस अउर यरूसलेम मैं सड़क क हर मोड़ पइ ओनका रखेस। 25आहाज यहूदा क हर नगर मैं दूसर देवतन क पूजा अउर धूपबलि क बारइ बरे जँची जगह बनाएस। आहाज यहोवा ओकरे पिता क परमेस्सर क बहोत किरोधित कइ दिहस।

26आहाज सुरु स आखीर तलक जउन कछू दूसर किहस उ “यहूदा अउ इस्त्राएल क राजा लोगन क इतिहास” नाउँ क किताबे मैं लिखा अहइ। 27आहाज मरा अउर अपने पुरखन क संग दफनावा गवा। लोग आहाज क यरूसलेम नगर मैं दफनाएन। किन्तु उ पचे आहाज क उहइ कब्रिस्तान मैं नहीं दफनाएन जहाँ इस्त्राएल क राजा दफनाएन गए रहेन। आहाज क जगह पइ ओकर पूत हिजकिय्याह नवा राजा बना।

### यहूदा क राजा हिजकिय्याह

**29** हिजकिय्याह जब पच्चीस बरिस क रहा, राजा भवा। उ उनतीस बरिस तलक यरूसलेम मैं हुकूमत किहस। जकर्याह क बिटिया अबिव्याह ओकरी महतारी रही। 2हिजकिय्याह उहइ किहस जेका ओकर पुरखा दाऊद किहस अउर जेका यहोवा नीक समुझत अहा।

3हिजकिय्याह यहोवा क मन्दिर क दरवाजन क जोड़ेस अउर ओनका मज़बूत किहस। हिजकिय्याह मन्दिर क फुन खोलेस। उ राजा होइ क पाछे, बरिस क पहिले महीने मैं इ किहस। 4हिजकिय्याह याजकन अउ लेवीबंसियन क एक बैठक मैं एक संग बइठाएस। उ मन्दिर क पूरब क दिसा मैं खुले अँगना मैं ओनके संग बैठक मैं सामिल भवा। 5हिजकिय्याह ओनसे कहेस, “मोर सुना, लेवीबंसियो। पवितर सेवा बरे अपने क तइयार करा। आपन आपका अउर यहोवा आपन पुरखन क परमेस्सर क मन्दिर क पवितर सेवा बरे तइयार करा। असुद्ध चिजियन क पवितर जगह स हटाइ द्या। 6हम लोगन क पुरखन, यहोवाह हम लोगन क परमेस्सर क धोखा दिहन। उ पचे उ काम किहेन जेका उ

बुरा समुझेन। उ पचे ओका छोड़ दिहस अउर आपन मुँह यहोवा क मन्दिर क ओर स दूर फरि लिहस। उ पचे आपन पीठ ओकर कइँती कइ दिहस। 7उ पचे मन्दिर क सुआगत कच्छ क दखाजे क बन्द कइ दिहन अउर दीपकन क बुझाइ दिहन। उ पचे सुगन्धि क बारब अउर इस्त्राएल क परमेस्सर क पवितर ठउर मैं होमबलि भेंट करब बन्द कइ दिहन। 8एह बरे, यहोवा यहूदा अउ यरूसलेम क लोगन पइ बहोत किरोधित भवा। यहोवा ओन लोगन क भयभीत अउर चकित दण्ड दिहस। तू अपनी आँखिन स एका लखि सकत ह। 9इहइ कारण अहइ कि हमार पुरखन जुद्ध मैं मारे गएन। हमरे पूत, बिटियन अउर मेहररुअन बन्दी बनाई गइन। 10एह बरे मई हिजकिय्याह इ निहचइ किहेउँ ह कि मई यहोवा, इस्त्राएल क परमेस्सर क संग एक वाचा करउँ। तब उ हम लोगन पइ आगे किरोधित नहीं होब। 11एह बरे मोर पूतन तू लोग सुस्त जिन हवा या अउर जियादा समइ नस्ट न करा। यहोवा तू लोगन क अपनी सेवा करे चुनेस ह। तू पचन्क ओकर सेवा करइ चाही अउर ओकरे बरे सुगन्धि बारइ चाही।”

12ओन लेवीबंसियन क इ सूची अहइ जउन हुवाँ रहेन अउर जउन कार्य सुरु किहन। कहाती परिवार क अमासै क पूत महत अउर अजर्याह क पूत योएल रहेन। मरारीत परिवार क अब्दी क पूत कीस अउर यहल्लेलेल क पूत अजर्याह रहेन। गोसोनी परिवार स जिम्मा क पूत योआह अउर योआह क पूत एदेन रहेन। 13एलिसापान क संतानन मैं स सिम्री अउर यूएल रहेन। आसाप क संतानन मैं जकर्याह अउर मत्न्याह रहेन। 14हेमान क संतानन मैं स यहूएल अउर सिमी रहेन। यदूतन क संतानन मैं स समायाह अउर उज्जीएल रहेन। 15तब एन लेवीबंसियन अपने भाइयन क एकट्ठा किहन अउर मन्दिर मैं पवितर सेवा बरे अपने क तइयार किहस। उ पचे राजा क ओन आदेसन क पालन किहन जउन यहोवा क लगे स आए रहेन। उ पचे यहोवा क मन्दिर मैं ओका स्वच्छ करइ गएन। 16याजक यहोवा क मन्दिर क भीतरी भाग मैं ओका स्वच्छ करइ गएन। उ पचे सभी असुद्ध चिजियन क बाहेर निकारेन जेनका उ पचे मन्दिर मैं पाएन। उ पचे असुद्ध चिजियन क यहोवा क मन्दिर क आँगन मैं लइ आएन। तब लेवीबंसी असुद्ध चिजियन क यहोवा क मन्दिर क अंगना मैं लइ आएन। तब लेवीबंसी असुद्ध चिजियन क किद्रोन क घाटी मैं लइ गएन। 17पहिले महीने क पहिले दिन लेवीबंसी अपने आपका पवितर करइ सुरु कइ दिहन। महीने क अठएँ दिन लेवीबंसी यहोवा क मन्दिर क दुआर मण्डप मैं आएन। आठ दिन अउर, उ पचे यहोवा क मन्दिर क पवितर करइ क कार्य जारी रखेन। उ पचे पहिले महीने क सोलहवें दिन इ काम पूरा किहन।

18तब उ पचे राजा हिजकिय्याह क लगे वापिस गएन। उ पचे ओहसे कहेन, “राजा हिजकिय्याह, हम लोग यहोवा क पूरे मन्दिर क साथ ही होमबलि चढ़ावइ बरे वेदी क भी ओकर सबइ बरतन क संग सुद्ध कइ दिहने। हम लोग पवितर रोटी प्रदर्सित करइवाले मेज अउ ओकरे बरे उपयोग मैं आवइवाली सबहि चिजियन क स्वच्छ कइ दिहने। 19ओन दिनन जब आहाज राजा रही उ परमेस्सर क बरे विरोध

किहस। उ बहोत स चिजियन हटाइ दिहे रहेन जउन मन्दिरे में रहिन। मुला हम लोग फुन ओन चिजियन क रख दिहा ह अउर ओनका पवित्तर कार्य बरे सुदुध कइ दिहा ह। उ पचे अब यहोवा क वेदी क समन्वा अहई।”

20राजा हिजकिय्याह नगर अधिकारियन क एकट्टा किहस अउर अगले भिंसारे उ यहोवा क मन्दिर गवा। 21उ सबइ सात तु बर्धा, सात तु भेइन, सात तु मेमनन अउ सात तु नान्ह बोकसन लिआएन। उ सबइ जनावर यहूदा क राज क पापबलि बरे पवित्तर जगह अउ यहूदा क लोगन बरे रहेन। राजा हिजकिय्याह याजकन क जउन हारून क संतान रहेन, आदेस दिहस कि उ पचे ओन जनावरन क यहोवा क वेदी पइ चढ़ावई। 22एह बरे याजक लोग बर्धन क मार डाएन अउर ओनकर रक्त धइ लिहन। तब उ पचे बर्धन क रक्त वेदी पइ छिछकारेन। तब याजक लोग भेइन क मारेन अउर वेदी पइ भेइन क रक्त छिछकारेन। तब याजक लोग मेमनन क मारेन अउर ओनकर रक्त वेदी पइ छिछकारेन। 23-24तब याजक लोग बोकसन क राजा अउर एक संग एकट्टे लोगन क समन्वा लिआएन। बोकसन पापबलि रहेन। याजक लोग अपने हाथे बोकसन पइ धरेन अउर ओनका मारेन। याजक लोग बोकसन क रक्त स वेदी पइ पापबलि चढ़ाएन। उ पचे इ एह बरे किहन कि यहोवा इस्त्राएल क लोगन क छिमा कइ देइ। राजा कहेस कि होमबलि अउ पापबलि इस्त्राएल क सबहि लोगन क बरे होइहीं।

25राजा हिजकिय्याह लेवीबंसियन क यहोवा क मन्दिर में मंजीरन, तम्बूरन अउ वीणा क संग रखेन जइसा दाऊद, राजा क द्रस्टा गाद अउर नातान नबी आदेस दिहे रहा। इ आदेस यहवो क हिओँ स ओकर नबियन क जरिये स आवा रहा। 26इ रतह लेवीबंसी, दाऊद क गीत क बाजन क संग, अउर याजक अपनी तुरहियन क संग खड़े भएन।

27तब हिजकिय्याह होमबलि क बलि वेदी पइ चढ़ावइ क बरे आदेस दिहस। जब होमबलि देब सुरू भवा, यहोवा बरे गायन भी सुरू भवा। तुरहियन बजाई गइन अउर इस्त्राएल क राजा दाऊद क वाद्ययंत्र बजेन। 28सारी सभा दण्डवत किहस, गायकन गाएन अउर तुरही वादकन अपनी तुरहियन तब तलक बजाएन जब तलक होमबलि क चढ़ावा जाब पूरा नाहीं भवा।

29बलिदानन क पूरे होइ क पाछे राजा हिजकिय्याह अउर ओकरे संग क सबहि लोग निहुरेन अउर उ पचे उपासना किहन। 30राजा हिजकिय्याह अउर ओकर अधिकारि लोग लेवीबंसियन क यहोवा क स्तुति क आदेस दिहन। उ पचे ओन गीतन क गाएन जेनका दाऊद अउर द्रस्टा आसाप लिखे रहा। उ पचे यहोवा क स्तुति किहन अउर प्रसन्न भएन। उ पचे सबहि निहुरेन अउर उ पचे यहोवा क उपासना किहस। 31हिजकिय्याह कहेस, “यहूदा क लोगो, अब तू लोग खुद क यहोवा क अर्पित कइ चुका अहा। निचके आवा, बलि अउ धन्यवाद क भेंट यहोवा क मन्दिर में लिआवा।” तब लोग बलि अउ धन्यवाद क भेंट लिआएन। कउनो मनई, जउन चाहत रहा, उ होमबलि भी लिआवा। 32सभा क जरिये मन्दिर में लाइ गइ होमबलियन क संख्या इ रहा: सत्तर बर्धा, सौ भेइन अउर दुई सौ मेमनन। इ सबइ

सबहि जनावर यहोवा क होमबलि क रूप में बलि कीन्ह गएन। 33यहोवा क बरे पवित्तर भेंटन छ: सौ बर्धन अउर तीन हजार भेड़ी बोकसन रहेन। 34मुला हुवाँ होमबलि बरे चढ़ावा गवा जनावरन क खाल उतारइ अउर ओका काटइ बरे प्रयाप्त याजकन नाहीं रहेन। एह बरे ओनकर सम्बन्धी लेवीबंसियन ओनकर मदद तब तलक किहन जब तलक काम पूरा न भवा अउर जब तलक दूसर याजक अपने क पवित्तर फउज क बरे तइयार न कइ सकेन। लेवीबंसी यहोवा क सेवा बरे अपने क तइयार करइ में जियादा याजकन क अपेच्छा जियादा लगनसील रहेन। 35हुवाँ अनेक होमबलि, मेलबलि क चर्बी अउ पेय भेंट चढ़िन। इ तरह यहोवा क मन्दिर में सेवा फुन सुरु भइ। 36हिजकिय्याह अउर सबहि लोग ओन चिजियन क बरे खुस रहेन जेनका यहोवा अपने लोगन क बरे बनाएस अउर उ सबइ खुस रहेन कि उ पचे ओनका ऐतनी हाली स किहन।

### हिजकिय्याह फसह पर्व मनावत ह

30 हिजकिय्याह इस्त्राएल अउ यहूदा क सबहि लोगन क सँदेसा पठाएस। उ एप्रैम अउ मनस्से क लोगन क भी पत्र लिखेस। हिजकिय्याह ओन सबहि लोगन क यरूसलेम में यहोवा क मन्दिर में आवइ बरे न्यौतेस जेहसे उ सबइ सबहि फसहपर्व यहोवा, इस्त्राएल क परमेस्सर बरे मनाइ सकई। 2हिजकिय्याह आपन सबहि अधिकारियन अउ यरूसलेम क सभा क संग फसह पर्व दूसरे महीने में मनावइ बरे राजी होइ गएन। 3उ सबइ फसह पर्व क नियमित समइ स न मनाइ सकई। काहे? काहेकि प्रायाप्त संख्या में याजक पवित्तर सेवा बरे अपने आप क तइयार नाहीं किहे रहा अउर दूसर कारण इ रहा कि लोग यरूसलेम में एकट्टे न होइ सके रहेन। 4इ सुझाव राजा हिजकिय्याह अउर पूरी सभा क सन्तुट्ट किहस। 5एह बरे उ पचे इस्त्राएल में बेर्सेबा नगर स लइके लगातार दान तलक हर एक जगह पइ घोसणा किहन। उ पचे लोगन स कहेन कि उ पचे यरूसलेम में यहोवा, इस्त्राएल क परमेस्सर बरे फसह पर्व मनावइ आवई। इस्त्राएल क बहोत बड़का समूह बहोत समइ स फसह पर्व उ तहर नाहीं मनाए रहा, जउने तरह मूसा क नेमन एका मनावइ क कहे रहेन। 6एह बरे दूत राजा क पत्र पूरे इस्त्राएल अउर यहूदा में लइ गएन। ओन पत्रन में इ लिखा रहा:

इस्त्राएल क सन्तानों, इब्राहीम, इसहाक अउर इस्त्राएल, जउन यहोवा, परमेस्सर क आग्या मानत रहेन ओकरे निअरे लोउटा। तब यहोवा तू लोगन क लगे वापस आइ जउन अस्सूर क राजा लोगन स बच गएन ह अउर अबहि तलक जिअत अहई। 7अपने पुरखन अउर भाइयन क तरह न बना। यहोवा ओनका परमेस्सर रहा, मुला उ पचे ओका धोखा दिहेन। एह बरे उ ओन लोगन क बर्बाद होइ दिहस। तू खुद अपनी आँखी स इ लिख सकत ह। 8अपने पुरखन क तरह हठी जिन बना। अपितु सच्चे हिरदइ स यहोवा क आग्या माना। सब स जियादा पवित्तर जगह पइ आवा। यहोवा सब स जियादा

पवित्र जगह क सदा ही क बरे पवित्र बनाएस ह। अपने यहोवा, परमेस्वर क सेवा करा। तब यहोवा क डरावना किरोध तोह पड़ स हट जाइ। 9जदि तू यहोवा क लगे लउटव्या अउर ओकरे आग्या मनब्या तब तोहार सम्बन्धी, भाइयन अउर बच्चन ओन लोगन क दया पड़हीं जउन ओनका बन्दी बनाएन ह अउर तोहार सम्बन्धी अउर बच्चन इ देस में लउटिहीं। यहोवा, तोहार परमेस्वर कृपालु अउ दयालु अहइ। जदि तू ओकरे लगे लउटव्या तउ उ तोहसे नाहीं मुरब्या।

10दूत एप्रैम अउ मनस्से क पहुँचन क सबहिं नगरन में गएन। उ पचे लगातार पूरे जबूलन देस में गएन। किन्तु लोग दून क हँसी उड़ाएन अउर ओनकर मजाक उड़ाएन। 11मुला आसेर, मनस्से अउ जबूलन देस क कछू लोग आपन क बिनम्र बनाएन अउर यरूसलेम गएन। 12यहूदा में परमेस्वर क सक्ती लोगन क संगठित किहस ताकि उ पचे राजा हिजकिय्याह अउ ओकरे अधिकारियन क आग्या क पालन कइ सकत ही। इ तरह उ पचे यहोवा क आग्या क पालन किहन।

13बहोत स लोग एक संग यरूसलेम, दूसरे महीने में अखमोरी रोटी क उत्सव मनावइ आएन। इ बहोत बड़ी भीड़ रही। 14ओन लोग यरूसलेम स लबार देवतन क वेदियन क हटाइ दिहन। उ पचे लबार देवतन क बरे सुगन्धि भेंट क वेदियन क भी हटाइ दिहन। उ पचे ओन वेदियन क किद्रोन क घाटी में लोकाइ दिहन। 15तब उ पचे फसह पर्व क मेमने क दूसर महीने क चौदहवें दिन मारेन। याजक अउ लेवीबंसी लज्जित भएन। एँह बरे उ पचे अपने क पवित्र सेवा बरे तइयार किहन। याजक अउर लेवीबंसी होमबलि यहोवा क मन्दिर में लइ आएन। 16मन्दिर में अपने बरे मुकरर जगह पड़ उ पचे वइसे ही बइठेन जइसा परमेस्वर क मनई मूसा क नेम में कहा गवा रहा। लेवीबंसी लोग याजकन क रक्त दिहन। तब याजक लोग रक्त क वेदी पड़ छिछकारेन। 17उ समूह में बहोत स लोग अइसे रहेन जउन अपने क पवित्र सेवा क बरे तइयार नाहीं किहे रहेन एह बरे उ पचे फसह पर्व क मेमने क मारइ क मँजूरी नाहीं पाइ सकेन। इहइ कारण रहा कि लेवीबंसी ओन सबहिं लोगन क बरे फसह पर्व क मेमने क मारइ क जिम्मेदार रहेन जउन सुद्ध नाहीं रहेन। लेवीबंसी हर एक मेमना क यहोवा क बरे पवित्र बनाएन।

18एप्रैम, मनस्से, इस्साकार अउर जबूलन क बहोत स लोग फसह पर्व उत्सव क बरे अपने क ठीक तरह स तइयार नाहीं किहे रहा। उ पचे फसह पर्व क मेमनन क खाएन जब कि उ पचे मूसा क नेम क अनुसार असुद्ध रहेन। मुला हिजकिय्याह ओन लोगन बरे पराथना किहस। एह बरे हिजकिय्याह इ पराथना किहस, “यहोवा, तू अच्छा अहा। 19इ सबइ लोग तू यहोवा हम लोगन क पुरखन क परमेस्वर क सेवा करइ बरे आपन पूरे दिल स तइयार रहेन। किन्तु उ पचे अपने क पवित्र सेवा में भाग लेइ बरे नेम क अनुसार सुद्ध न कइ सकेन। एँह बरे कृपा कइके ओन लोगन बरे प्रायश्चित्त करा।” 20यहोवा राजा हिजकिय्याह क

पराथना सुनेस। यहोवा लोगन क छिमा कइ दिहस। 21इस्त्राएल क संतानन यरूसलेम में अखमीरी रोटी क उत्सव सात दिन तलक मनाएन। उ पचे बहोत खुस रहेन। लेवीबंसी अउ याजक लोग अपनी पूरी सक्ती स हर एक दिन यहोवा क स्तुति किहन। 22राजा हिजकिय्याह ओन सबहिं लेवीबंसियन क उत्साहित किहस जउन अच्छी तरह समुझ गए रहेन कि यहोवा क सेवा कइसे कीन्ह जात ह। लोग सात दिन तलक पर्व मनाएन अउर मेलबलि चढ़ाएन। उ पचे अपने पुरखन क यहोवा परमेस्वर क धन्यवाद दिहन अउर ओकर स्तुति किहन।

23सबहिं लोग सात दिन अउर ठहरइ क सहमत होइ गएन। एह बरे उ पचे सात अउर दिना तलक बहोत खुसी स फसह पर्व मनाएन। 24यहूदा क राजा हिजकिय्याह उ सभा क एक हजार बर्धन अउ सात हजार भेड़िन मारइ अउर खाइ क बरे दिहस। प्रमुखन सभा क एक हजार बर्धन अउ दस हजार भेड़िन दिहन। बहोत स याजक लोग पवित्र सेवा बरे अपने क तइयार किहन। 25यहूदा क पूरी सभा, याजक, लेवीबंसी, इस्त्राएल स आवइवाली पूरी सभा अउर उ सबइ यात्री जउन इस्त्राएल स आए रहेन अउ यहूदा पहुँच गए रहेन, सबहिं लोग बहोत जियादा खुस रहेन। 26इ तरह यरूसलेम में बहोत आनन्द रहा। इ पर्व क समान कउनो भी पर्व इस्त्राएल क राजा, दाऊद क पूत सुलैमान क समइ क बाद स नाहीं भवा रहा। 27याजक अउ लेवीबंसी खड़े भएन अउर यहोवा स लोगन क आसीर्वाद देइ क कहेन। परमेस्वर ओनकर सुनेस। ओनकर पराथना सरग में यहोवा क पवित्र निवास तलक पहुँची।

### राजा हिजकिय्याह सुधार करत ह

**31** फसह पर्व क उत्सव पूरा भवा। इस्त्राएल क जउन लोग फसह पर्व क क बरे यरूसलेम में रहेन, उ पचे यहूदा क नगरन क चले गएन। तब उ पचे पाथर क ओन मूरतियन क नेस्तनाबूत किहन जउन ओन नगरन में रहिन। ओन पाथर क मूरतियन क पूजन लबार देवतन क रुप में होत रहा। ओन लोग असेरा क खम्भन क भी काट डाएन अउर उ पचे ओन ऊँची जगहियन अउर वेदियन क भी तोर डाएन जउन बिन्यामीन अउर यहूदा क पूरे देसन में रहेन। लोग एप्रैम अउर मनस्से क छेत्र में उहइ किहन। लोग इ तब किहन जब उ पचे लबार देवतन क पूजा क सबहिं चिजियन क नस्त नाहीं किहन। तब सबहिं इस्त्राएली अपने नगरन क घर लउट आएन।

2राजा हिजकिय्याह फुन याजकन अउ लेवीबंसियन क समूहन में बाँटिस अउर हर एक समूह क आपना बिसेस कार्य करब होत रहा। एह बरे राजा हिजकिय्याह ओन समूहन क आपन कार्य फुन स करइ क कहेस। एह बरे याजकन अउ लेवीबंसियन क फुन स होमबलि अउ मेलबलि चढ़ावइ क काम रहा। ओन क काम मन्दिर में सेवा करब, गाना अउ यहोवा क भवन क दुआर पड़ परमेस्वर क स्तुति करब रहा। 3हिजकिय्याह अपने गोरुअन में स कछू क होमबलि बरे दिहस। इ सबइ गोरु हर रोज भिंसारे अउ साँझ क होमबलि बरे प्रयोग में आवत रहेन। इ सबइ गोरु सबित क

दिनन में अउर नवचन्द्र क समइ अउर दूसर बिसेस उत्सवन पइ दीन्ह जात रहिन। इ वइसे ही कीन्ह जात रहा जइसा यहोवा क ब्यवस्था में लिखा अहइ। 4हिजकिय्याह यरूसलेम में रहइवाले लोगन क आदेस दिहस कि आपन अनाज क हींसा याजकन अउ लेवीबंसियन क देइँ। तबहिं याजक अउ लेवीबंसी आपन क यहोवा क नेम क अनुसार सेवा बरे देइ चाही रही। 5देस क चारिहुँ कइँती क लोग इ आदेस क बारे में सुनेन। एह बरे इस्राएल क लोग अपने कटा भवा अन्न, अंगूर, तेल, सहद अउ जउन कछू भी उ पचे अपने खेतन में उगावत रहने ओन सबहिं फसलन क पहिला हींसा दिहस। उ पचे स्वेच्छा स एन सबहिं चिजियन क दसवाँ हींसा लिआएन। 6इस्राएल अउ यहूदा क लोग जउन यहूदा क नगरन में रहत रहने अपने गोरुअन अउ भेड़िन क दसवाँ हींसा भी लिआएन। उ पचे ओन चिजियन क दसवाँ हींसा भी लिआएन जेका अलगाइ दीन्ह ग रहने अउर यहोवा ओनका परमेस्सर क अर्पित कीन्ह ग रहने। उ पचे ओन सबहिं चिजियन क अपने यहोवा, परमेस्सर क बरे लइके आएन। उ पचे ओन सबहिं चिजियन क ढेरन में धरेन।

7लोग तीसरे महीने में अपनी चिजियन क संग्रह क लिआउब सुरु किहन अउर उ पचे संग्रह क लिआउब सातवें महीने पूरा किहन। 8जब हिजकिय्याह अउ प्रमुख लोग आएन तउ उ पचे संग्रह कीन्ह गइ चिजियन क ढेरन क लखेन। उ पचे यहोवा क स्तुति किहन अउर इस्राएल क लोगन अर्थात यहोवा क लोगन क बड़कई किहन।

9तब हिजकिय्याह याजकन अउ लेवीबंसियन क ढेरन क सम्बंध में पूछेस। 10सादोक परिवार क मुख्य याजक अजर्याह हिजकिय्याह स कहेस, “उ समइ स जब स लोग भेंटन क यहोवा क मन्दिर में लिआउब सुरु कइ दिहेन ह एह बरे हम लोगन क लगे खाइ बरे बहोत जियादा अहइ। हम लोग भर पेट खाए अउर अबहिं तलक हम लोगन क लगे बहोत बचा ह। यहोवा अपने लोगन क सच में आसीस दिहस ह। एह बरे हम लोगन क लगे इ सब बचा ह।”

11तब हिजकिय्याह याजकन क आदेस दिहस कि उ पचे यहोवा क मन्दिर में भण्डार घर तइयार रखइँ। एह बरे इ कीन्ह गवा। 12तब याजक लोग उपहार, भेंटन क दसमांस अउर दूसर चिजियन लिआएन जउन सिरिफ यहोवा क दीन्ह जाब रहिन। उ पचे सबहिं संग्रह कीन्ह गइ चिजियन मन्दिर क भण्डार घरन में रख दीन्ह गइन। लेवीबंसि कोनन्याह सबहिं संग्रह कीन्ह गइ चिजियन क अधीच्छक रहा। कोनन्याह क भाई सिमी ओन चिजियन क उपाधीच्छक रहा। 13कोनन्याह अउ ओकर भाई एन मनइयन क निरीच्छक रहने: अहीएल, अजज्याह, नहत, असाहेल, यरीमेत, योजाबाद, एलीएल, यिस्मक्वाह, महत अउर बनायाह। राजा हिजकिय्याह अउ यहोवा क मन्दिर क अधीच्छक अधिकारी अजर्याह ओन मनइयन क चुनेस। 14यिम्ना लेवी क पूत कोरे ओन भेंटन क अधीच्छक रहा जेनका लोग स्वेच्छा स चढ़ावत रहने। उ ओन चिजियन क उत्तरदायी रहा जउन यहोवा क दीन्ह जात रहने अउ उ ओन उपहारन क बाँटइ क जिम्मेदार रहा जउन यहोवा बरे पवितर बनाई जात रहिन। कोरे पूर्वी दुआर क दुआरपाल रहा। 15एदेन, मिन्यामीन, येसू समायाह,

अमर्याह अउ सकन्याह कोरे क मदद करत रहने। उ सबइ लोग ईमानदारी स ओन नगरन में सेवा करत रहने जहाँ याजक रहत रहने। उ पचे बहोत महत्वपूर्ण अउर कम महत्वपूर्ण दुइँउ याजकन क समान मात्रा में चिजियन दिहेन। 16इ सबइ लोग संग्रह कीन्ह भइ चिजियन क तीन बरिस अउ ओहसे जियादा उमिर क लरिकन अउर मनइयन क भी देत रहने जेनकर नाउँ लेविबंस क इतिहास में लिखा भवा रहने। एन सबहिं मनइयन यहोवा क मन्दिर में आपन हर दिन क सेवा अउर दूसर काम जेकर उ जिम्मेदार रहने, बरे जाइ क रहने। हरेक समूह क आपन नैतिक जिम्मेदारी रहने। 17याजकन क संग्रह कीन्ह भवा चिजियन स ओनकर हींसा दीन्ह जात रहने। परिवारिक आधार पइ, परिवार क इतिहास में लिखित सूची अनुसार इ कीन्ह गए रहने। बीस बरिस या ओहसे अधिक उमिर क लेवीबंसियन क संग्रह क ओनकर हींसा दीन्ह जात रहा। इ ओनकर जिम्मेदारी अउ वर्ग क अनुसार कीन्ह जात रहा। 18लेवीबंसियन क बच्चन, मेहररुअन, पूत अउ बितियन भी संग्रह चिजियन क आपन हींसा पावत रहने। इ ओन सबहिं लेवीबंसियन क बरे कीन्ह जात रहा जउन परिवार क इतिहासन में अंकित रहने। इ लेवीबंसियन बरे कीन्ह ग रहने ताकि उ पचे आपन आप क बिस्सास क संग पवितर राखेन अउर सेवा करइ बरे तइयार रहने। 19याजक हारून क कछू संतानन क लगे कछू खेती जोगग नगर क लगे हुवाँ रहने जहाँ लेवीबंसी रहत रहने अउर हारून क संतानन में स कछू नगरन में भी रहत रहने। ओन नगरन में स हर एक में हारून क एन संतानन क संग्रह चिजियन क हींसा देइ बरे मनई नामांकन क जरिये चुने जात रहने। मनसेधू अउर उ सबइ सबहिं जेनकर नाउँ लेवीबंस क इतिहास में रहा सबहिं संग्रह चिजियन क हींसा पानत रहने।

20इ तरह राजा हिजकिय्याह पूरे यहूदा में उ सबइ सब चिजियन क किहन। उ उहइ किहस जउन यहोवा, ओकरे परमेस्सर क दृष्टि में अच्छा, ठीक अउर बिस्सास जोगग रहा। 21उ जउन भी कार्य परमेस्सर क मन्दिर क सेवा में, नेमन व सबइ आग्या क पालन करइ में अउर अपने परमेस्सर क अनुसरण करइ में किहेस ओहमाँ ओक कामयाबी मिली। हिजकिय्याह इ सबइ सबहिं कार्य अपने पूरे हिरदइ स किहस।

### अस्सूर क राजा यहूदा पइ कब्जा करत ह

32 इ सबइ चिजियन क पाछे हिजकिय्याह बहोत बिस्सास पूर्वक कार्य किहस। अस्सूर क राजा सन्हेरीब यहूदा देस पइ हमला करइ आवा। सन्हेरीब अउर ओकर फउज किला क बाहेर डेरा डाएस। उ इ एह बरे किहस कि उ नगरन क जीतइ चाहत रहा। 2हिजकिय्याह जानत रहा कि उ यरूसलेम, एह पइ हमला करइ आवा ह। 3तब हिजकिय्याह आपन अधिकारियन अउर फउज क अधिकारियन स सलाह लिहस। उ पचे एकमत होइ गएन कि यरूसलेम क बाहेर क सोतन क पानी रोक दीन्ह जाइ। ओन अधिकारियन अउर फउज क अधिकारियन हिजकिय्याह क मदद किहन। 4बहोत स लोग एक संग आएन अउर

झरन अउर स्रोतन क जउन नगर क बीच स होइके बहत रहेन, रोक दिहन। उ पचे कहेन, “अस्सूर क राजा क हिऔं आए पड़ बहोत जियादा पानी नाहीं मिली।” 5 हिजकिय्याह यरूसलेम क पहिले स जियादा मजबूत बनाएस। इ उ इ तरह किहस: उ देवार क टूटे हींसन क फुन बनवाएस। उ देवारन पड़ मीनारन बनाएस, उ पहली देवार क बाहेर दूसर देवार बनवाएस। उ फुन पुरान यरूसलेम क पूरब कइँती दूसर देवार बनवाएस। उ अनेक हथियार अउर ढारन बनवाएस। 6 हिजकिय्याह फउज क अधिकारियन क लोगन क अधीच्छक होइ बरे चुनेस। उ एन अधिकारियन स नगर दुआर क बाहेर खुली जगह में मिला। हिजकिय्याह ओन अधिकारियन स सलाह किहस अउर ओनका उत्साहित किहस। 7 उ कहेस, “मजबूत अउर साहसी बना। अस्सूर क राजा या ओकरे संग क बिसाल फउज स जिन डेरावा, न ही ओहसे चिन्ता हवा। अस्सूर क राजा क लगे जउन सकती अहइ ओहसे भी बड़की सकती हम लोगन क संग अहइ। 8 अस्सूर क राजा क लगे सिरिफ मनई अहइँ। किन्तु हम लोगन क संग यहोवा, आपन परमेस्सर अहइ। हमार परमेस्सर हमार मदद करी। उ हमार जुद्ध खुद लड़ी।” इ तरह यहूदा क राजा हिजकिय्याह लोगन क उत्साहित किहस अउर ओनका पहिले स जियादा सक्तीसाली होइ क अनुभव कराएस।

9 अस्सूर क राजा सन्हेरीब अउर ओकर सारी फउज लाकीस नगर क लगे डेरा डाए पड़ी रही ताकि उ पचे एका हराइ सकइँ। तउ उ यरूसलेम में यहूदा क राजा हिजकिय्याह क लगे अउर यहूदा क सबहिँ लोगन क लगे आपन अधिकारियन पठाएस। सन्हेरीब क अधिकारियन हिजकिय्याह अउर यरूसलेम क सबहिँ लोगन क बरे एकटु सँदेसा लइ आएन। 10 उ पचे कहेन, “अस्सूर क राजा सन्हेरीब इ कहत ह: ‘तू केहमौं बिस्सास करत अहा जउन तोहमौं यरूसलेम में जुद्ध क स्थिति में ठहरब सिखावत ह? 11 हिजकिय्याह तू पचन्क मूरख बनावत ह। तू पचन्क यरूसलेम में ठहरे रखइ क बरे धोखा दीन्ह जात अहइ। इ तरह तू पसे भूख पियास स मार जाब्या। हिजकिय्याह तू पचन्स करत ह, “यहोवा, हमार परमेस्सर हम क अस्सूर क राजा स बचाई।” 12 हिजकिय्याह खुद यहोवा क ऊँच जगहियन अउर वेदियन क हटाएस ह। उ यहूदा अउ यरूसलेम क तू लोगन स कहेस कि तू लोगन क सिरिफ एक वेदी पड़ उपासना करइ अउर सुगन्धि बारइ चाही। 13 निहचइ ही, तू पचे जानत अहा कि मोर पुरखन अउर मईँ दूसर देसन क लोगन क संग का किहेउँ ह? दूसर देसन क देवता अपने लोगन क नाहीं बचाइ सकेन। उ सबइ देवता मोका ओनके लोगन अउ ओकर देसन क नस्ट करइ स नाहीं रोक सकतेन। 14 मोर पुरखन ओन देसन क नस्ट किहन। कउनो भी अइसा देवता नाहीं जउन मोहसे अपने लोगन क नस्ट होइ स बचाइ लेई। एह बरे का तू सोचत ह कि तोहार देवता तोहका मोसे बचाइ लेई? 15 हिजकिय्याह क तू पचन्क मूरख बनावइ अउर गुमराह करइ जिन द्या। ओह पड़ बिस्सास न करा काहेकि कउनो रास्ट्र या राज् क कउनो देवता कबहुँ हम स या हमरे पुरखन स अपने लोगन क बचावइ में समर्थ नाहीं भवा ह।

एह बरे इ जिन सोचा कि तोहार देवता मोका तू पचन्क नस्ट करइ स रोक लेइ।”

16 अस्सूर क राजा क सेवक लोग एहसे भी बुरी बातन यहोवा परमेस्सर अउ परमेस्सर क सेवक हिजकिय्याह क खिलाफ कहेन। 17 अस्सूर क राजा अइसे पत्र भी लिखेस जउन इस्त्राएल क यहोवा परमेस्सर क अपमान करत रहेन। अस्सूर क राजा ओन पत्रन में स जउन कछू लिखा रहा उ इ अहइ: “दूसर राजन क देवता मोहसे नस्ट होइ स अपने लोगन क न बचाइ सकेन। उहइ तरह हिजकिय्याह क परमेस्सर अपने लोगन क मोरे जरिये नस्ट कीन्ह जाइ स नाहीं रोक सकत।” 18 तब अस्सूर क राजा क सेवक यरूसलेम क ओन लोगन पड़ जोर स नरियानेन जउन नगर क देवार पड़ रहेन। ओन सेवकन उ समइ हिब्रू भासा क प्रयोग किहन जब उ पचे देवार पड़ क लोगन क बरे नरियानेन। अस्सूर क राजा क ओन सेवकन इ सब एह बरे किहन कि यरूसलेम क लोग डरि जाइँ। उ पचे उ सबइ बातन एह बरे कहेन कि यरूसलेम नगर पड़ अधिकार कइ सकइँ। 19 उ अधिकारियन ओन देवतन क बिरूद्ध बुरी बातन कहेन जउन संसार क लोगन दुआरा पूजा जात रहेन। उ सबइ देवता सिरिफ अइसी चिजियन अहइँ जेनका मनइयन अपने हाथे स बनाएन ह। इहइ तरह ओन अधिकारियन भी यरूसलेम क परमेस्सर क खिलाफ बुरी बातन कहेन।

20 राजा हिजकिय्याह अउ आमोस क पूत यसायाह नबी इ समस्या क बारे में पराथना किहन। उ पचे जोर स सरग क गोहराएन। 21 तब यहोवा अस्सूर क राजा क खेमे में एक टु सरगदूत क पठाएस। उ सरगदूत अस्सूर क फउज क सब अधिकारियन, प्रमुखन अउर फउजियन क मार डाएन। एह बरे अस्सूर क राजा अपने देस में अपने घर लउट गवा अउर ओकर लोग ओहसे बहोत लजानेन। उ अपने देवता क मन्दिर में गवा अउर उहइ क पूतन में स कउनो ओका हुवाँ तरवार स मार डाएस। 22 इ तरह यहोवा हिजकिय्याह अउर यरूसलेम क लोगन क राजा सन्हेरीब अस्सूर क राजा अउर सबहिँ दूसर लोगन स बचाएस। यहोवा हिजकिय्याह अउर यरूसलेम क लोगन क देखभाल किहस। 23 बहोत स लोग यरूसलेम में यहोवा क बरे भेंट लिआएन। उ पचे यहूदा क राजा हिजकिय्याह क लगे कीमती चिजियन लइ आएन। उ समइ क पाछे सबहिँ रास्ट्र हिजिय्याह क सम्मान दिहन।

24 ओन दिन हिजकिय्याह बहोत बेराम पड़ा अउर मउत क निचके रहा। उ यहोवा स पराथना किहस। यहोवा हिजकिय्याह स बोला अउर ओका एकटु चीन्हा दिहस। 25 मुला हिजकिय्याह क हिरदइ घमण्ड स भरि गवा एह बरे उ परमेस्सर क कृपा बरे परमेस्सर क धन्नवाद नाहीं किहस। इहइ कारण अहइ कि परमेस्सर हिजकिय्याह अउ यरूसलेम अउ यहूदा क लोगन पड़ कोहाइ गवा। 26 मुला हिजकिय्याह अउ यरूसलेम में रहइवाले लोग आपन हिरदइ अउ जिन्नगी क बदल दिहेन। उ पचे बिनम्र होइ गएन अउर घमण्ड करब तजि दिहन। एह बरे जब तलक हिजकिय्याह जितत रहा यहोवा क किरोध ओह पड़ नाहीं उतरा।

27 हिजकिय्याह क बहोत धन अउ सम्मान प्राप्त रहा। उ चाँदी, सोना, कीमती रतन, मसालन, ढारन अउर दूसरी कीमती चिजियन क रखइ बरे महल बनाए रहेन। 28 हिजकिय्याह लोगन क जरिये पठए गए अनाज, नवा दाखरस अउ तेल क बरे भण्डारण भवन बनाएन। ओकरे लगे गोरुअन क बरे पसु-सालन अउर भेड़िन क बरे भेड़-सालन रहिन। 29 हिजकिय्याह बहोत स नगर भी बनाएस अउर ओका अनेक गोरुअन क झुण्ड अउ भेड़िन क रवेड़न मिलिन। परमेस्सर हिजकिय्याह क बहोत जियादा धन दिहस। 30 इ हिजकिय्याह ही रहा जउन यरूसलेम में गिहोन सोते क ऊपरी जलधारन क उद्गमन क रोकेस अउर ऐकर जलधारन क नगर क भीतर स दाऊद नगर क पच्छिम क कइँती मोड़ दिहस। अउर हिजकिय्याह ओन सब में सफल रहा जउन कछू उ किहस।

31 कउनो समइ बाबुल क प्रमुखन हिजकिय्याह क लगे दूत पठएन। ओन दूतन एक चमत्कारिक चिन्ह क बारे में पूछेन जउन रास्ट्रन में परगट भवा रहा।\* जब उ पचे आएन तउ परमेस्सर हिजकिय्याह क अकेले छोड़ दिहस जेहसे कि उ अपनी जाँच कइ सकइ अउर उ सब कछू जान सकइ जउन हिजकिय्याह क हिरदइ में रहा।

32 हिजकिय्याह क बाकी कामन अउर कइसे उ यहोवा क परिेम किहस क विवरण आमोस क पूत यसायाह नबी क दर्सन ग्रन्थ अउर “यहूदा अउ इस्त्राएल क राजा लोगन क इतिहास” क किताब में लिखा भावा ह। 33 हिजकिय्याह मरा अउ अपने पुरखन क संग दफनावा गवा। लोग हिजकिय्याह क उ पहाड़ी पइ दफनाएन जहाँ दाऊद क पूतन क कब्रन अहईँ। जब उ मरा तउ यहूदा क सबहिँ लोग अउ यरूसलेम क रहइवालन हिजकिय्याह क सम्मान दिहन। हिजकिय्याह क जगह पइ पनस्से नवा राजा भवा। मनस्से हिजकिय्याह क पूत रहा।

### यहूदा क राजा मनस्से

**33** मनस्से जब यहूदा क नवा राजा भवा उ बारह बरिस क राहा। उ यरूसलेम में पचपन बरिस तलक राजा रहा। 2 मनस्से उ सबइ सब कार्य किहस जेनका यहोवा गलत कहे रहा। उ दूसर रास्ट्रन क भयंकर अउर पापपूर्ण रीतियन क अनुसरण किहस। यहोवा ओन रास्ट्रन क बाहरे निकर जाइ क बरे मजबूर किहे रहा जब उ इस्त्राएल क लोगन क उ भुइँया पइ लिआए रहा। 3 मनस्से फुन ओन ऊँच जगहन क बनाएस जेनका ओकर बाप हिजकिय्याह तोर गिराये रहा। मनस्से बाल देवतन बरे वेदियन बनाएस अउ असेरा खम्भन खड़े किहस। उ नछत्र-समूह क प्रणाम करत रहा अउ ओनका पूजत रहा। 4 मनस्से यहोवा क मन्दिर में लबार देवतन क बरे वेदियन बनाएस। यहोवा मन्दिर क बारे में कहे रहा, “मोर नाउँ यरूसलेम में सदा ही रही।” 5 मनस्से सबहिँ नछत्र-समूहन क बरे यहोवा क मन्दिर क दुइनउँ अंगनन में वेदियन बनाएस। 6 मनस्से अपने बेटवन क भी बलि बरे हिन्नोम क घाटी में बारेस। मनस्से सान्तिपाठ, दैवीकरण अउ भविस्स कथन क रूप में जादू-टोना क उपयोग किहस। उ ओइन अउ भूतसिद्धि करइवालन क

संग बातन किहस अउर उ यहोवा क दृष्टि में बहोत पाप किहस। मनस्से क पापन यहोवा क किरोधित किहन। 7 उ एक ठु देवता क मूरति बनाएस अउर ओका परमेस्सर क मन्दिर में धरेस। परमेस्सर दाऊद अउ ओकर पूत सुलैमान स मन्दिर क बारे में कहे रहा, “मईँ इ मन्दिर में अउर यरूसलेम में आपन नाउँ क स्थापित करब जेका मईँ इस्त्राएल क सबहिँ परिवार समूहन क नगरन क बीच स चुनेउँ ह, अउर हुवाँ मोर नाउँ हमेसा रहब। 8 मईँ फुन इस्त्राएलियन क उ भुइँया स बाहरे नाहीं करब जेका मईँ ओनके पुरखन क देइ क बरे चुनेउँ। किन्तु ओनका ओन नेमन क बिधियन अउर आदेसन क पालन जरूर करइ चाही जेनका मईँ मूसा क ओनका देइ क हुकुम दिहेउँ।”

9 मनस्से यहूदा क लोगन अउर यरूसलेम में रहइवाले लोगन क पाप करइ बरे उ उत्साहित किहेउँ। उ ओन रास्ट्रन स भी जियादा पाप किहस जेनका यहोवा नस्ट किहे रहा अउर जउन इस्त्राएलियन स पहिले उ पहेँटा में रहेन।

10 यहोवा मनस्से अउर ओकरे लोगन स बातचीत किहस। किन्तु उ पचे सुनइ स इन्कार कइ दिहन। 11 एह बरे यहोवा यहूदा पइ हमला करइ क बरे अस्सूर क राजा क सेनापतियन क हुवाँ पहेँचाएस। एन सेनापतियन मनस्से क धइ लिहन अउर ओका बन्दी बनाइ लिहन। उ पचे ओका बेड़ियन पहिराइ दिहन अउर ओकरे हाथन में पीतर क जंजीरन डाने। उ पचे मनस्से क बन्दी बनाएन अउर ओका बाबुल देस लइ गएन। 12 मनस्से क कस्ट भवा। उ समइ उ यहोवा अपने परमेस्सर स याचना किहस। मनस्से खुद क अपने पुरखन क परमेस्सर क समन्वा बहोत विनम्र किहेस। 13 मनस्से परमेस्सर स पराथना किहस अउर परमेस्सर स मदद माँगेस। यहोवा मनस्से क याचना सुनेस अउ ओका ओह पइ दया आइ। यहोवा ओका यरूसलेम अपने सिंहासन पइ लउटइ क आदेस दिहस। तब मनस्से समुझेस कि यहोवा फुरइ परमेस्सर अहइ।

14 इ घटइ क पाछे, मनस्से दाऊद नगर क बरे बाहरी देवार बनाएस। इ गिहोन क पस्चिमी सोते तलक मछरी-फाटक क प्रवेस दुआर अउर ओपेल पहाड़ी क चारिहुँ कइँती तलक गएन। उ देवार क बहोत ऊँच बनाएस। तब उ अधिकारियन क यहूदा क सबहिँ किलन में रखेस। 15 मनस्से यहोवा क मन्दिर स दूसर रास्ट्रन क देवतन अउ मूरतियन क हटाइ दिहस। उ ओन सबहिँ वेदियन क लोकाएस जेनका उ मन्दिर क पहाड़ी पइ अउ यरूसलेम में बनाएस। मनस्से ओन सबहिँ वेदियन क यरूसलेम नगर स बाहरे लोकाएस। 16 तब उ यहोवा क वेदी पुनः एकत्र किहस अउ मेलबलि अउ धन्यवाद भेंट एह पइ चढ़ाएस। मनस्से यहूदा क सबहिँ लोगन क इस्त्राएल क यहोवा परमेस्सर क सेवा करइ क आदेस दिहस। 17 लोग ऊँच जगहियन पइ बलि देब जारी रखेस, मुला ओनकर भेंटन केवल यहोवा ओनके परमेस्सर बरे रहिन।

18 मनस्से जउन कछू दूसर किहस अउर ओकर परमेस्सर स पराथनन अउ ओन द्रस्टा लोगन क कथन जउन इस्त्राएल क यहोवा परमेस्सर क नाउँ पइ ओहसे बातन किहे रहा, उ सबइ सबहिँ इस्त्राएल क राजा नाउँ क किताबे में लिखी

अहईं। 19मनस्से कइसे पराथना किहस अउर परमेस्सर कइसे सुनेस अउर ओह पइ दाय़ा किहस, इ “द्रस्टा लोगन क पुस्तक” में लिखा अहइ। मनस्से क सबहिं पाप अउ बुराइयन जउन उ खुद क बिनम्र कइ स पहिले किहस अउर उ सबइ जगह जहाँ उ ऊँच जगह बनाएस अउर असेरा-खम्भा खड़ा किहस भी “दसी लोगन क पुस्तक” में दर्ज अहईं। 20मनस्से मरि गवा, अउर उ जगह पइ दफनावा गवा जहाँ पइ ओकर पूरखन क दफनावा गवा रहा। लोग मनस्से क ओकर महल में दफनाएन। मनस्से क जगह पइ ओकर पूत आमोन नवा राजा भवा।

### यहूदा क राजा आमोन

21आमोन जब यहूदा क राजा भवा, बाईस बरिस क रहा। उ दुइ बरिस तलक यरूसलेम में हुकूमत किहस। 22आमोन ठीक वइसा ही किहस जइसा ओकर बाप किहे रहा, उ उ काम किहस जेका यहोवा बुरा समुझत ह। आमोन सबहिं खुदी मूरतियन अउ अपने बाप मनस्से क बनाई मूरतियन क बलि चढ़ाएस। आमोन ओन मूरतियन क लगे निहुरेस अउर ओनकर पूजा किहस। 23आमोन खुद क अपने बाप मनस्से क तरह यहोवा क समन्वा विनम्र नाहीं बनाएस। आमोन जियादा स जियादा पाप करत गवा। 24आमोन क सेवकन ओकरे बिरुद्ध योजना बनाएन उ पचे आमोन क ओकरे घरे में मार डिएन। 25मुला यहूदा क लोग ओन सबहिं सेवकन क मार डिएन जउन राजा आमोन क बिरुद्ध योजना बनाए रहेन। तब लोग योसियाह क नवा राजा चुनेन। योसियाह आमोन क पूत रहा।

### योसियाह क राजा योसियाह

34 योसियाह जब राजा बना, आठ बरिस क रहा। उ यरूसलेम में इकतीस बरिस तलक राजा रहा। 2योसियाह आपन पुरखा दाऊद क तरह उहइ किहस जेका यहोवा नीक समुझत ह। योसियाह दाऊद क राह स नाहीं मुइस, न दायों अउर न ही बायों। उचित काम करइ स नाहीं हटा। 3जब योसियाह आठ बरिस तलक राजा रहि चुका, तउ उ परमेस्सर क, अपने पुरखा दाऊद क परमेस्सर क अनुसरण करइ लाग। योसियाह लरिका ही रहा जब उ परमेस्सर क आग्या क पालन सुरू किहस। जब योसियाह राजा क रूप में बारह बरिस क भवा, उ ऊँच जगहन, असेरा खम्भन पइ खुदी मूरतियन अउ यहूदा अउ यरूसलेम में ढरी मूरतियन क नस्ट करब सुरू कइ दिहस। 4लोग बाल देवतन क वेदियन योसियाह क समन्वा तोर दिहस। तब योसियाह ओन सुगन्धित वेदियन क नस्ट कइ डिएन जउन ओन वेदियन क ऊपर रहेन जउन कि बाल क अर्पित कीन्ह गए रहेन। उ खुदी भवा अउर ढरी भवा मूरतियन क तोर डिएन अउर उ ओन मूरतियन क पीस कइ धूरि बनाइ दिहस। तब योसियाह ओन चूरा क ओन लोगन क कब्रन पइ छिड़केस जउन बाल देवतन क बलि चढ़ावत रहेन। 5योसियाह ओन याजकन क हड्डियन तलक क बारेस जउन अपनी वेदियन पइ बाल देवतन क सेवा किहे रहेन। इ तरह योसियाह मूरतियन अउ मूरति पूजा क यहूदा अउ यरूसलेम

स नस्ट किहस। 6योसियाह इहइ काम मनस्से, एप्रैम, सिमोन अउ नप्ताली तलक क राजन क नगरन में किहस। उ उहइ काम ओन सबइ नजिक क नगरन क खण्डहर संग किहस। 7योसियाह वेदियन अउर असेरा खम्भन क तोर दिहस। उ मूरतियन क पीटिके चूरा बनाइ दिहस। उ पूरे इस्त्राएल देस में ओन सुगन्धि वेदियन क काट डिएस जउन बाल क पूजा में काम आवाति रहिन। तब योसियाह यरूसलेम लउट गवा।

8जब योसियाह यहूदा क राजा क रूप में अपने अट्टारहवें बरिस में रहा, उ असल्याह क पूत सापान नगर क प्रमुख मासेयाह अउर योआहाज क पूत लिपिक योआह क अपने यहोवा परमेस्सर मन्दिर क मरम्मत करइ क बरे पठएस।

योसियाह यहूदा अउर मन्दिर क स्वच्छ रखइ बरे मन्दिर क फुन मरम्मत करइ क आदेस दिहस। 9उ सबइ लोग महा याजक हिल्कियाह क लगे आएन। उ पचे उ धन ओका दिहन जउन लोग परमेस्सर क मन्दिर बरे दिहे रहेन। लेवीबंसी दुआरपालन इ धन मनस्से, एप्रैम अउर बचे सबहिं इस्त्राएलियन स बटोरेन। उ पचे इ धन सारे यहूदा, बिन्यामीन अउर यरूसलेम में रहइवाले सबहिं लोगन स भी बटोरेन। 10तब लेवीबंसी ओन मनइयन क इ धन दिहन जउन यहोवा क मन्दिर क काम क देख-रेख करत रहेन अउर निरीच्छकन ओन मजदूरन क इ धन दिहन जउन यहोवा क मन्दिर क फुन बनाइके स्थापित करत रहेन। 11उ पचे बड़इयन अउ राज-मिस्तरियन क पहिले स कटी बड़की चट्टानन क बेसहइ क बरे अउर काठ खरीदइ क बरे धन दिहन। काठे क उपयोग भवनन क फुन स बनावइ अउ भवन क सहतीरन क बरे कीन्ह गवा। भूतकाल में यहूदा क राजा मन्दिरन क देखभाल नाहीं करत रहेन। उ सबइ भवनन पुराने अउर खंडहर होइ गए रहेन। 12लोग बिस्सासपूर्वक काम किहन। ओनकर निरीच्छक यहत अउ ओबद्याह रहेन। यहत अउ ओबद्याह लेवीबंसी रहेन अउर उ पचे मरारी क परिवार स रहेन। दूसर निरीच्छक जकर्याह अउर मसुल्लाम रहेन। उ पचे कहात क परिवार स रहेन। 13जउन लेवीबंसी संगीत बाजा बजावइ में कुसल रहेन, उ पचे मजदूरन क अउर दूसर काम करइवाले कर्मचारियन क भी निरीच्छण करत रहेन। कछू लेवीबंसी सचिव, अधिकारी अउर दुआरपाल क काम करत रहेन।

### व्यवस्था क पुस्तक मिली

14लेवीबंसियन उ धन क निकारेन जउन यहोवा क मन्दिर में रहा। उ समइ याजक हिल्कियाह यहोवा क व्यवस्था क उ किताब प्राप्त किहस जउन मूसा क जरिये दिन्ह गइ रही। 15हिल्कियाह सचिव सापान स कहेस, “मईं यहोवा क मन्दिर में व्यवस्था क किताब पाएँ ह।” हिल्कियाह सापान क किताब दिहस। 16सापान उ किताब क राजा योसियाह क लगे लिआवा। सापान राजा क खबर दिहस, “तोहरे सेबक हर काम करत अहईं जउन तू करइ क कह्या ह। 17उ पचे यहोवा क मन्दिर स धन क निकारेन अउर ओका निरीच्छकन अउ मजदूरन क देत अहईं।” 18तब सापान राजा

योसियाह स कहेस, “याजक हिल्कियाह मोका एक ठु किताब दिहेस ह।” तब सापन राजा क मौजूदगी में किताब स पढ़ेन। 19जब राजा योसियाह नेमन क पढ़े जात भए सुनेस, उ अपने ओढ़ना फार डाएस। 20तब राजा योसियाह हिल्कियाह, सापान क पूत अहीकाम, मीका क पूत अब्दोन, सचिव सापान अउ सेवक असायाह क आदेस दिहेस। 21राजा कहेस, “जा, मोरे बरे अउ इस्त्राएल अउ यहूदा में जउन लोग बचे अहई ओनके बरे यहोवा स याचना करा। जउन किताब मिली बाटइ ओकरे कथनन क बारे में पूछा। यहोवा हम लोगन पड़ बहोत कोहान अहइ काहेकि हमार पुरखन यहोवा क कथनन क पालन नाहीं किहन। उ पचे उ सबइ काम नाहीं किहन जउन इ पुस्तक करइ क कहत ह।”

22हिल्कियाह अउर राजा क सेवकन नबिया हुल्दा क लगे गएन, हुल्दा सल्लूम क मेहरारु रही। सल्लूम तोखत क पूत रहा। तोखत हस्त्रा क पूत रहा। हस्त्रा राजा क ओढ़नन क देखरेख करत रहा। हुल्दा यरूसलेम क नवे हीसा में रहत रही। हिल्कियाह अउर राजा क सेवक लोग हुल्दा क सब कछू बताएन जउन होइ चुका रहा। 23हुल्दा ओनसे कहेस, “इस्त्राएल क परमेस्सर यहोवा जउन कहत ह उ इ अहइ: राजा योसियाह स कहा: 24यहोवा जउन कहत ह उ इ अहइ, ‘मई इ जगह जउ हिआँ क निवासियन पड़ बिपति डाउब। मई सबहिं भयंकर बिपतियन क जउन यहूदा क राजा क समन्ना बाचेउँ किताबे में लिखी गई अहई, लिआउब। 25मई इ एह बरे करब कि लोग मोका छोड़ें अउ दूसर देवतन क बरे सुगन्धि बारेन। ओन लोग उ सबइ बुरे कामन क कारण जउन उ पचे किहेन मोका किरोधित किहस। एह बरे मई आपन किरोध इ जगह पड़ डारब। मोर किरोध उ आगी क नाई होइ जेका बुझइ नाहीं जा सकत ह?’

26“किन्तु यहूदा क राजा योसियाह स कहा। उ यहोवा स पूछइ क बरे तोहका पठएस। इस्त्राएल क यहोवा परमेस्सर, ‘जउन कथनन क तू कछू समइ पहिले सुन्याह, ओनके बारे में कहत ह: 27योसियाह तू पस्चताप किहा अउर तू अपने क मोर समन्वा बिनम्र किहा। तू मोर समन्वा चिचियाएस जब तू सुनेस ह कि मई इ जगह अउर हिवाँ रहइवालगन लोगन क खिलाफ, बोलेस रहा। एह बरे मई तोहार बिनती सुनेस ह। 28मई तोहका तोहरे पुरखन क लगे लइ जाब। तू अपनी कब्र में सान्तिपूर्वक जाब्या। तोहका ओन बिपतियन में स कउनो भी नाहीं लखइ क पड़िहीं जेनका मई इ जगह अउर हिआँ रहइवाले लोगन पड़ लिआउब।” हिल्कियाह अउर राजा क सेवक योसियाह क लगे इ सँदेसा लइके लउटेन।

29राजा योसियाह अउर यहूदा अउ यरूसलेम क सबहिं अग्रजन क अपने लगे आवइ अउर मिलइ बरे बोलाएस। 30राजा, यहोवा क मन्दिर में गवा। यहूदा क सबहिं लोग, यरूसलेम में रहइवाले लोग, याजक, लेवीबंसी अउर सबहिं साधारण व असाधारण लोग योसियाह क संग रहेन। योसियाह ओन सब क समन्वा उ करार क किताब स वचन क बाँचिस जउन कि यहोवा क मन्दिर में मिली रही। 31तब राजा अपने जगह पड़ खड़ा भवा। उ यहोवा क संग

वाचा किहस। उ यहोवा क अनुसरण करइ क अउर यहोवा क आदेसन, बिधियन अउर नेमन क आपन पूरे हिरदइ अउर आपन पूरे जान स पालन करइ क वाचा किहस। उ इ किताब में लिखे करार क सब्दन क पालन करइ क सहमत भवा। 32तब योसियाह यरूसलेम अउ बिन्यामीन क सबहिं लोगन स परमेस्सर क वाचा क स्वीकार करइ क प्रतिग्या कराएस। यरूसलेम में लोग परमेस्सर, ओकर पुरखन क परमेस्सर क करार क पालन किहन। 33इस्त्राएल क लोगन क लगे बहोत स देस क मूरतियन रहिन। योसियाह ओन सबहिं भयानक मूरतियन क नस्ट कइ दिहेन। यहोवा ओन मूरतियन स घिना करत ह। योसियाह इस्त्राएल क हर एक मनई क अपने यहोवा परमेस्सर क सेवा में पहाँचाएस। जब तलक योसियाह जिअत रहा, लोग पुरखन क यहोवा परमेस्सर क आग्या क पालन करब बन्द नाहीं किहस।

### योसियाह फसह पर्व मनावत ह

35 यरूसलेम में राजा योसियाह यहोवा क बरे फसह पर्व मनाएस। पहिले महीने क चौदहवें दिन फसह पर्व क मेमना मारा गवा। 2योसियाह आपन आपन कार्य करइ बरे याजकन क चुनेस। उ याजकन क उत्साहित किहस, जब उ पचे यहोवा क मन्दिर में सेवा करत रहेन। 3योसियाह ओन लेवीबंसियन स बातन किहस जउन इस्त्राएल क लोगन क उपदेस देत रहेन अउ जउन यहोवा क बरे पवितर बनाए गए रहेन। उ ओन लेवीबंसियन स कहेस: “पवितर सन्दूख क उ मन्दिर में रखा जेका दाऊद क पूत, इस्त्राएल क राजा सुलैमान बनाए रहा। पवितर सन्दूख क अपने काँधे पड़ फुन एक जगह स दूसरे जगह पड़ जिन लइ जा। अब यहोवा आपन परमेस्सर क सेवा करा अउर परमेस्सर क लोग, इस्त्राएलियन क सेवा करा। 4अपने क, अपने परिवार समूहन क अनुसार मन्दिर क सेवा बरे तइयार करा। ओन कार्यन क करा जेनका राजा दाऊद अउ ओकर पूत राजा सुलैमान तोहका करइ क निर्देस लिखित रूप में दिहे रहा। 5हरेक परिवार समूहन, पवितर ठउर में लेविबंसियन क परिवार समूह क संग खड़ा भवा ताकि तू पचे आपन देस क बचा भवा लोगन क प्रस्तुत कइ सकब। 6फसह पर्व क मेमनन क मारा अउर यहोवा क बरे अपने क पवितर करा। मेमनन क अपने भाई इस्त्राएलियन क बरे तइयार करा। सब कछू वइसे ही करा जइसा करइ क आदेस यहोवा मूसा क जरिये दिहे रहा।”

7योसियाह इस्त्राएल क लोगन क तीस हजार भेड़ी-बोकरियन फसह पर्व क बलि बरे दिहस। उ लोगन क तीन हजार गोरु भी दिहस। इ सबइ सबहिं जनावर राजा योसियाह क अपने जनावरन में स रहेन। 8योसियाह क अधिकारियन भी, स्वेच्छा स लोगन क, याजकन क अउर लेवीबंसियन क फसह पर्व में उपयोग करइ बरे जनावरन अउ चिजियन दिहन। प्रमुख याजक हिल्कियाह, जकर्याह अउ यहीएल मन्दिर क उत्तरदायी अधिकारी रहेन। उ पचे याजकन क दुई हजार छः सौ मेमनन अउ बोकरन अउ तीन सौ बर्धन फसह पर्व बलि क बरे दिहन। 9कोनन्याह भी समायाह, नतनेल अउ ओकरे भाइयन क संग अउ हसब्याह, यीएल अउ

योजाबाद पाँच सौ भेड़िन-बोकरियन, पाँच सौ बर्धन फसह पर्व बलि क बरे लेवीबंसियन क दिहन। उ सबइ लोग लेवीबंसियन क प्रमुख रहेन।

10जब हर एक चीज फसह पर्व क सेवा सुरू करइ स पहिले तइयार होइ गइ, तउ याजक अउर लेवीबंसी लोग जगहन पइ गएन। इ उहइ भवा जउन राजा क आदेस रहा। 11फसह पर्व क मेमनन मारे गएन। तब लेवीबंसियन जनावारन क खाल उतारेन अउ याजकन क रक्त दिहन। याजक लोग रक्त क वेदी पइ छिछकारेन। 12तब उ पचे जनावरन क अलग अलग परिवार अमूहन क होमबलि में उपयोग क बरे दिहस। इ एह बरे कीन्ह गवा कि होमबलि उ तरह दीन्ह जाइ सकइ जउने तरह मूसा क नेमन सिखाए रहेन। 13लेवीबंसियन फसह पर्व क बलियन क आगी पइ इ तरह भूजेन जइसा ओनका आदेस दीन्ह गवा रहा अउर उ पचे पवित्र भेटन क हौड़ी, डेग अउ कड़ाहियन में पकाएन। तब उ पचे लोगन क हाली स मौस दिहन। 14जब इ पूरा भवा तब लेवीबंसियन क अपने बरे अउर ओन याजकन क बरे मौस मिला जउन हारून क संतान रहेन। ओन याजकन क काम करत करत भए अंधियारा होइ तलक काम में बहोत जियादा लगाए गवा रखा। उ पचे होमबलि अउर बलिदानन क चर्बी क बारत भए कड़ी मेहनत किहन। 15आसाप क परिवार क लेवीबंसी गायक ओन जगहन पइ पहोंचेन जेनका राजा दाऊद ओनके खड़े होइ क बरे चुने रहा। उ पचे आसाप, हेमान अउर राजा क नबी यदूतून रहेन। हर एक दुआरे पइ दुआरपाल अपनी जगह नाहीं छोड़ सकत रहेन काहेकि ओनकर लेवीबंसी भाइयन हर एक चीज ओनके फसह पर्व क बरे तइयार कइ दिहे रहेन।

16उ दिन सब कछू यहोवा क उपासना क बरे वइसा ही कीन्ह गवा रहा जइसा राजा योसियाह आदेस दिहस। फसह पर्व क त्यौहार मनावा गवा अउर होमबलि यहोवा क वेदी पइ चढ़ाई गइ। 17इस्त्राएल क जउन लोग हुवाँ रहेन उ पचे फसह पर्व मनाएन अउर अखमीरी रोटी क पर्व सात दिन तलक मनाएस। 18समूल नबी दिन स ही फसह पर्व इ तरह नाहीं मनावा गवा रहा। इस्त्राएल क कउनो राजा कबहुँ इ तरह फसह पर्व नाहीं मनाए रहेन। राजा योसियाह, याजक, लेवीबंसी अउर इस्त्राएल अउ यहूदा क लोग, यरूसलेम में सबहि लोगन क संग, फसह पर्व क बहोत ही बिसेस रुप म मनावा। 19इ फसह पर्व योसियाह क राजकाल क अट्ठारहवें बरिस मनावा गवा।

### योसियाह क मउत

20योसियाह जब मन्दिर क ओन अच्छे कामन क कइ चुका, तउ उ समइ मिस्र क राजा नको जुद्ध करइ बरे आपन फउज क परत नदी क बगल में स्थित कर्कमीस नगर पइ लइके आवा। नको मिस्र क राजा रहा। राजा योसियाह नको क खिलाफ लइइ बाहेर निकरा। 21किन्तु नको योसियाह क लगे दूत पठएस। उ पचे कहेन, “राजा योसियाह, इ जुद्ध तोहरे बरे समस्या नाहीं अहइ। मई तोहरे बिरुद्ध लइइ नाहीं आवा हउँ। मई अपने दुस्मम स लइइ आवा हउँ। परमेस्सर ओका हाली करइ क कहेस ह।

परमेस्सर मोरी कइँती बाटइ एह बरे मोका परेसान करा। जदि तू मोरे खिलाफ लइइया, परमेस्सर तोहका नस्ट कइ देइ।” 22मुला योसियाह हटा नाहीं। उ नको स जुद्ध करइ क निहचइ किहस, एह बरे उ आपन भेस बदलेस अउ जुद्ध करइ गवा। योसियाह ओका सुनइ स इन्कार कइ दिहस जउन नको परमेस्सर क आदेस क बारे में कहेस। योसियाह मगिदो क मइदान में जुद्ध करइ गवा। 23जउने समइ योसियाह जुद्ध में रहा, उ बाणन स बेध दीन्ह गवा। उ अपने सेवकन स कहेस, “मोका दूर लइ चला। मई बुरी तरह घायल हउँ।”

24एह बरे सेवकन योसियाह क रथे स बाहेर निकारेन, अउर ओका दूसरे रथ में बइठाएन जेका उ अपने संग जुद्ध में लिआवा रहा। तब उ पचे योसियाह क यरूसलेम लइ गएन। राजा योसियाह यरूसलेम में मरा। योसियाह क हुवाँ दफनावा गवा जहाँ ओकरे पुरखन दफनाए गए रहेन। यहूदा अउ यरूसलेम क सबहि लोग योसियाह क मरइ पर बहोत दुःखी रहेन। 25थिर्मयाह योसियाह क बरे कछू बहोत जियादा करुण गीत लिखेस अउर गाएस। आग भी सबहि मेहरारु-मनसेधू गाएक ओन “करुण गीतन” क गावत हीं। योसियाह क दुःखी क गीतन इस्त्राएलियन बरे रीति बन गवा। उ पचे गीत “करुण गीतन” क संग्रह में लिखे अहईं।

26-27दूसर जउन कछू योसियाह अपने राजकाल में, हुकुमत क सुरू स आखीर तलक किहस, उ “यहूदा अउर इस्त्राएल क राजा लोगन क इतिहास” नाउँ क किताबे में लिखा गवा अहइ। उ किताब यहोवा क बरे ओकर भक्ति अउर उ यहोवा क नेमन क पालन कइसे किहस, हम लोगन क बतावत ह।

### यहूदा क राजा यहोआहाज

36 यहूदा क लोग यरूसलेम में नवा राजा क रूप में योसियाह क पूत यहोआहाज क ताजपोसी किहस। यहोआहाज जब यहूदा क राजा भवा, उ तेईस बरिस क रहा। उ यरूसलेम में तीन महीने राजा रहा। 3तब मिस्र क राजा नको यहोआहाज क बन्दी बनाइ लिहस। नको यहूदा क लोगन क पौने चार टन चाँदी अउ पचहत्तर पौण्ड सोना दण्डरासि देइ क मजबूर किहस। 4नको यहोआहाज क भाई क यहूदा अउ यरूसलेम क नवा राजा होइ क बरे चुनेस। यहोआहाज क भाई क नाउँ एल्याकीम रहा। तब नको एल्याकीम क एक नवा नाउँ दिहस। उ ओकर नाउँ यहोयाकीम रखेस किन्तु नको यहोआहाज क मिस्र लइ गवा।

### यहूदा क राजा यहोआकीम

5यहोआकीम उ समइ पच्चीस बरिस क रहा जब उ यहूदा क राजा भवा। उ गियारह बरिस तलक यरूसलेम में राजा रहा। यहोयाकीम उहइ किहस जेका यहोवा बुरा समुझत अहा। उ अपने यहोवा परमेस्सर क बिरुद्ध पाप किहस।

6बाबेल क राजा नबूकदनेस्सर यहूदा पइ हमला किहस। उ यहोयाकीम क बन्दी बनाएस अउर ओका काँसे क जंजीरन में डाएस। तब नबूकदनेस्सर राजा यहोयाकीम क

बाबेल लइ गवा। 7नबूकदनेस्सर यहोवा क मन्दिर स कछू चिजियन लइ गवा। उ ओन चिजियन क बाबेल लइ गवा अउर अपने घर अर्थात राजमहल में रखेस। 8यहोयाकीम जउन दूसर काम किहस, जउन भयंकर पाप उ किहस अउर हर एक काम जेका करइ क उ अपराधी रहा, इ सबइ काम “यहूदा अउ इस्त्राएल क राजा लोगन क इतिहास” नाउँ किताबे में लिखे अहई।

यहोयाकीन, यहोयाकीम क जगह पइ नवा राजा भवा। यहोयाकीन, यहोयाकीम क पूत रहा।

### यहूदा क राजा यहोयाकीन

9यहोयाकीन जब यहूदा क राजा भवा, अट्ठारह बरिस क रहा। उ यरूसलेम में तीन महीने दस दिन राजा रहा। उ उ सबइ काम किहस जेका यहोवा दुआरा बुरा समुझा जात रहा। 10बसन्त में राजा नबूकदनेस्सर कछू सेवकन क यहोयाकीन क धरइ क पठाए। उ पचे यहोयाकीन अउ यहोवा क मन्दिर में स कछू कीमती खजाना बाबेल लइ गए। नबूकदनेस्सर सिदकिय्याह क यहूदा अउ यरूसलेम क नवा राजा होइ बरे चुनेस। सिदकिय्याह यहोयाकीन क सम्बन्धी रहा।

### यहूदा क राजा सिदकिय्याह

11सिदकिय्याह जब यहूदा क राजा बना, इक्कीस बरिस क रहा। उ यरूसलेम में गियारह बरिस तलक राजा रहा। 12सिदकिय्याह उहइ किहस जेका यहोवा दुआर बुरा समुझा जात रहा। यिर्मयाह नबी यहोवा कईंती स सँदिसन ओका दिहस मुला उ अपने क बिनम्र नाहीं बनाएस अउर यिर्मयाह नबी जउन कहेस ओकर पालन नाहीं किहस।

### यरूसलेम नेस्त नाबूद भवा

13सिदकिय्याह नबूकदनेस्सर क खिलाफ विद्रोह किहस। कछू समइ पहिले नबूकदनेस्सर सिदकिय्याह स प्रतिग्या कराए रहा कि उ नबूकदनेस्सर क बिस्सासपात्र रही। सिदकिय्याह परमेस्सर क नाउँ लिहस अउर नबूकदनेस्सर क बरे बिस्सासपात्र बने रहइ क प्रतिग्या किहस मुला सिदकिय्याह बहोत अडियल रहा अउर उ आपन जिन्नगी बदलइ, इस्त्राएल क यहोवा परमेस्सर क लगे लउटइ अउ ओकरी आग्या मानइ स इन्कार कइ दिहस। 14याजकन क सबहिं प्रमुखन अउ यहूदा क लोगन क प्रमुखन यहोवा क धोखा दिहस। उ पचे रास्ट्रन क भयंकर करमन स भी बुरा करम किहस। ओन प्रमुखन लोगन यहोवा क मन्दिर क अपमान किहेन जेका उ यरूसलेम में अर्पित किहे रहा। 15ओनके पुरखन क यहोवा

परमेस्सर अपने लोगन क चितउनी देइ क बरे बार बार नबियन क पठाएस। यहोवा इ एह बरे किहस कि ओका ओन पइ कृपालु रही अउर मन्दिर क लिए दुःख रहा। 16किन्तु परमेस्सर क लोगन परमेस्सर क नबियन क मजाक उड़ाएन। उ पचे परमेस्सर क नबियन क सुनइ स इन्कार किहस। उ पचे परमेस्सर क संदेस क नकार दिहस। आखीर में परमेस्सर अपने लोगन पइ ऐतना कोहान कि ओका रोकइ क बरे कछू भी नाहीं रहा। 17एह बरे परमेस्सर बाबेल क राजा क यहूदा क लोगन पइ हमला करइ बरे लिआवा। बाबेल क राजा जुवा मनइयन क मन्दिर में होइ प भी मार डाएस। उ यहूदा अउ यरूसलेम क लोगन पइ दया नाहीं किहस। बाबेल क राजा जुवा मनइयन, जुवा मेहररूअन अउ बूदा मनइयन सबहिं लोगन क मारेस। परमेस्सर नबूकदनेस्सर क यहूदा अउ यरूसलेम क लोगन क दण्ड देइ दिहस। 18नबूकदनेस्सर परमेस्सर क मन्दिर क, राजा अउ राजा क अधिकारियन क सबहिं कीमती चिजियन लइ लिहस।

19नबूकदनेस्सर अउ ओकर फउज मन्दिर क आगी लगाइ दिहस। उ पचे यरूसलेम क चहारदीवारी गियाइ दिहन अउर राजा अउ ओकरे अधिकारियन क सबहिं घरन क बार दिहन। उ पचे यरूसलेम स हर एक कीमती चीज लिहन या ओका नस्ट कइ दिहन। 20नबूकदनेस्सर एकरे पाछे भी जिअत बचे लोगन क, बाबुल लइ गवा अउर ओनका दास होइ क मजबूर किहस। उ सबइ लोग बाबेल में दास क तरह तब तलक रहेन जब तलक फारस क सम्राट बाबेल क राज क पराजित नाहीं किहस। 21इ तरह यहोवा, इस्त्राएल क लोगन क जउन कछू यिर्मयाह नबी स कहवावा, उ सबइ ठीक घटित भवा। यहोवा यिर्मयाह क जरिये कहे रहा: “इ जगह सतर बरिस तलक सूनी अउ उजाड़ देस रही। इ भूइँया क सबइ सबित विस्राम क खुसी मनावइ बरे होइ जेका लोग नाहीं किहे रहा।”

22इ तब पहिले बरिस भवा जब फारस क राजा कुसू हुकूमत करत रहा। यहोवा कुसू क हिरदइ क एक खास प्रायश्चित करइ बरे उत्तेजित किहस ताकि जउन कछू यहोवा यिर्मयाह नबी क माध्यम स कहेस सबइ घटित सकतेन। जेहसे उ आदेस लिखेस अउर अपने राज में हर एक जगह पइ पठाएस:

23फारस क राजा कुसू इहइ कहत ह: सरग क परमेस्सर यहोवा मोका पूरी पृथ्वी क राजा बनाएस ह। उ मोका अपने बरे एक मन्दिर यरूसलेम में बनावइ क जिम्मेदारी दिहस ह। अब तू सबहिं जउन परमेस्सर क लोग अहा, यरूसलेम जाइ क बरे अजाद हवा। यहोवा परमेस्सर तोहरे संग होइ।